

**ЭДИЙН ЗАСГИЙН БАЙНГЫН ХОРООНЫ
ХУРАЛДААНЫ ТЭМДЭГЛЭЛИЙН АГУУЛГА**

2026 оны 06 дугаар сарын 18-ны өдөр, Пүрэв гараг

Хуралдааны тэмдэглэлийн агуулга

Хуралдааны товч тэмдэглэл:	1-34
Хуралдааны дэлгэрэнгүй тэмдэглэл:	35-72

1.Төрийн болон орон нутгийн өмчит компанийн бүтээмж, ил тод байдал, засаглалыг сайжруулах тухай хуулийн төсөл болон хамт өргөн мэдүүлсэн хууль, тогтоолын төслүүд /Засгийн газар 2025.01.08-ны өдөр өргөн мэдүүлсэн, анхны хэлэлцүүлэг, үргэлжлэл/

36-70

2.Эдийн засгийн эрх чөлөөний тухай хуулийн төсөл болон хамт өргөн мэдүүлсэн хуулийн төслүүд /Улсын Их Хурлын гишүүн О.Цогтгэрэл нарын 3 гишүүн 2026.06.05-ны өдөр өргөн мэдүүлсэн, хэлэлцэх эсэх, үргэлжлэл/

70-72

**Монгол Улсын Их Хурлын 2026 оны хаврын ээлжит чуулганы
Эдийн засгийн байнгын хорооны
06 дугаар сарын 18-ны өдөр /Пүрэв гараг/-ийн
хуралдааны товч тэмдэглэл**

Улсын Их Хурлын гишүүн Д.Үүрийнтуяа ирц, хэлэлцэх асуудлын дарааллыг танилцуулж, хуралдааныг даргалав.

Хуралдаанд ирвэл зохих 32 гишүүнээс 18 гишүүн хүрэлцэн ирж, 56.3 хувийн ирцтэйгээр хуралдаан 12 цаг 50 минутад Төрийн ордны “Үндсэн хууль” танхимд эхлэв.

Томилолттой: Ч.Анар, Н.Батсүмбэрэл, Ш.Бямбасүрэн, Б.Заяабал, А.Ундраа, О.Цогтгэрэл, С.Цэнгүүн, М.Энхцэцэг;
Эмнэлгийн чөлөөтэй: Ж.Ганбаатар;
Тасалсан: Ж.Золжаргал, З.Мэндсайхан.

Улсын Их Хурлын гишүүн, Улсын Их Хурал дахь Ардчилсан намын бүлгийн дарга Б.Жаргалан Төрийн болон орон нутгийн өмчит компанийн бүтээмж, ил тод байдал, засаглалыг сайжруулах тухай хуулийн төсөл болон хамт өргөн мэдүүлсэн хууль, тогтоолын төслүүдийн анхны хэлэлцүүлэг асуудлаар Улсын Их Хурал дахь Ардчилсан намын бүлгээс авсан завсарлага дууссаныг мэдэгдэж үг хэлэв./12:55/

Нэг.Төрийн болон орон нутгийн өмчит компанийн бүтээмж, ил тод байдал, засаглалыг сайжруулах тухай хуулийн төсөл болон хамт өргөн мэдүүлсэн хууль, тогтоолын төслүүд /Засгийн газар 2025.01.08-ны өдөр өргөн мэдүүлсэн, анхны хэлэлцүүлэг, үргэлжлэл/

Хэлэлцэж буй асуудалтай холбогдуулан Засгийн Газрын Хэрэг Эрхлэх газрын Дэд дарга Д.Цолмон, мөн газрын ахлах референт Б.Төрбат, Монгол Улсын Ерөнхий сайдын Засаглал, цахим бодлого хариуцсан зөвлөх С.Тэнгис, Төрийн өмчийн бодлого, зохицуулалтын газрын Захиргаа, удирдлагын хэлтсийн дарга Н.Ганболд, “Эрдэнэс Монгол” хязгаарлагдмал хариуцлагатай компанийн Мэргэжлийн нэгдсэн зөвлөлийн зохицуулагч Б.Гэрлээ, мөн компанийн Ерөнхий

аудитор О.Баярмагнай, Монгол Улсын Их Сургуулийн Хууль зүйн сургуулийн багш, доктор Г.Давааням, С.Батбаяр нар оролцов.

Хуралдаанд Улсын Их Хурлын Тамгын газрын Байнгын хороодын асуудал эрхлэх газрын Эдийн засгийн байнгын хорооны ажлын албаны ахлах зөвлөх Д.Мягмарцэрэн, зөвлөх Л.Батмөнх, Б.Нарангэрэл, референт М.Мандхай нар байлцав.

Төрийн болон орон нутгийн өмчит компанийн бүтээмж, ил тод байдал, засаглалыг сайжруулах тухай хуулийн төслийн анхны хэлэлцүүлэг төслийн талаарх зарчмын зөрүүтэй саналын томъёоллын санал хураалтаар үргэлжлэв.

Д.Үүрийнтуяа: 1.Улсын Их Хурлын гишүүн Д.Үүрийнтуяа, П.Сайнзориг, О.Номинчимэг, Ж.Алдаржавхлан, О.Алтангэрэл, Ч.Анар, Р.Батболд, Б.Бат-Эрдэнэ, Б.Баярбаатар, Ж.Галбадрах, А.Ганбаатар, Г.Ганбаатар, Ж.Ганбаатар, Ц.Даваасүрэн, Б.Жаргалан, Б.Заяабал, С.Зулпхар, Ц.Мөнхбат, Б.Мөнхсоёл, З.Мэндсайхан, Н.Наранбаатар, У.Отгонбаяр, Б.Пунсалмаа, Ц.Сандаг-Очир, Г.Уянгахишиг, Б.Хэрлэн, Л.Энхнасан, Д.Энхтүвшин, С.Эрдэнэболд /Цаашид “ажлын хэсэг” гэх/ нарын гаргасан, Төслийн нэрийн “бүтээмж, ил тод байдал, засаглалыг сайжруулах” гэснийг хасаж, 1 дүгээр зүйлийн 1.1 дэх хэсгийн “хяналт, ил тод байдал, засаглалыг сайжруулах, бүтээмжийг нэмэгдүүлэхтэй” гэснийг “хяналтыг хэрэгжүүлэх, ил тод байдлыг хангахтай” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 6
Бүгд: 19
68.4 хувийн саналаар дэмжигдлээ.

2.Ажлын хэсгийн гаргасан, Төслийн 2 дугаар зүйлийн гарчгийн, мөн зүйлийн 2.1 дэх хэсгийн “бүтээмж, ил тод байдал, засаглалыг сайжруулах” гэснийг тус тус хасах гэсэн саналыг дэмжье гэсэн санал хураалт явуулъя.

Зөвшөөрсөн: 14
Татгалзсан: 5
Бүгд: 19
73.7 хувийн саналаар дэмжигдлээ.

3.Ажлын хэсгийн гаргасан, Төслийн 3 дугаар зүйлийн 3.3 дахь хэсгийн “хуулийн дагуу байгуулагдсан” гэснийг “хуулиар зохицуулагдах” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 14
Татгалзсан: 5
Бүгд: 19
73.7 хувийн саналаар дэмжигдлээ.

4.Ажлын хэсгийн гаргасан, Дээрх 1 дэх санал дэмжигдсэнтэй холбогдуулан төслийн 4 дүгээр зүйлийн 4.1.1, 4.1.2 дахь заалтын “хяналт” гэснийг “хяналтын эрхийг” гэж өөрчилж, доор дурдсан агуулгатай 4.1.6 дахь заалт нэмэх:

“4.1.6.“хяналтын эрхийг хэрэгжүүлэх” гэж төр, орон нутаг, эсхүл тэдгээрийн хувьцаа эзэмшигчийн эрхийг хэрэгжүүлэгч нь дангаараа, эсхүл нэгдмэл сонирхолтой этгээдээр дамжуулан тухайн компанийн төлөөлөн удирдах зөвлөлийн гишүүдийн олонхыг томилох, эсхүл компанийн стратеги, санхүүгийн бодлого, үндсэн үйл ажиллагаанд заавал биелэгдэх шийдвэр гаргах эрхийг хууль, гэрээ, дүрмийн үндсэн дээр хэрэгжүүлэхийг.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 6
Бүгд: 19
68.4 хувийн саналаар дэмжигдлээ.

5.Ажлын хэсгийн гаргасан, Төслийн 4 дүгээр зүйлийн 4.1.1, 4.1.2 дахь заалтын “энэ” гэснийг, 4.1.3, 4.1.4 дэх заалтыг тус тус хасаж, 4.1.5 дахь заалтыг доор дурдсанаар өөрчлөн найруулах:

“4.1.5.“нийтийн үйлчилгээ” гэж иргэдийн ая тухтай амьдрах таатай орчныг бүрдүүлэх зорилгоор дэд бүтэц, эрчим хүч, зам, тээвэр, эрүүл мэнд, боловсрол, соёл, спорт болон холбогдох бусад салбарт төрөөс иргэдэд тэгш, чанартай, үр ашигтай, хууль тогтоомж, стандартын дагуу үзүүлж байгаа олон нийтэд зориулсан үйлчилгээг;” гэсэн саналыг дэмжье гэсэн санал хураалт явуулъя.

Улсын Их Хурлын гишүүн П.Сайнзориг үг хэлж, дээрх саналаа татаж авсан тул санал хураалт явуулаагүй болно.

6.Улсын Их Хурлын гишүүн П.Сайнзоригийн гаргасан, Төслийн 4 дүгээр зүйлийн 4.1.1, 4.1.2 дахь заалтын “энэ” гэснийг, 4.1.4 дэх хэсгийг хасаж, 4.1.5 дахь заалтыг доор дурдсанаар өөрчлөн найруулах:

“4.1.5.“нийтийн үйлчилгээ” гэж иргэдийн ая тухтай амьдрах таатай орчныг бүрдүүлэх зорилгоор дэд бүтэц, эрчим хүч, зам, тээвэр, эрүүл мэнд, боловсрол, соёл, спорт болон холбогдох бусад салбарт төрөөс иргэдэд тэгш, чанартай, үр ашигтай, хууль тогтоомж, стандартын дагуу үзүүлж байгаа олон нийтэд зориулсан үйлчилгээг;” гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 7
Бүгд: 19
63.2 хувийн саналаар дэмжигдлээ.

7.Ажлын хэсгийн гаргасан, Төслийн 5 дугаар зүйлд доор дурдсан агуулгатай дараах Тайлбар хэсэг нэмэх:

“Тайлбар: -Энэ хуульд заасан “үр ашигтай байх” гэж арилжааны чиглэлийн төрийн болон орон нутгийн өмчит компанийн хувьд санхүүгийн капитал хөрөнгийн жигнэсэн дундаж өртгийн тодорхой хувиас доошгүй хэмжээний цэвэр ашигтай ажиллаж, эдийн засгийн өгөөж бий болгон компанийн үнэ цэнийг нэмэгдүүлэхийг ойлгоно. Харин нийтийн үйлчилгээний төрийн болон орон нутгийн өмчит компанийн хувьд нийтийн үйлчилгээг хүртээмжтэй, чанартай, хамгийн боломжит бага зардлаар үзүүлэхийг ойлгоно.”

“Тайлбар: -Энэ хуульд заасан “зах зээлд шударга өрсөлдөх, аливаа хэлбэрээр давуу эрх эдлэхгүй байх” гэж хуульд зааснаас бусад тохиолдолд татварын хөнгөлөлт, чөлөөлөлт эдлэх, төрийн баталгаа, хөнгөлөлттэй зээл, санхүүжилт авах, газар, үл хөдлөх эд хөрөнгө, дэд бүтцийг зах зээлийн үнээс доогуур нөхцөлөөр ашиглах, зөвшөөрөл, эрх олгох ажиллагаанд давуу нөхцөл эдлэх, төрийн болон орон нутгийн худалдан авах ажиллагаанд давуу эрх эдлэх, дампуурал, төлбөрийн чадваргүйдлийн нийтлэг журмаас үндэслэлгүйгээр чөлөөлөгдөхгүй байхыг ойлгоно.” гэсэн саналыг дэмжье гэсэн санал хураалт явуулъя.

Зөвшөөрсөн: 13

Татгалзсан: 6

Бүгд: 19

68.4 хувийн саналаар дэмжигдлээ.

8.Ажлын хэсгийн гаргасан, Төслийн 5 дугаар зүйлийн 5.2.4 дэх заалтын “мэргэжлийн” гэснийг “мэргэшсэн” гэж, 5.2.5 дахь заалтын “үр ашиггүй” гэснийг “үргүй” гэж өөрчилж, 5.2.8 дахь заалтын “тайлагнах” гэсний өмнө “бүрэн” гэж нэмж, 5.2.1, 5.2.2 дахь заалтыг доор дурдсанаар өөрчлөн найруулах:

“5.2.1.компанийн удирдлагын эрх төрийн болон орон нутгийн эрх хэмжээнээс тусгаарлагдсан байх;”

“5.2.2.хувьцааны төрөл, тоонд нийцүүлэн хувьцаа эзэмшигчдэд тэгш хандах;” гэсэн саналыг дэмжье гэсэн санал хураалт явуулъя.

Зөвшөөрсөн: 13

Татгалзсан: 6

Бүгд: 19

68.4 хувийн саналаар дэмжигдлээ

9.Ажлын хэсгийн гаргасан, Төслийн 6 дугаар зүйлийн гарчгийн “, хэлбэр” гэснийг хасаж, 6.1, 6.2 дахь хэсгийг доор дурдсанаар өөрчлөн найруулах:

“6.1.Төрийн өмчит компанийг төрийн эзэмшлийн хувь хэмжээнээс хамааруулан дараах байдлаар ангилна:

6.1.1.компанийн нийт гаргасан энгийн хувьцааг бүхэлд нь төр дангаараа эзэмшдэг бол төрийн өмчийн компани;

6.1.2.компанийн нийт гаргасан энгийн хувьцааны 50-аас дээш хувийг төр дангаараа, эсхүл нэгдмэл сонирхолтой этгээдээр дамжуулан эзэмшдэг бол төрийн өмч давамгайлсан компани;

6.1.3.компанийн нийт гаргасан энгийн хувьцааны гуравны нэгээс дээш 50 хүртэл хувийг төр эзэмшдэг бол төрийн өмчийн оролцоотой компани.

6.2.Орон нутгийн өмчит компанийг орон нутгийн эзэмшлийн хувь хэмжээнээс хамааруулан дараах байдлаар ангилна:

6.2.1.компанийн нийт гаргасан энгийн хувьцааг бүхэлд нь орон нутаг дангаараа эзэмшдэг бол орон нутгийн өмчийн компани;

6.2.2.компанийн нийт гаргасан энгийн хувьцааны 50-аас дээш хувийг орон нутаг дангаараа, эсхүл нэгдмэл сонирхолтой этгээдээр дамжуулан эзэмшдэг бол орон нутгийн өмч давамгайлсан компани;

6.2.3.компанийн нийт гаргасан энгийн хувьцааны гуравны нэгээс дээш 50 хүртэл хувийг орон нутаг эзэмшдэг бол орон нутгийн өмчийн оролцоотой компани.” гэсэн саналыг дэмжье гэсэн санал хураалт явуулъя.

Улсын Их Хурлын гишүүн П.Сайнзориг үг хэлж, дээрх саналаа татаж авсан тул санал хураалт явуулаагүй болно.

10.Ажлын хэсгийн гаргасан, Төслийн 6 дугаар зүйлийн 6.3 дахь хэсгийг доор дурдсанаар өөрчлөн найруулах:

“6.3.Төрийн болон орон нутгийн өмчит компанийг үйл ажиллагааны зорилго, чиг үүргээс нь хамааруулан арилжааны, эсхүл нийтийн үйлчилгээний гэж ангилах бөгөөд энэ талаар тухайн компанийн дүрэмд тусгана.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 6
Бүгд: 19
68.4 хувийн саналаар дэмжигдлээ.

11.Ажлын хэсгийн гаргасан, Төслийн 7 дугаар зүйлийн гарчгийн “үндсэн чиглэл” гэснийг “өмчлөлийн бодлого” гэж, 7.1 дэх хэсгийн “үндсэн чиглэлийг” гэснийг “өмчлөлийн бодлогыг” гэж, 7.2 дахь хэсгийн “энэ хуулийн 7.1-д заасан үндсэн чиглэлийн төслийг” гэснийг “төрийн өмчит компанийн талаар баримтлах өмчлөлийн бодлогыг” гэж, 7.3, 7.4 дэх хэсгийн “Үндсэн чиглэлд” гэснийг “Төрийн өмчит компанийн талаар баримтлах өмчлөлийн бодлогод” гэж, 7.3.4 дэх заалтын “үндсэн чиглэлийн” гэснийг “төрийн өмчит компанийн талаар баримтлах өмчлөлийн бодлогын” гэж, 7.3.1 дэх заалтын “хувьцаа эзэмших, хянах зорилго,” гэснийг “хувьцаа эзэмших зорилго, хяналтын эрхийг хэрэгжүүлэх” гэж, 7.3.6 дахь заалтын “биржээр олон нийтэд нээлттэй худалдах” гэснийг “худалдах, түүнийг хэрэгжүүлэх арга,” гэж тус тус өөрчилж, 7.3.5 дахь заалтын “бүтцийн” гэснийг хасах гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 7
Бүгд: 20
65.0 хувийн саналаар дэмжигдлээ.

12.Ажлын хэсгийн гаргасан, Төслийн 7.7 дахь хэсгийн “хуудсанд” гэсний дараа “06 дугаар сарын 30-ны өдрийн дотор” гэж нэмж, 7.5, 7.6 дахь хэсгийг доор дурдсанаар тус тус өөрчлөн найруулах:

“7.5.Төрийн өмчит компанийн талаар баримтлах өмчлөлийн бодлогын хэрэгжилтэд төрийн өмчийн асуудал эрхэлсэн төрийн захиргааны байгууллага жил бүр хяналт-шинжилгээ, үнэлгээ хийж, тайланг тухайн жилийн 06 дугаар сарын 01-ний өдрийн дотор Засгийн газарт, Засгийн газар тайланг тухайн жилийн намрын чуулганы хугацаанд холбогдох Байнгын хороонд танилцуулна.

7.6.Төрийн өмчит компанийн талаар баримтлах өмчлөлийн бодлогын хэрэгжилтийн тайланг Засгийн газар бүрэн эрхийнхээ хугацаа дуусахаас хоёроос доошгүй сарын өмнө Улсын Их Хуралд танилцуулна.” гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 8
Бүгд: 20
60.0 хувийн саналаар дэмжигдлээ.

13.Ажлын хэсгийн гаргасан, Дээрх 10, 11 дэх санал дэмжигдсэнтэй холбогдуулан төслийн “үндсэн чиглэл” гэснийг “Төрийн өмчит компанийн талаар баримтлах өмчлөлийн бодлого” гэж агуулгад нь тохируулан тухай бүрд өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 7
Бүгд: 20
65.0 хувийн саналаар дэмжигдлээ.

14.Ажлын хэсгийн гаргасан, Төслийн 8 дугаар зүйлийн 8.1 дэх хэсгийг доор дурдсанаар бүхэлд нь өөрчлөн найруулах:

“8.1.Төрийн өмчит компанийг дараах үндэслэлээр үүсгэн байгуулна:

8.1.1. Нийтийн үйлчилгээний үүргийг хэрэгжүүлэх;

8.1.2.Үндэсний эдийн засгийн ашиг сонирхлыг хангах зорилгоор төрийн нийтийн өмчид хамаарах байгалийн баялгийг ашиглах;

8.1.3.Зүй ёсны монополь үйл ажиллагаа эрхлэх;

8.1.4. Үндэсний аюулгүй байдлыг хангахтай холбоотой батлан хамгаалах, хил хамгаалах, хууль сахиулах, шүүхийн шийдвэр гүйцэтгэх үйл ажиллагааг дэмжих, холбогдох аж ахуйн үйл ажиллагаа эрхлэх;

8.1.5.Харилцаа холбоо, банк, санхүүгийн салбарт үйлчилгээний хүртээмжийг нэмэгдүүлэх зорилгоор үйл ажиллагаа явуулах.” гэсэн саналыг дэмжье гэсэн санал хураалт явуулъя.

Дээрх саналтай холбогдуулан Улсын Их Хурлын гишүүн Г.Уянгахишиг үг хэлэв.

Зөвшөөрсөн: 14
Татгалзсан: 6
Бүгд: 20
70.0 хувийн саналаар дэмжигдлээ.

15.Ажлын хэсгийн гаргасан, Төслийн 8 дугаар зүйлийн 8.2 дахь хэсгийг хасаж, 8.3 дахь хэсэгт доор дурдсан агуулгатай 2 дахь өгүүлбэр нэмэх:

“Энэ хуулийн 8.1.2-т заасан үндэслэлээр орон нутгийн өмчит компанийг Улсын Их Хурлын зөвшөөрлөөр үүсгэн байгуулж болно.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 7
Бүгд: 20
65.0 хувийн саналаар дэмжигдлээ.

16.Ажлын хэсгийн гаргасан, Төслийн 9 дүгээр зүйлийн 9.4 дэх хэсгийн “мэдээлэлд” гэсний өмнө “судалгаа,” гэж, 9.4.1 дэх заалтад “шаардлага” гэсний дараа “буюу хувийн хэвшилтэй өрсөлдөхгүй байх гэсэн бодлоготой нийцэж байгаа эсэх” гэж тус тус нэмж, 9.4.5 дахь заалтын “хугацаа” гэснийг “хугацаатай байх эсэх” гэж, 9.5, 9.6 дахь хэсгийн “хувьцаа эзэмшигч” гэснийг “этгээд” гэж, 9.7 дахь хэсгийн “байгуулах” гэснийг “байгуулж болох” гэж, “заасны дагуу” гэснийг “заасан этгээд” гэж өөрчилж, доор дурдсан агуулгатай 9.8 дахь хэсэг нэмэх:

“9.8.Төрийн болон орон нутгийн өмчит компанийн үйл ажиллагаа явуулах хугацааг сунгах эсэх асуудлыг тухайн хугацаа дуусах оны өмнөх санхүүгийн жилд багтаан шийдвэрлэх бөгөөд үйл ажиллагаа явуулах хугацааг сунгахгүй гэж шийдвэрлэсэн тохиолдолд төрийн болон орон нутгийн эзэмшлийн хувьцаатай холбоотой асуудлыг Компанийн тухай хуульд заасан журмын дагуу шийдвэрлэнэ.” гэсэн саналыг дэмжье гэсэн санал хураалт явуулъя.

Зөвшөөрсөн: 14
Татгалзсан: 6
Бүгд: 20
70.0 хувийн саналаар дэмжигдлээ.

17.Ажлын хэсгийн гаргасан, Төслийн 10 дугаар зүйлийн 10.3 дахь хэсгийг доор дурдсанаар өөрчлөн найруулж, 10.4 дэх хэсгийн “орон нутгийн” гэсний дараа “өмч давамгайлсан компани, төрийн болон орон нутгийн өмчийн” гэж нэмэх:

“10.3.Төрийн болон орон нутгийн өмчит компанийн дүрэмд Компанийн тухай хуулийн 16.2-т зааснаас гадна компанийн үйл ажиллагааны зорилго, хүрэх үр дүн, хувьцаа эзэмшигч, хувьцаа эзэмшигчийн эрхийг хэрэгжүүлэгчийн талаарх мэдээлэл, ногдол ашгийн бодлого, эсхүл нийтийн үйлчилгээний үүргийн бодлогыг тодорхой тусгана.” гэсэн саналыг дэмжье гэсэн санал хураалт явуулъя.

Зөвшөөрсөн: 14
Татгалзсан: 6
Бүгд: 20
70.0 хувийн саналаар дэмжигдлээ.

18.Ажлын хэсгийн гаргасан, Төслийн 10 дугаар зүйлд доор дурдсан агуулгатай 10.6 дахь хэсэг нэмэх:

“10.6.Алтан хувьцаа гаргах тохиолдолд компанийн дүрэмд алтан хувьцаа эзэмших этгээд, эрхийн агуулга, хугацааг тусгана.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 7
Бүгд: 20
65.0 хувийн саналаар дэмжигдлээ.

19.Ажлын хэсгийн гаргасан, Төслийн 11 дүгээр зүйлд доор дурдсан агуулгатай 11.2, 11.3 дахь хэсэг нэмэх:

“11.2.Төрийн болон орон нутгийн өмчийн компани бусад этгээдтэй хамтран охин, хараат компани үүсгэн байгуулах асуудлыг энэ хуулийн 8.1-д заасан үндэслэлийн дагуу энэ хуулийн 9.4-т заасан судалгаа, шинжилгээ болон Засгийн газрын зөвшөөрлийн дагуу Компанийн тухай хуульд заасны дагуу шийдвэрлэнэ.

11.3.Энэ хуулийн 11.1, 11.2-т заасны дагуу үүсгэн байгуулсан охин, хараат компани дахь төрийн болон орон нутгийн эзэмшлийн хувьцааг толгой компани эзэмшинэ.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 7
Бүгд: 20
65.0 хувийн саналаар дэмжигдлээ.

20.Ажлын хэсгийн гаргасан, Төслийн 13 дугаар зүйлийн 13.1 дэх хэсгийн “худалдах” гэснийг “шилжүүлэх” гэж, 13.2 дахь хэсэг, 13.4 дэх хэсгийн “гүйцэтгэх захирлын” гэснийг “гүйцэтгэх удирдлагын” гэж өөрчилж, мөн зүйлийн 13.2.2 дахь заалтыг доор дурдсанаар өөрчлөн найруулж, доор дурдсан агуулгатай 13.2.6, 13.2.7 дахь заалт тус тус нэмэх:

“13.2.2.алтан хувьцаа эзэмшигчийн эрхийг хязгаарласан, хугацааг багасгасан өөрчлөлтийг компанийн дүрэмд оруулах;”

“13.2.6.компанийн хувьцааны хяналтын багцтай хэмжээгээрээ дүйцэхүйц хувьцаа болон хувьцаанд хамаарах бусад үнэт цаасыг нэг болон хэд хэдэн удаагийн дараалсан шийдвэрээр нэмж гаргах;

13.2.7.талууд харилцан тохиролцож, компанийн дүрэмд заасан бусад.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 7
Бүгд: 20
65.0 хувийн саналаар дэмжигдлээ.

21.Ажлын хэсгийн гаргасан, Дээрх 19 дэх санал дэмжигдсэнтэй холбогдуулан төслийн “гүйцэтгэх захирал” гэснийг “гүйцэтгэх удирдлага” гэж агуулгад нь тохируулан тухай бүрд өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 7
Бүгд: 20
65.0 хувийн саналаар дэмжигдлээ.

22.Ажлын хэсгийн гаргасан, Төслийн 13 дугаар зүйлийн 13.5 дахь хэсгийн “үндэслэлээ” гэснийг “үндэслэл, хоригийн хамрах хүрээг” гэж, 13.8 дахь хэсгийн “заасан” гэснийг “заасны дагуу компанийн дүрэмд тусгасан” гэж өөрчилж, “дахин” гэснийг, 13.6 дахь хэсгийг тус тус хасаж, мөн зүйлд доор дурдсан агуулгатай 13.9 дэх хэсэг нэмэх:

“13.9.Засгийн газар хориг тавих шийдвэр гаргахдаа зорилгодоо нийцсэн байх, компанийн үйл ажиллагаанд хамгийн бага хязгаарлалт тогтоох зарчмыг баримтална.” гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 8
Бүгд: 20
60.0 хувийн саналаар дэмжигдлээ.

23.Ажлын хэсгийн гаргасан, Төслийн 14 дүгээр зүйлийн 14.4 дэх хэсгийн “заасан журмын дагуу” гэснийг “өөрөөр заагаагүй бол” гэж, 14.7 дахь хэсгийн “34-өөс доош” гэснийг “34 хүртэлх” гэж өөрчилж, 14.3 дахь хэсгийг доор дурдсанаар өөрчлөн найруулах:

“14.3.Энэ хуулийн 14.2-т заасны дагуу компанийн энгийн хувьцааны гуравны нэгээс доош хувийг олж авсан бол төр, эсхүл орон нутаг тухайн хувьцааны зах зээлийн үнэ болон бодит үнэ цэнийг тооцон, аль өндөр үнээр тухайн хувьцааг худалдана.” гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 8
Бүгд: 20
60.0 хувийн саналаар дэмжигдлээ.

24.Ажлын хэсгийн гаргасан, Төслийн 15 дугаар зүйлийн гарчгийн, мөн зүйлийн 15.1 дэх хэсгийн “үнэт цаас” гэснийг “өрийн хэрэгсэл” гэж, мөн зүйлийн 15.4 дэх хэсгийн “зөвлөлд” гэсний дараа “/байхгүй бол хувьцаа эзэмшигчийн эрхийг хэрэгжүүлэгчид/” гэж нэмж, мөн зүйлд доор дурдсан агуулгатай 15.5, 15.6, 15.7 дахь хэсэг нэмэх:

“15.5.Төрийн болон орон нутгийн өмчийн компани, төрийн болон орон нутгийн өмч давамгайлсан компани зээл авах, өрийн хэрэгсэл гаргах, баталгаа гаргуулах, санхүүгийн түрээс болон түүнтэй адилтгах үүрэг хүлээхдээ өрийн тогтвортой байдлын дүгнэлтийг хараат бус, мэргэжлийн этгээдээр гаргуулсан байна.

15.6.Энэ хуулийн 15.5-д заасан дүгнэлтэд өрийн нийт хэмжээ, өр ба өөрийн хөрөнгийн харьцаа, мөнгөн урсгал, валютын эрсдэл, хүүгийн эрсдэл, төсвийн болзошгүй өр төлбөр, төрийн баталгааны нөлөөллийг тусгана.

15.7.Төрийн болон орон нутгийн өмчийн компани, төрийн болон орон нутгийн өмч давамгайлсан компани бусад этгээдэд өрийн баталгаа гаргахыг хориглоно.” гэсэн саналыг дэмжье гэсэн санал хураалт явуулъя.

Зөвшөөрсөн: 13

Татгалзсан: 7
Бүгд: 20
65.0 хувийн саналаар дэмжигдлээ.

25.Ажлын хэсгийн гаргасан, Төслийн 16 дугаар зүйлийг доор дурдсанаар бүхэлд нь өөрчлөн найруулах:

“16 дугаар зүйл.Ногдол ашгийн бодлого

16.1.Төрийн болон орон нутгийн өмчийн компани, төрийн болон орон нутгийн өмч давамгайлсан компани ногдол ашиг хуваарилахдаа Компанийн тухай хуулийн 46, 47 дугаар зүйлд зааснаас гадна дараах зарчим, шаардлагыг баримтална:

16.1.1.ногдол ашгийг өмнөх оны аудитлагдсан санхүүгийн тайланд туссан татвар төлсний дараах хуваарилж болох цэвэр ашгаас тооцох;

16.1.2.компанийн төлбөрийн чадвар, мөнгөн урсгал, батлагдсан бизнес болон хөрөнгө оруулалтын төлөвлөгөө, их засварын хэрэгцээ, нөөц сан бүрдүүлэх шаардлага, санхүүгийн тогтвортой байдлыг харгалзан үзэх;

16.1.3.нийтийн үйлчилгээний үүрэг хүлээсэн бол тухайн үүргийн санхүүжилт, нөхөн төлбөр, татаас, тарифын зохицуулалтыг ногдол ашиг тооцох сууринаас тусад нь авч үзэх;

16.1.4.компанийн урт хугацааны үнэ цэн, хэвийн үйл ажиллагаа, хөрөнгө оруулалтын чадавхыг дордуулахгүй байх.

16.2.Арилжааны зорилготой төрийн болон орон нутгийн өмчийн компани, төрийн болон орон нутгийн өмч давамгайлсан компани нь тухайн санхүүгийн жилд хуваарилж болох цэвэр ашигтай ажилласан бол ногдол ашиг хуваарилах үүрэгтэй.

16.3.Энэ хуулийн 16.2-т заасан компанийн тухайн жилд хуваарилах ногдол ашгийн зорилтот хувь хэмжээг Засгийн газар, орон нутгийн өмчит компанийн хувьд тухайн шатны иргэдийн Төлөөлөгчдийн Хурал жил бүрийн төсвийн төсөл боловсруулах үе шатанд компанийн ангилал, салбарын онцлог, хөрөнгө оруулалтын хэрэгцээ, өр төлбөрийн түвшин, мөнгөн урсгал, өөрийн хөрөнгийн өгөөж, нөөц сангийн шаардлагыг харгалзан тогтооно.

16.4.Энэ хуулийн 16.3-т заасан зорилтот хувь хэмжээ нь арилжааны зорилготой компанийн хувьд хуваарилж болох цэвэр ашгийн 30 хувиас доошгүй байх зарчмыг баримтална. Харин компанийн санхүүгийн байдал, хөрөнгө оруулалтын хэрэгцээ, эсхүл энэ хуулийн 16.6-д заасан үндэслэл байгаа бол уг хувь хэмжээг бууруулж болно.

16.5.Нийтийн үйлчилгээний төрийн болон орон нутгийн өмчит компанид энэ хуулийн 16.4-т заасан доод хувь хэмжээ хамаарахгүй. Компани нь цэвэр ашигтай ажилласан тохиолдолд төлбөрийн чадвар, мөнгөн урсгал, нийтийн үйлчилгээний үүргийн санхүүжилт, үйлчилгээний хүртээмж, чанар, тасралтгүй байдлыг харгалзан ногдол ашиг хуваарилж болно.

16.6. Дараах үндэслэл байгаа бол энэ хуулийн 16.3, 16.4-т заасан зорилтот буюу доод хувь хэмжээнээс бага хэмжээгээр ногдол ашиг хуваарилж болно:

16.6.1.ногдол ашиг хуваарилснаар Компанийн тухай хуульд заасан төлбөрийн чадварын шаардлага хангагдахгүй болох;

16.6.2.компанийн мөнгөн урсгал, өр төлбөрийн үйлчилгээ, зээлийн гэрээний үүрэг, өрийн тогтвортой байдлын шалгуурт шууд эрсдэл үүсэх;

16.6.3.батлагдсан бизнес, хөрөнгө оруулалт, их засвар, техник технологийн шинэчлэлийн төлөвлөгөөг хэрэгжүүлэхэд цэвэр ашгийг дахин хөрөнгө оруулалтад ашиглах зайлшгүй шаардлага үүссэн;

16.6.4.энэ хуульд заасан нөөц сан, эсхүл тусгай зориулалтын нөөц бүрдүүлэх шаардлагатай;

16.6.5.нийтийн үйлчилгээний буюу арилжааны бус тусгай үүргийг хэрэгжүүлэхэд шаардлагатай санхүүжилт, эх үүсвэрийг хадгалах шаардлагатай;

16.6.6.тухайн компанид хуримтлагдсан алдагдал байгаа бөгөөд уг алдагдлыг нөхөх шаардлагатай;

16.6.7.онцгой нөхцөл байдал, давагдашгүй хүчин зүйл, зах зээлийн огцом өөрчлөлт, салбарын системийн эрсдэлийн улмаас компанийн санхүүгийн тогтвортой байдалд сөрөг нөлөө үүсэхээр байгаа.

16.7.Энэ хуулийн 16.6-д заасан үндэслэлээр ногдол ашгийг зорилтот хувь хэмжээнээс бага тогтоох саналыг төлөөлөн удирдах зөвлөл гаргана. Саналд дараах баримт бичгийг хавсаргана:

16.7.1.аудитлагдсан санхүүгийн тайлан;

16.7.2.төлбөрийн чадварын болон мөнгөн урсгалын дүгнэлт;

16.7.3.дараагийн гурваас доошгүй жилийн стратеги төлөвлөгөө;

16.7.4.хөрөнгө оруулалт, их засварын тооцоолол;

16.7.5.нийтийн үйлчилгээний үүрэг хүлээсэн бол уг үүргийн өртөг, санхүүжилт, нөхөн төлбөрийн тооцоо;

16.7.6.ногдол ашиг бууруулах үндэслэл, эрсдэлийн үнэлгээ.

16.8.Энэ хуулийн 16.7-д заасан саналыг хувьцаа эзэмшигчийн эрхийг хэрэгжүүлэгч хянаж, зөвшөөрөх, өөрчлөх, эсхүл татгалзах тухай үндэслэл бүхий шийдвэр гаргана.

16.9.Төрийн болон орон нутгийн өмчийн оролцоотой компанийн хувьд төр, орон нутгийн эзэмшлийн хувьцаа эзэмшигчийн эрхийг хэрэгжүүлэгч нь энэ зүйлд заасан ногдол ашгийн бодлого, зорилтот хувь хэмжээ, санхүүгийн тогтвортой байдлын шалгуурыг баримтлан хувьцаа эзэмшигчдийн хурал, төлөөлөн удирдах зөвлөлд санал өгөх чиглэл баримтална.

16.10.Төрийн өмчийн асуудал эрхэлсэн төрийн захиргааны байгууллага нь төрийн өмчит компанийн ногдол ашгийн бодлогын хэрэгжилт, хуваарилсан болон хуваарилаагүй ашгийн хэмжээ, бууруулсан үндэслэл, дахин хөрөнгө оруулалтад ашигласан хөрөнгийн үр дүнгийн талаарх нэгдсэн тайланг жил бүр Засгийн газарт танилцуулж, олон нийтэд мэдээлнэ.” гэсэн саналыг дэмжье гэсэн санал хураалт явуулъя.

Улсын Их Хурлын гишүүн П.Сайнзориг үг хэлж, дээрх саналаа татаж авсан тул санал хураалт явуулаагүй болно.

26.Ажлын хэсгийн гаргасан, Төслийн 18 дугаар зүйлийн 18.1.5 дахь заалтын “компанийн” гэсний дараа “газар,” гэж нэмэх гэсэн саналыг дэмжье гэсэн санал хураалт явуулъя.

Дээрх саналтай холбогдуулан Улсын Их Хурлын гишүүн Б.Жаргалан үг хэлэв.

Зөвшөөрсөн: 9
Татгалзсан: 11
Бүгд: 20
45.0 хувийн саналаар дэмжигдсэнгүй.

Улсын Их Хурлын гишүүн С.Эрдэнэбатын “дэмжсэн” санал техникийн саатлын улмаас “эсрэг” гарсан тул дээрх санал хураалтыг хүчингүй болгож, дахин санал хураалт явуулах горимын санал гаргав.

Д.Үүрийнтуяа: Улсын Их Хурлын гишүүн С.Эрдэнэбатын гаргасан горимын саналыг дэмжье гэсэн санал хураалт явуулъя.

Зөвшөөрсөн: 11
Татгалзсан: 9
Бүгд: 20
55.0 хувийн саналаар горимын санал дэмжигдлээ.

Горимын санал дэмжигдсэн тул дээрх санал хураалтыг дахин явуулъя.

Зөвшөөрсөн: 10
Татгалзсан: 10
Бүгд: 20
50.0 хувийн саналаар дэмжигдсэнгүй.

Улсын Их Хурлын гишүүн Г.Уянгахишигийн “дэмжсэн” санал техникийн саатлын улмаас “эсрэг” гарсан тул дээрх санал хураалтыг хүчингүй болгож, дахин санал хураалт явуулах горимын санал гаргав.

Д.Үүрийнтуяа: Улсын Их Хурлын гишүүн Г.Уянгахишигийн гаргасан горимын саналыг дэмжье гэсэн санал хураалт явуулъя.

Зөвшөөрсөн: 11
Татгалзсан: 9
Бүгд: 20

55.0 хувийн саналаар горимын санал дэмжигдлээ.

Горимын санал дэмжигдсэн тул дээрх санал хураалтыг дахин явуулъя.

Зөвшөөрсөн: 11

Татгалзсан: 9

Бүгд: 20

55.0 хувийн саналаар дэмжигдлээ.

27.Ажлын хэсгийн гаргасан, Төслийн 20 дугаар зүйлийн 20.1.3 дахь заалтын “санал гаргах” гэснийг “саналын эрхийг хэрэгжүүлэх” гэж өөрчилж, 20.1.5 дахь заалтын “тохиолдолд” гэсний дараа “компанийн дүрэм болон гэрээнд заасан” гэж нэмж, 20.1.4 дэх заалтыг доор дурдсанаар өөрчлөн найруулах:

“20.1.4.төрийн болон орон нутгийн өмчийн компанийн төлөөлөн удирдах зөвлөлийн гишүүн, гүйцэтгэх удирдлага хууль болон компанийн дүрэмд заасан үүргээ зөрчсөн тохиолдолд дүрэм болон гэрээнд заасан хариуцлага хүлээлгэх, компанид хохирол учруулсан бол хохирлыг нөхөн төлөхийг шаардах, шүүхэд төлөөлөн нэхэмжлэл гаргах;” гэсэн саналыг дэмжье гэсэн санал хураалт явуулъя.

Дээрх саналтай холбогдуулан Улсын Их Хурлын гишүүн Б.Мөнхсоёл үг хэлэв.

Зөвшөөрсөн: 11

Татгалзсан: 10

Бүгд: 21

52.4 хувийн саналаар дэмжигдлээ.

28.Ажлын хэсгийн гаргасан, Төслийн 22 дугаар зүйлийн 22.2, 22.3 дахь хэсгийг доор дурдсанаар өөрчлөн найруулах:

“22.2.Хувьцаа эзэмшигчдийн хурлын бүрэн эрхийг энэ хуулийн 17.2, 17.5-д заасан этгээд төрийн болон орон нутгийн өмчийн компанийн хувьд дангаараа, төрийн болон орон нутгийн өмч давамгайлсан, эсхүл тэдгээрийн оролцоотой компанийн хувьд бусад этгээдтэй хамтран хэрэгжүүлнэ.

22.3.Компанийн дүрэмд өөрөөр заагаагүй бол төрийн болон орон нутгийн өмчит компанийн нэгдлийн хараат, охин компанийн хувьцаа эзэмшигчдийн хурлын бүрэн эрхийг толгой компанийн гүйцэтгэх удирдлага хэрэгжүүлнэ.” гэсэн саналыг дэмжье гэсэн санал хураалт явуулъя.

Зөвшөөрсөн: 11

Татгалзсан: 10

Бүгд: 21

52.4 хувийн саналаар дэмжигдлээ.

29.Ажлын хэсгийн гаргасан, Төслийн 24 дүгээр зүйлийн 24.1.1 дэх заалтын “авлигын,” гэсний дараа “нийтийн албаны ашиг сонирхлын,” гэж нэмж, 24.1.2 дахь заалтын “тухайн салбарт таваас доошгүй жил удирдах албан тушаалд” гэснийг “төрийн өмчит компанийн хувьд удирдах албан тушаалд таваас доошгүй, орон нутгийн өмчит компанийн хувьд удирдах албан тушаалд хоёроос доошгүй жил”

гэж, “хууль” гэснийг “эрх зүй” гэж өөрчилж, 24.1.6.а. заалтын “өөрөө” гэснийг “дангаараа” гэж өөрчилж, “дангаараа болон” гэснийг хасаж, 24.6 дахь хэсгийн “гуравны нэгээс доошгүй” гэснийг “олонх” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 11

Татгалзсан: 10

Бүгд: 21

52.4 хувийн саналаар дэмжигдлээ.

30.Ажлын хэсгийн гаргасан, Төслийн 24 дүгээр зүйлийн 24.4, 24.5 дахь хэсгийг доор дурдсанаар өөрчлөн найруулах:

“24.4.Арилжааны зорилго бүхий төрийн болон орон нутгийн өмчит компанийн төлөөлөн удирдах зөвлөл нь сондгой тооны таваас ес хүртэлх гишүүнтэй байна.

24.5.Энэ хуулийн 24.4-т заасан төлөөлөн удирдах зөвлөлийн бүрэлдэхүүний нэг гишүүн нь хувьцаа эзэмшигчийн эрхийг хэрэгжүүлэгчээс томилсон этгээд байна.” гэсэн саналыг дэмжье гэсэн санал хураалт явуулъя.

Зөвшөөрсөн: 11

Татгалзсан: 10

Бүгд: 21

52.4 хувийн саналаар дэмжигдлээ.

31.Ажлын хэсгийн гаргасан, Төслийн 24 дүгээр зүйлийн 24.7 дахь хэсгийн “нийтийн зориулалттай дэд бүтэц,” гэснийг хасаж, “таваас илүүгүй сондгой тооны” гэснийг “таван” гэж, “хоёр хүртэлх гишүүн нь төрийн захиргааны албан хаагч, хоёроос доошгүй нь мэргэжлийн хараат бус гишүүн байж болно” гэснийг “гуравны нэгээс доошгүй нь хараат бус гишүүн байна” гэж, 24.8 дахь хэсгийн “хувьцаа эзэмшигчийн эрхийг хэрэгжүүлэгчээс томилсон этгээд байна.” гэснийг “энэ хуулийн 28 дугаар зүйлд заасны дагуу сонгон шалгаруулалтын үндсэн дээр томилогдсон этгээд байна.” гэж тус тус өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 11

Татгалзсан: 10

Бүгд: 21

52.4 хувийн саналаар дэмжигдлээ.

32.Ажлын хэсгийн гаргасан, Төслийн 27 дугаар зүйлийн гарчгийн “гишүүнд нэр дэвшигчээс” гэснийг “сонгон шалгаруулалтад оролцогчоос” гэж, мөн зүйлийн 27.1 дэх хэсгийн “гишүүнд нэр дэвшигчийг” гэснийг “гишүүнийг” гэж, 27.2 дахь хэсгийн “нэр дэвших” гэснийг “сонгон шалгаруулалтад оролцох” гэж, 27.2.3 дахь заалтын “нэр дэвшигч” гэснийг “сонгон шалгаруулалтад оролцогч” гэж тус тус өөрчилж, 27.3 дахь хэсгийг хасах гэсэн саналыг дэмжье гэсэн санал хураалт явуулъя.

Зөвшөөрсөн: 12

Татгалзсан: 9

Бүгд: 21

57.1 хувийн саналаар дэмжигдлээ.

33.Ажлын хэсгийн гаргасан, Төслийн 28 дугаар зүйлийн 28.2 дахь хэсгийн “хувьд” гэсний дараа “хувьцаа эзэмшигчийн эрхийг хэрэгжүүлэгч нь” гэж нэмж, 28.5 дахь хэсгийн “компани болон хувьцаа эзэмшигчид” гэснийг “компанид” гэж өөрчилж, 28.7 дахь хэсгийн “гурван” гэснийг “хоёр” гэж өөрчилж, “нэг удаа” гэсний дараа “хоёр жил хүртэл хугацаагаар” гэж нэмж, 28.8 дахь хэсгийн “тушаалаар” гэснийг “тушаалын байдлаар” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 12

Татгалзсан: 9

Бүгд: 21

57.1 хувийн саналаар дэмжигдлээ.

34.Ажлын хэсгийн гаргасан, Төслийн 29 дүгээр зүйлийн 29.1.2 дахь заалтын “заавал оролцож” гэснийг “биечлэн, эсхүл зайнаас оролцох” гэж, 29.1.6 дахь заалтын “түүний хамаарал бүхий этгээд” гэснийг “нэгдмэл сонирхолтой этгээд нь” гэж өөрчилж, 29.1.8 дахь заалтыг хасах гэсэн саналыг дэмжье гэсэн санал хураалт явуулъя.

Зөвшөөрсөн: 10

Татгалзсан: 11

Бүгд: 21

47.6 хувийн саналаар дэмжигдсэнгүй.

Улсын Их Хурлын гишүүн Б.Пунсалмаагийн “дэмжсэн” санал техникийн саатлын улмаас “эсрэг” гарсан тул дээрх санал хураалтыг хүчингүй болгож, дахин санал хураалт явуулах горимын санал гаргав.

Зөвшөөрсөн: 10

Татгалзсан: 11

Бүгд: 21

47.6 хувийн саналаар горимын санал дэмжигдсэнгүй.

Улсын Их Хурлын гишүүн П.Батчимэгийн “дэмжсэн” санал техникийн саатлын улмаас “эсрэг” гарсан тул дээрх санал хураалтыг хүчингүй болгож, дахин санал хураалт явуулах горимын санал гаргав.

Зөвшөөрсөн: 12

Татгалзсан: 9

Бүгд: 21

57.1 хувийн саналаар горимын санал дэмжигдлээ.

Горимын санал дэмжигдсэн тул дээрх санал хураалтыг дахин явуулъя.

Зөвшөөрсөн: 12

Татгалзсан: 9

Бүгд: 21

57.1 хувийн саналаар дэмжигдлээ.

35.Ажлын хэсгийн гаргасан, Төслийн 29 дүгээр зүйлийн 29.2 дахь хэсгийг доор дурдсанаар өөрчлөн найруулах:

“29.2.Төрийн болон орон нутгийн өмчийн компанийн төлөөлөн удирдах зөвлөлийн хурлын ирц гишүүдийн дийлэнх олонх оролцсоноор хүчинтэй болно. Төлөөлөн удирдах зөвлөлийн шийдвэр нийт гишүүдийн олонхын саналаар хүчин төгөлдөр болно.” гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

36.Ажлын хэсгийн гаргасан, Төслийн 29 дүгээр зүйлийн 29.3 дахь хэсгийн “жагсаалт,” гэсний дараа “холбогдох материалыг” гэж нэмж, “доошгүй” гэснийг “дээшгүй” гэж өөрчилж, 29.4 дэх хэсгийн “дарга,” гэсний дараа “эсхүл гишүүн” гэж нэмэх гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

37.Ажлын хэсгийн гаргасан, Төслийн 29 дүгээр зүйлийн 29.6 дахь хэсгийг доор дурдсанаар өөрчлөн найруулах:

“29.6.Хувьцаа эзэмшигчийн эрхийг хэрэгжүүлэгч нь төлөөлөн удирдах зөвлөлийн гишүүний санал өгөх, бүрэн эрхээ хэрэгжүүлэхэд удирдамж, чиглэл өгөхийг хориглоно.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

38.Ажлын хэсгийн гаргасан, Дээрх 36 дахь санал дэмжигдсэнтэй холбогдуулан төслийн 29 дүгээр зүйлд доор дурдсан агуулгатай 29.7 дахь хэсэг нэмэх:

“29.7.Төлөөлөн удирдах зөвлөлийн гишүүн нь аливаа чиглэл, санал, зөвлөмжийг биелүүлсэн нь энэ хууль болон Компанийн тухай хуульд заасан хариуцлагаас чөлөөлөх үндэслэл болохгүй.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

39.Ажлын хэсгийн гаргасан, Төслийн 30 дугаар зүйлийн 30.1 дэх хэсгийн “урамшуулал авч болно” гэснийг “урамшуулалтай байна” гэж, 30.2 дахь хэсгийн “эзэмшигчдийн хурлаас” гэснийг “эзэмшигчийн эрхийг хэрэгжүүлэгч” гэж, 30.8 дахь

хэсгийн “өмчит” гэснийг “өмчийн” гэж, “гишүүний ажлын гүйцэтгэлийн үр дүнг үнэлж,” гэснийг “гишүүнд” гэж тус тус өөрчилж, 30.2.2 дахь заалтын “төрийн өмчийн асуудал эрхэлсэн төрийн захиргааны байгууллагын санал болон” гэснийг хасаж, “харгалзан” гэснийг “баримтлан” гэж өөрчилж, 30.2.1 дэх заалтыг доор дурдсанаар өөрчлөн найруулах:

“30.2.1.нийтийн үйлчилгээний төрийн болон орон нутгийн өмчийн компанийн хувьд төлөөлөн удирдах зөвлөлийн гишүүний цалин, урамшууллын хэмжээг тухайн компанийн гүйцэтгэх удирдлагын албан тушаалтны цалингийн жишгийг харгалзан төрийн өмчийн асуудал эрхэлсэн төрийн захиргааны байгууллагын саналаар;” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

40.Ажлын хэсгийн гаргасан, Төслийн 32 дугаар зүйлийн 32.1.2 дахь заалтын “хууль” гэснийг “эрх зүй” гэж өөрчилж, мөн зүйлийн 32.4 дэх хэсгийг хасах гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

41.Ажлын хэсгийн гаргасан, Төслийн 33 дугаар зүйлийн 33.1 дэх хэсгийн “нэг” гэснийг “гурав хүртэлх” гэж өөрчилж, “хугацаатай” гэсний дараа “даалгаврын” гэж нэмж, 33.3 дахь хэсгийн “Хөдөлмөрийн тухай хуулийн 72.1-д заасны дагуу” гэснийг хасаж, “үүрэг” гэсний өмнө “нууц хадгалах” гэж нэмэх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

42.Ажлын хэсгийн гаргасан, Төслийн 34 дүгээр зүйлийн 34.1.1 дэх заалтын “хувьцаа, өөрийн хөрөнгийг урт хугацаанд” гэснийг “ашигт ажиллагааг” гэж, 34.1.8 дахь заалтын “заасан үйл ажиллагаанд үл хамаарах зардлыг” гэснийг “зааснаас бусад үйл ажиллагааг” гэж тус тус өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

43.Ажлын хэсгийн гаргасан, Төслийн 36 дугаар зүйлийн 36.1.1, 36.1.2, 36.1.13 дахь заалтын “3” гэснийг “хоёр” гэж, 36.1.3 дахь заалтын “өргөдөл” гэснийг “хүсэлт” гэж тус тус өөрчилж, 36.1.4 дэх заалтын “ноцтой” гэсний өмнө “эсхүл” гэж нэмж, 36.5 дахь хэсгийн “нийтийн зориулалттай дэд бүтэц, нийтийн үйлчилгээг

хангах зайлшгүй шаардлагатай, эсхүл зүй ёсны монополь үйл ажиллагаа эрхэлдэг” гэснийг “нийтийн үйлчилгээний” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

44.Ажлын хэсгийн гаргасан, Төслийн 37 дугаар зүйлийн 37.4, 37.5 дахь хэсгийг хасаж, 37.6 дахь хэсгийн “өмчит” гэснийг “өмчийн” гэж, “жагсаалт болон аудит хийх хуулийн этгээдийг сонгон шалгаруулах этгээдийг Засгийн газар тогтооно” гэснийг “жагсаалтыг Засгийн газар батална” гэж өөрчилж, мөн хэсгийн “этгээдээр” гэсний дараа “санхүүгийн” гэж нэмэх гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

45.Ажлын хэсгийн гаргасан, Төслийн 37 дугаар зүйлийн 37.9 дэх хэсгийн “бүтцэд хамаарах тодорхой тооны” гэснийг “дотоод” гэж өөрчилж, 37.10 дахь хэсгийн “ээлжит бус” гэсний дараа “дотоод” гэж нэмж, 37.12 дахь хэсгийн “нэгжгүй байж болох бөгөөд” гэснийг “нэгж байгуулахгүйгээр” гэж, “ажиллана” гэснийг “ажиллуулна” гэж тус тус өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

46.Ажлын хэсгийн гаргасан, Төслийн 37 дугаар зүйлийн 37.7 дахь хэсгийн “гурван үзүүлэлтийн хоёроос доошгүйг” гэснийг “нөхцөлийг” гэж өөрчилж, 37.8 дахь хэсгийн “хувьцаа эзэмшигчийн эрхийг хэрэгжүүлэгчийн зөвшөөрлөөр” гэснийг, 37.7.3 дахь заалтыг тус тус хасах гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

47.Ажлын хэсгийн гаргасан, Төслийн 38 дугаар зүйлийн 38.1.5 дахь заалтын “зөв,” гэсний дараа “, бүрэн” гэж нэмж, 38.1.7 дахь заалтын “гүйцэтгэлийн” гэснийг хасах гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

48.Ажлын хэсгийн гаргасан, Төслийн 39 дүгээр зүйлийн 39.1 дэх хэсгийн “хянуулахаар” гэснийг “батлуулахаар” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

49.Ажлын хэсгийн гаргасан, Төслийн 40 дүгээр зүйлийн 40.4 дэх хэсгийн “үнэлгээний” гэсний өмнө “арилжааны зорилго бүхий төрийн болон орон нутгийн өмчийн компанийн гүйцэтгэлийн” гэж, 40.4.2 дахь заалтын “байгуулалт,” гэсний дараа “засаглал, эрсдэлийн удирдлага” гэж нэмэх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

50.Ажлын хэсгийн гаргасан, Төслийн 40 дүгээр зүйлд доор дурдсан агуулгатай 40.5 дахь хэсэг нэмэх:

“40.5.Энэ хуулийн 40.3-т заасан нийтийн үйлчилгээний компанийн гүйцэтгэлийн үнэлгээний шалгуурт дараах асуудлыг хамааруулна:

40.5.1.компанийн бизнес төлөвлөгөөний хэрэгжилтийн түвшин болон нийтийн үйлчилгээний үүргийн биелэлт;

40.5.2.компанийн бүтэц, зохион байгуулалт, засаглал, эрсдэлийн удирдлага, хүний нөөцийн зохистой менежмент;

40.5.3.санхүүгийн менежмент, төсвийн хэмнэлт, хэтрэлт, төсөв, татаасын ашиглалт, нэгж үйлчилгээний өртөг, зардлын үр ашиг;

40.5.4.үйлчилгээний чанар, хүртээмж;

40.5.5.ашиглаж байгаа үндсэн хөрөнгө, дэд бүтцийн найдвартай ажиллагаа;

40.5.6.мэдээллийн ил тод байдал.” гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

51.Ажлын хэсгийн гаргасан, Төслийн 40 дүгээр зүйлийн 40.9 дэх хэсгийн “3 жил” гэснийг “2 жил” гэж өөрчилж, мөн зүйлд доор дурдсан агуулгатай 40.10, 40.11 дэх хэсэг, Тайлбар хэсэг нэмэх:

“40.10.Эрх бүхий байгууллагын шийдвэрээр нийтийн ашиг сонирхлын зорилгоор үнэ, тарифыг өртгөөс доогуур тогтоосон, эсхүл нийтийн үйлчилгээний үүргийн хүрээнд компанид нэмэлт санхүүгийн үүрэг хүлээлгэснээс үүссэн орлогын зөрүү, алдагдлыг компанийн үйл ажиллагааны үр ашиггүй байдалд тооцохгүй бөгөөд гүйцэтгэлийн үнэлгээнд нотлох баримтад үндэслэн залруулж тусгана.

40.11.Төлөөлөн удирдах зөвлөл нь энэ хуулийн 40.3-т заасан журамд нийцүүлэн компанийн тэнцвэржүүлсэн гүйцэтгэлийн үнэлгээний аргачлалыг баталж, хэрэгжилтэд хяналт тавина. Уг аргачлалд энэ хуулийн 40.4, 40.5-д заасан болон тухайн компанийн үйл ажиллагааны онцлогт нийцсэн бусад үзүүлэлтийг уялдуулан үнэлэх, тайлагнах, бизнес төлөвлөгөө боловсруулах, гүйцэтгэлийн зорилт, арга хэмжээг тодорхойлох зохицуулалтыг тусгана.

Тайлбар: -Энэ хуулийн “Тэнцвэржүүлсэн гүйцэтгэлийн үнэлгээний аргачлал” гэж төрийн болон орон нутгийн өмчит компанийн стратеги, бизнес төлөвлөгөөний хэрэгжилтийг санхүүгийн үр дүн, нийгэм, эдийн засагт үзүүлэх үр нөлөө, хэрэглэгчийн сэтгэл ханамж, үйлчилгээний чанар, үйл ажиллагааны үр ашиг, байгууллагын чадавх, хүний нөөцийн хөгжлийн үзүүлэлтээр тэнцвэртэй хэмжиж, үнэлэх, тайлагнах арга зүйн зохицуулалтыг ойлгоно.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

52.Ажлын хэсгийн гаргасан, Төслийн 41 дүгээр зүйлийн 41.3 дахь хэсгийн “ажлыг” гэснийг “ажил үүргийг” гэж, 41.4 дэх хэсгийн “03 дугаар сарын 01-ний” гэснийг “05 дугаар сарын 15-ны” гэж тус тус өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

53.Ажлын хэсгийн гаргасан, Төслийн Наймдугаар бүлгийн гарчгийг “Нэмэлт хувьцаа гаргах, төрийн эзэмшлийн хувьцааг шилжүүлэх, компанийг өөрчлөн байгуулах, татан буулгах” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

54.Ажлын хэсгийн гаргасан, Төслийн 44 дүгээр зүйлийн дугаарыг 43 болгож, доор дурдсанаар өөрчлөн найруулах:

43 дугаар зүйл.Нэмэлт хувьцаа гаргах, төрийн эзэмшлийн хувьцааг шилжүүлэх, худалдах, үнэт цаасны зах зээлд санал болгох

“43.1.Төрийн болон орон нутгийн өмчит компани энэ хууль, Компанийн тухай хууль, Үнэт цаасны зах зээлийн тухай хууль болон холбогдох бусад хуульд нийцүүлэн дараах хэлбэрээр хувьцаа, үнэт цаасыг үнэт цаасны зах зээлд санал болгож болно:

43.1.1.нэмэлт хувьцаа гаргаж, анхдагч зах зээлд нийтэд санал болгох;

43.1.2.төр, орон нутгийн эзэмшлийн хувьцааг хоёрдогч зах зээлд санал болгох, эсхүл хуульд заасан бусад хэлбэрээр худалдах;

43.1.3.нэмэлт хувьцаа гаргах болон төр, орон нутгийн эзэмшлийн хувьцааг худалдах ажиллагааг хослуулан хэрэгжүүлэх;

43.1.4.дотоодын болон олон улсын үнэт цаасны зах зээлд давхар бүртгэл хийх, хадгаламжийн бичиг болон хувьцаанд хамаарах үнэт цаас гаргах.

43.2.Энэ хуулийн 43.1-д заасан шийдвэрийг төрийн өмчийн компанийн хувьд Засгийн газар, орон нутгийн өмчийн компанийн хувьд тухайн шатны иргэдийн Төлөөлөгчдийн Хурал гаргана. Стратегийн ач холбогдол бүхий салбарт үйл ажиллагаа явуулж байгаа төрийн өмчит компанийн хувьцааг нийтэд нээлттэй, эсхүл хаалттай хүрээнд санал болгох, төрийн эзэмшлийн хувьцааг худалдах асуудлыг Засгийн газар Улсын Их Хуралд танилцуулж, хуульд заасан бол Улсын Их Хурлын зөвшөөрлийг авна.

43.3.Төрийн болон орон нутгийн өмчит компанийн хувьцаа, түүнд хамаарах үнэт цаасыг санал болгох ажиллагааг дараах зорилгоор хэрэгжүүлнэ:

43.3.1.компанийн үйлдвэрлэл, үйл ажиллагааг өргөжүүлэх, техник, технологийг шинэчлэл хийх, өрсөлдөх чадвар, санхүүгийн тогтвортой байдлыг дээшлүүлэх;

43.3.2.компанийн засаглал, ил тод байдал, олон нийтийн хяналтыг нэмэгдүүлэх;

43.3.3.төрийн өмчийн оролцоог зохистой хэмжээнд бууруулах, хөрөнгийн зах зээлийг хөгжүүлэх;

43.3.4.Монгол Улсын иргэн, Үндэсний баялгийн сан, тэтгэврийн сан болон дотоодын мэргэжлийн хөрөнгө оруулагчийн оролцоог нэмэгдүүлэх;

43.3.5.газрын хэвлийн баялгийн өгөөжийг нийт иргэнд хүртээмжтэй, ил тод, зах зээлийн зарчмаар хүргэх;

43.3.6.төрийн өмчит компанийн талаар баримтлах бодлого, компанийн дүрэмд заасан бусад.

43.4.Төрийн болон орон нутгийн өмчит компанийн хувьцаа, түүнд хамаарах үнэт цаасыг санал болгох ажиллагааг дараах үе шатлалаар, эсхүл аль нэгийг сонгож, эсхүл хослуулан хэрэгжүүлж болно:

43.4.1.Монгол Улсын иргэн, Үндэсний баялгийн сан, тэтгэврийн сан, даатгалын сан, хөрөнгө оруулалтын сан болон дотоодын мэргэжлийн хөрөнгө оруулагчдад хаалттай захиалгын аргаар санал болгох;

43.4.2.дотоодын үнэт цаасны зах зээлд нийтэд нээлттэй хэлбэрээр санал болгох;

43.4.3.олон улсын үнэт цаасны зах зээлд давхар бүртгэл хийх замаар санал болгох.

43.5.Энэ хуулийн 43.4.1-д заасан хаалттай захиалгын аргаар санал болгох ажиллагаанд оролцох эрх бүхий этгээд, захиалгын доод болон дээд хэмжээ, нэг этгээдийн эзэмших дээд хязгаар, давуу эрх, төлбөр тооцоо, хуваарилалтын асуудлыг тухай бүр Засгийн газар хууль тогтоомжийн хүрээнд шийдвэрлэнэ.

43.6.Энэ хуулийн 43.2-т заасан салбарын төрийн өмчит компанийн хувьцаа, түүнд хамаарах үнэт цаасыг хаалттай захиалгын аргаар санал болгоход дараах зарчмыг баримтална:

43.6.1.тэгш, шударга, ил тод оролцох боломж олгох;

43.6.2.нэг этгээдэд хэт төвлөрөл үүсэхээс сэргийлэх;

43.6.3.хувьцааны үнэ, үнэлгээ, эрсдэл, ногдол ашиг, саналын эрх, хязгаарлалт, захиалгын нөхцөлийг нийтэд хүртээмжтэй мэдээлэх;

43.6.4.захиалга давсан тохиолдолд хувьцааг хувь тэнцүүлэн хуваарилах;

43.6.5.иргэдийн хувьцааг богино хугацаанд төвлөрүүлэн худалдан авах, дамжуулан худалдах, зах зээлийг урвуулан ашиглах эрсдэлээс сэргийлэх зохицуулалт тогтоох.

43.7.Энэ хуулийн 43.2-т заасан салбарын төрийн өмчит компанийн хувьцааг санал болгоход төрийн эзэмшлийн доод хэмжээ, саналын эрх, алтан хувьцаа, мэргэжлийн хөрөнгө оруулагчийн оролцоо, гадаадын хөрөнгө оруулагчийн эзэмшлийн хязгаарыг тухайн компанийн онцлогт нийцүүлэн шийдвэрлэнэ.

43.8.Төрийн болон орон нутгийн өмчийн компанийн бүтээмжийг нэмэгдүүлэх, ур чадвартай ажилтныг тогтвортой ажиллуулах, дотоод хяналтыг сайжруулах зорилгоор ажилтнуудад эзэмшүүлэх давуу эрхийн хувьцаа, опционыг Компанийн тухай хуульд заасны дагуу гаргаж болно.

43.9.Энэ хуулийн 43.8-д заасан давуу эрхийн хувьцаа, опцион гаргахтай холбоотой журмыг төрийн өмчийн асуудал эрхэлсэн төрийн захиргааны байгууллага батална.

Тайлбар: -Энэ зүйлд заасан “хаалттай захиалга” гэж төрийн болон орон нутгийн өмчит компанийн хувьцаа, түүнд хамаарах үнэт цаасыг хууль, Засгийн газрын шийдвэр, эсхүл эрх бүхий байгууллагын баталсан журмаар урьдчилан тодорхойлсон хөрөнгө оруулагчийн хүрээнд Үнэт цаасны зах зээлийн тухай хуулийн 11.2-т заасны дагуу санал болгох ажиллагааг.

Тайлбар: -Энэ зүйлд заасан “нээлттэй захиалга” гэж төрийн болон орон нутгийн өмчит компанийн хувьцаа, түүнд хамаарах үнэт цаасыг Үнэт цаасны зах зээлийн тухай хуулийн 11.1-д заасан журмын дагуу нийтэд санал болгох ажиллагааг.” гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

55.Ажлын хэсгийн гаргасан, Төслийн 45 дугаар зүйлд доор дурдсан агуулгатай 45.3, 45.4 дэх хэсэг нэмэх:

“45.3.Төрийн өмчийн компанийн эд хөрөнгийн тооллого хийж, дуусгалтын тайлан, тэнцэл үйлдэн, эд хөрөнгийг хэсэгчлэн шилжүүлэх, эсхүл дуудлагаар худалдах ажлыг Засгийн газрын шийдвэрийг үндэслэн төрийн өмчийн асуудал эрхэлсэн төрийн захиргааны байгууллага эрхлэн гүйцэтгэнэ.

45.4.Орон нутгийн өмчийн компанийн эд хөрөнгийн тооллого хийж, дуусгалтын тайлан, тэнцэл үйлдэн, эд хөрөнгийг хэсэгчлэн шилжүүлэх, эсхүл дуудлагаар худалдах ажлыг иргэдийн Төлөөлөгчдийн Хурлын шийдвэрийг үндэслэн орон нутгийн өмчийн газар эрхлэн гүйцэтгэнэ.” гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

56.Ажлын хэсгийн гаргасан, Дээрх 54 дэх санал дэмжигдсэнтэй холбогдуулан төслийн 46 дугаар зүйлийг хасах гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

57.Ажлын хэсгийн гаргасан, Төслийн 47 дугаар зүйлийн 47.5 дахь хэсгийг хасах гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

58.Ажлын хэсгийн гаргасан, Төслийн 48 дугаар зүйлийн 48.2 дахь хэсгийн “байгуулахыг” гэснийг “байгуулах, сангийн хөрөнгийг зарцуулах шийдвэрийг” гэж, “шийдвэрлэнэ” гэснийг “гаргана” гэж өөрчилж, 48.3 дахь хэсгийг доор дурдсанаар өөрчлөн найруулах:

“48.3.Энэ хуулийн 48.1-д заасан нөөц сангийн хөрөнгийг дараах арга хэмжээг санхүүжүүлэхэд зарцуулна:

48.3.1.компанийн үйлдвэрлэл, үйл ажиллагааг өргөжүүлэх, технологийг шинэчлэх;

48.3.2.давагдашгүй хүчин зүйл, зах зээлийн гэнэтийн өөрчлөлт болон бусад урьдчилан таамаглах боломжгүй эрсдэлийн сөрөг нөлөөллийг бууруулах.” гэсэн саналыг дэмжье гэсэн санал хураалт явуулъя.

Зөвшөөрсөн: 11

Татгалзсан: 10

Бүгд: 21

52.4 хувийн саналаар дэмжигдлээ.

59.Ажлын хэсгийн гаргасан, Төслийн 49 дүгээр зүйлийн 49.1.1 дэх заалтыг доор дурдсанаар өөрчлөн найруулж, 49.1.7 дахь заалтын “компанийн эсрэг, эсхүл” гэснийг хасаж, 49.1.14 дэх заалтын “дэмжлэг,” гэсний дараа “татаас,” гэж нэмэх:

“49.1.1.компанийн төсөв, бизнес төлөвлөгөө,” гэсэн саналыг дэмжье гэсэн санал хураалт явуулъя.

Зөвшөөрсөн: 12

Татгалзсан: 9

Бүгд: 21

57.1 хувийн саналаар дэмжигдлээ.

60.Ажлын хэсгийн гаргасан, Төслийн 51 дүгээр зүйлд доор дурдсан агуулгатай 51.3, 51.4 дэх хэсэг нэмэх:

“51.3.Энэ хуулийн 24.6-д заасан зохицуулалтыг 2028 оны 07 дугаар сарын 01-ний өдөр хүртэл хугацаанд үе шаттайгаар хэрэгжүүлнэ.

51.4.Тухайн шатны иргэдийн Төлөөлөгчдийн Хурал орон нутгийн өмчит компанийг энэ хуулийн 8.3-т нийцүүлэх арга хэмжээг 2028 оны 01 дүгээр сарын 01-ний өдрийн дотор зохион байгуулна.” гэсэн саналыг дэмжье гэсэн санал хураалт явуулъя.

Дээрх саналтай холбогдуулан Улсын Их Хурлын гишүүн П.Сайнзориг үг хэлэв.

Зөвшөөрсөн: 13

Татгалзсан: 8

Бүгд: 21

61.9 хувийн саналаар дэмжигдлээ.

61.Ажлын хэсгийн гаргасан, Дагаж мөрдөх хугацааг “2027 оны 01 дүгээр сарын 01-ний өдрөөс дагаж мөрдөнө” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 13

Татгалзсан: 8

Бүгд: 21

61.9 хувийн саналаар дэмжигдлээ.

62.Ажлын хэсгийн гаргасан, Төрийн болон орон нутгийн өмчит компанийн төлөөлөн удирдах зөвлөлийн дарга, гишүүний бүрэн эрхийн хугацаа хоёр жилээс

хэтрэхгүй байх бөгөөд нэг удаа хоёр жил хүртэл хугацаагаар улируулан томилох тухай зохицуулалт дэмжигдсэнтэй холбогдуулан Төрийн хэмнэлтийн тухай хуулийн 15 дугаар зүйлийн 15.4 дэх хэсгийг хүчингүй болгох тухай хуулийн төслийг боловсруулах.” гэсэн саналыг дэмжье гэсэн санал хураалт явуулъя.

Зөвшөөрсөн: 13
Татгалзсан: 8
Бүгд: 21
61.9 хувийн саналаар дэмжигдлээ.

63.Ажлын хэсгийн гаргасан, Төрийн өмчийн компанийн үйл ажиллагаанд олон улсад хүлээн зөвшөөрөгдсөн аудитын хуулийн этгээдээр санхүүгийн аудит хийлгэх тохиолдолд тухайн санхүүгийн жилд аудит хийлгэх компанийн жагсаалтыг Засгийн газар батлах зохицуулалт дэмжигдсэнтэй холбогдуулан Төрийн аудитын тухай хуульд нэмэлт, өөрчлөлт оруулах тухай хуулийн төсөл боловсруулах гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

Найруулгын санал

1.Ажлын хэсгийн гаргасан, Төслийн 7 дугаар зүйлийн 7.4 дэх хэсэг, 9 дүгээр зүйлийн 9.3.2 дахь заалт, 11 дүгээр зүйлийн 11.1 дэх хэсгийн “байгуулах” гэсний өмнө, 8 дугаар зүйлийн 8.4 дэх хэсгийн “байгуулна” гэсний өмнө, “үүсгэн” гэж, 20 дугаар зүйлийн 20.1.5 дахь заалтын “дүрэмд” гэсний өмнө “компанийн” гэж, 12 дугаар зүйлийн 12.2 дахь хэсгийн “зөвлөл” гэсний дараа “/байхгүй бол гүйцэтгэх удирдлага/”, 45 дугаар зүйлийн 45.2 дахь хэсгийн “комисс” гэсний өмнө “татан буулгах” гэж тус тус нэмэх.

2.Төслийн 12 дугаар зүйлийн 12.3 дахь хэсгийн “шийдвэрлүүлэх үүрэгтэй” гэснийг “шийдвэрлүүлнэ” гэж, 24 дүгээр зүйлийн гарчгийн “тавигдах” гэснийг “тавих” гэж, 47 дугаар зүйлийн 47.4 дэх хэсгийн “хавсарган ирүүлнэ” гэснийг “хавсаргана” гэж өөрчлөх.

3.Төслийн 8 дугаар зүйлийн 8.3, 8.4 дэх хэсгийн “зөвхөн” гэснийг, 8.5 дахь хэсгийн “Энэ” гэснийг, 29 дүгээр зүйлийн 29.3 дахь хэсгийн “хурлаас” гэснийг, 40 дүгээр зүйлийн 40.7 дахь хэсгийн “төрийн өмчийн асуудал эрхэлсэн” гэснийг тус тус хасах.

4.Төслийн талаарх зарчмын зөрүүтэй саналын томьёолол дэмжигдсэнтэй холбогдуулан төслийн агуулга, зарчмыг алдагдуулахгүйгээр бүтэц, нэр томьёо, хэл найруулга, дэс дараалал, зүйл, заалтын дугаар, эшлэлийг нийцүүлж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

Улсын Их Хурлын гишүүн, Улсын Их Хурал дахь Монгол Ардын намын бүлгийн дарга А.Ариунзаяа Эдийн засгийн эрх чөлөөний тухай хуулийн төсөл болон хамт өргөн мэдүүлсэн хуулийн төслүүдийг хэлэлцэх эсэх асуудлаар Улсын Их Хурал дахь Монгол Ардын намын бүлгээс авсан завсарлага дууссаныг мэдэгдэж үг хэлэв./14:00/

Д.Үүрийнтуяа: 1.Ажлын хэсгийн гаргасан, Төслийн 16 дугаар зүйлийг доор дурдсанаар бүхэлд нь өөрчлөн найруулах:

“16 дугаар зүйл.Ногдол ашгийн бодлого

16.1.Төрийн болон орон нутгийн өмчийн компани, төрийн болон орон нутгийн өмч давамгайлсан компани ногдол ашиг хуваарилахдаа Компанийн тухай хуулийн 46, 47 дугаар зүйлд зааснаас гадна дараах зарчим, шаардлагыг баримтална:

16.1.1.ногдол ашгийг өмнөх оны аудитлагдсан санхүүгийн тайланд туссан татвар төлсний дараах хуваарилж болох цэвэр ашгаас тооцох;

16.1.2.компанийн төлбөрийн чадвар, мөнгөн урсгал, батлагдсан бизнес болон хөрөнгө оруулалтын төлөвлөгөө, их засварын хэрэгцээ, нөөц сан бүрдүүлэх шаардлага, санхүүгийн тогтвортой байдлыг харгалзан үзэх;

16.1.3.нийтийн үйлчилгээний үүрэг хүлээсэн бол тухайн үүргийн санхүүжилт, нөхөн төлбөр, татаас, тарифын зохицуулалтыг ногдол ашиг тооцох сууринаас тусад нь авч үзэх;

16.1.4.компанийн урт хугацааны үнэ цэн, хэвийн үйл ажиллагаа, хөрөнгө оруулалтын чадавхыг дордуулахгүй байх.

16.2.Арилжааны зорилготой төрийн болон орон нутгийн өмчийн компани, төрийн болон орон нутгийн өмч давамгайлсан компани нь тухайн санхүүгийн жилд хуваарилж болох цэвэр ашигтай ажилласан бол ногдол ашиг хуваарилах үүрэгтэй.

16.3.Энэ хуулийн 16.2-т заасан компанийн тухайн жилд хуваарилах ногдол ашгийн зорилтот хувь хэмжээг Засгийн газар, орон нутгийн өмчит компанийн хувьд тухайн шатны иргэдийн Төлөөлөгчдийн Хурал жил бүрийн төсвийн төсөл боловсруулах үе шатанд компанийн ангилал, салбарын онцлог, хөрөнгө оруулалтын хэрэгцээ, өр төлбөрийн түвшин, мөнгөн урсгал, өөрийн хөрөнгийн өгөөж, нөөц сангийн шаардлагыг харгалзан тогтооно.

16.4.Энэ хуулийн 16.3-т заасан зорилтот хувь хэмжээ нь арилжааны зорилготой компанийн хувьд хуваарилж болох цэвэр ашгийн 30 хувиас доошгүй байх зарчмыг баримтална. Харин компанийн санхүүгийн байдал, хөрөнгө оруулалтын хэрэгцээ, эсхүл энэ хуулийн 16.6-д заасан үндэслэл байгаа бол уг хувь хэмжээг бууруулж болно.

16.5.Нийтийн үйлчилгээний төрийн болон орон нутгийн өмчит компанид энэ хуулийн 16.4-т заасан доод хувь хэмжээ хамаарахгүй. Компани нь цэвэр ашигтай ажилласан тохиолдолд төлбөрийн чадвар, мөнгөн урсгал, нийтийн үйлчилгээний үүргийн санхүүжилт, үйлчилгээний хүртээмж, чанар, тасралтгүй байдлыг харгалзан ногдол ашиг хуваарилж болно.

16.6. Дараах үндэслэл байгаа бол энэ хуулийн 16.3, 16.4-т заасан зорилтот буюу доод хувь хэмжээнээс бага хэмжээгээр ногдол ашиг хуваарилж болно:

16.6.1.ногдол ашиг хуваарилснаар Компанийн тухай хуульд заасан төлбөрийн чадварын шаардлага хангагдахгүй болох;

16.6.2.компанийн мөнгөн урсгал, өр төлбөрийн үйлчилгээ, зээлийн гэрээний үүрэг, өрийн тогтвортой байдлын шалгуурт шууд эрсдэл үүсэх;

16.6.3.батлагдсан бизнес, хөрөнгө оруулалт, их засвар, техник технологийн шинэчлэлийн төлөвлөгөөг хэрэгжүүлэхэд цэвэр ашгийг дахин хөрөнгө оруулалтад ашиглах зайлшгүй шаардлага үүссэн;

16.6.4.энэ хуульд заасан нөөц сан, эсхүл тусгай зориулалтын нөөц бүрдүүлэх шаардлагатай;

16.6.5.нийтийн үйлчилгээний буюу арилжааны бус тусгай үүргийг хэрэгжүүлэхэд шаардлагатай санхүүжилт, эх үүсвэрийг хадгалах шаардлагатай;

16.6.6.тухайн компанид хуримтлагдсан алдагдал байгаа бөгөөд уг алдагдлыг нөхөх шаардлагатай;

16.6.7.онцгой нөхцөл байдал, давагдашгүй хүчин зүйл, зах зээлийн огцом өөрчлөлт, салбарын системийн эрсдэлийн улмаас компанийн санхүүгийн тогтвортой байдалд сөрөг нөлөө үүсэхээр байгаа.

16.7.Энэ хуулийн 16.6-д заасан үндэслэлээр ногдол ашгийг зорилтот хувь хэмжээнээс бага тогтоох саналыг төлөөлөн удирдах зөвлөл гаргана. Саналд дараах баримт бичгийг хавсаргана:

16.7.1.аудитлагдсан санхүүгийн тайлан;

16.7.2.төлбөрийн чадварын болон мөнгөн урсгалын дүгнэлт;

16.7.3.дараагийн гурваас доошгүй жилийн стратеги төлөвлөгөө;

16.7.4.хөрөнгө оруулалт, их засварын тооцоолол;

16.7.5.нийтийн үйлчилгээний үүрэг хүлээсэн бол уг үүргийн өртөг, санхүүжилт, нөхөн төлбөрийн тооцоо;

16.7.6.ногдол ашиг бууруулах үндэслэл, эрсдэлийн үнэлгээ.

16.8.Энэ хуулийн 16.7-д заасан саналыг хувьцаа эзэмшигчийн эрхийг хэрэгжүүлэгч хянаж, зөвшөөрөх, өөрчлөх, эсхүл татгалзах тухай үндэслэл бүхий шийдвэр гаргана.

16.9.Төрийн болон орон нутгийн өмчийн оролцоотой компанийн хувьд төр, орон нутгийн эзэмшлийн хувьцаа эзэмшигчийн эрхийг хэрэгжүүлэгч нь энэ зүйлд заасан ногдол ашгийн бодлого, зорилтот хувь хэмжээ, санхүүгийн тогтвортой

байдлын шалгуурыг баримтлан хувьцаа эзэмшигчдийн хурал, төлөөлөн удирдах зөвлөлд санал өгөх чиглэл баримтална.

16.10.Төрийн өмчийн асуудал эрхэлсэн төрийн захиргааны байгууллага нь төрийн өмчит компанийн ногдол ашгийн бодлогын хэрэгжилт, хуваарилсан болон хуваарилаагүй ашгийн хэмжээ, бууруулсан үндэслэл, дахин хөрөнгө оруулалтад ашигласан хөрөнгийн үр дүнгийн талаарх нэгдсэн тайланг жил бүр Засгийн газарт танилцуулж, олон нийтэд мэдээлнэ.” гэсэн саналыг дэмжье гэсэн санал хураалт явуулъя.

Зөвшөөрсөн: 10
Татгалзсан: 11
Бүгд: 21
47.6 хувийн саналаар дэмжигдсэнгүй.

Улсын Их Хурлын гишүүн **О.Батнайрамдалын** “дэмжсэн” санал техникийн саатлын улмаас “эсрэг” гарсан тул дээрх санал хураалтыг хүчингүй болгож, дахин санал хураалт явуулах горимын санал гаргав.

Д.Үүрийнтуяа: Улсын Их Хурлын гишүүн **О.Батнайрамдалын** гаргасан горимын саналыг дэмжье гэсэн санал хураалт явуулъя.

Зөвшөөрсөн: 11
Татгалзсан: 10
Бүгд: 21
52.4 хувийн саналаар горимын санал дэмжигдлээ.

Горимын санал дэмжигдсэн тул дээрх санал хураалтыг дахин явуулъя.

Зөвшөөрсөн: 11
Татгалзсан: 10
Бүгд: 21
52.4 хувийн саналаар дэмжигдлээ.

Улсын Их Хурлын гишүүдээс гаргасан зарчмын зөрүүтэй саналаар санал хураалт явуулав.

Д.Үүрийнтуяа: 1.Улсын Их Хурлын гишүүн **П.Сайнзоригийн** гаргасан, Төслийн 23 дугаар зүйлд доор дурдсан агуулгатай 23.4 дэх хэсэг нэмэх:

“23.4.Төлөөлөн удирдах зөвлөлгүй төрийн болон орон нутгийн өмчит компанийн хувьд түүний бүрэн эрхийг хувьцаа эзэмшигчийн эрхийг хэрэгжүүлэгч хэрэгжүүлнэ.”. гэсэн саналыг дэмжье гэсэн санал хураалт явуулъя.

Зөвшөөрсөн: 10
Татгалзсан: 11
Бүгд: 21
47.6 хувийн саналаар дэмжигдсэнгүй.

2.Улсын Их Хурлын гишүүн П.Сайнзоригийн гаргасан, Төслийн 36 дугаар зүйлийн 36.5 дахь хэсгийн “компанид” гэснийг “компани болон толгой компанийн

санхүүжилтээр үйл ажиллагаа явуулж байгаа төсөл хэрэгжүүлэгч компанид” гэж өөрчлөх гэсэн саналыг дэмжье гэсэн санал хураалт явуулъя.

Дээрх саналтай холбогдуулан Улсын Их Хурлын гишүүн П.Сайнзориг, Г.Уянгахишиг, Б.Мөнхсоёл нар үг хэлэв.

Зөвшөөрсөн: 8
Татгалзсан: 13
Бүгд: 21
38.1 хувийн саналаар дэмжигдсэнгүй

3.Улсын Их Хурлын гишүүн П.Сайнзоригийн гаргасан, Төслийн 39 дүгээр зүйлийн 39.3 дахь хэсгийн “03 дугаар сарын 01-ний” гэснийг “05 дугаар сарын 01-ний” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 11
Татгалзсан: 10
Бүгд: 21
52.4 хувийн саналаар дэмжигдлээ.

4.Улсын Их Хурлын гишүүн П.Сайнзоригийн гаргасан, “18.1.4.энэ хуулийн 8.1.2-т заасан үндэслэлээр үүсгэн байгуулсан төрийн өмчит компанийн төрийн эзэмшлийн хувьцааг Улсын Их Хурлын зөвшөөрлийн үндсэн дээр бусдад шилжүүлэх, барьцаалуулах;” гэсэн саналыг дэмжье гэсэн санал хураалт явуулъя.

Зөвшөөрсөн: 10
Татгалзсан: 11
Бүгд: 21
47.6 хувийн саналаар дэмжигдсэнгүй.

Улсын Их Хурлын гишүүн **Б.Уянгын** “дэмжсэн” санал техникийн саатлын улмаас “эсрэг” гарсан тул дээрх санал хураалтыг хүчингүй болгож, дахин санал хураалт явуулах горимын санал гаргав.

Д.Үүрийнтуяа: Улсын Их Хурлын гишүүн **Б.Уянгын** гаргасан горимын саналыг дэмжье гэсэн санал хураалт явуулъя.

Зөвшөөрсөн: 11
Татгалзсан: 10
Бүгд: 21
52.4 хувийн саналаар горимын санал дэмжигдлээ.

Горимын санал дэмжигдсэн тул дээрх санал хураалтыг дахин явуулъя.

Зөвшөөрсөн: 11
Татгалзсан: 10
Бүгд: 21
52.4 хувийн саналаар дэмжигдлээ.

5.Улсын Их Хурлын гишүүн П.Сайнзоригийн гаргасан, Төслийн 21 дүгээр зүйлийн 21.2.8 дахь заалтын “хувьцааны удирдлагын талаарх илтгэлийг” гэснийг, мөн төслийн 47 дугаар зүйлийн 47.6 дахь хэсгийн “төр болон орон нутгийн

хувьцааны удирдлагын талаарх илтгэлийг” гэснийг “энэ хуулийн 7 дугаар зүйлд заасан өмчлөлийн бодлогын хэрэгжилтийн тайланг” гэж тус тус өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 11
Татгалзсан: 10
Бүгд: 21
52.4 хувийн саналаар дэмжигдлээ.

6.Улсын Их Хурлын гишүүн С.Цэнгүүний гаргасан, Төслийн 17 дугаар зүйлийн 17.2 дахь хэсгийг доор дурдсанаар өөрчлөн найруулах:

“17.2.Төрийн өмчит компанийн төрийн эзэмшлийн хувьцаа эзэмшигчийн эрхийг хэрэгжүүлэгч нь төрийн өмчийн асуудал эрхэлсэн төрийн захиргааны байгууллага байна.” гэсэн саналыг дэмжье гэсэн санал хураалт явуулъя.

Зөвшөөрсөн: 6
Татгалзсан: 15
Бүгд: 21
28.6 хувийн саналаар дэмжигдсэнгүй.

7.Улсын Их Хурлын гишүүн С.Цэнгүүний гаргасан, Төслийн 21 дүгээр зүйлийг хасах гэсэн саналыг дэмжье гэсэн санал хураалт явуулъя.

Зөвшөөрсөн: 1
Татгалзсан: 20
Бүгд: 21
4.8 хувийн саналаар дэмжигдсэнгүй.

8.Улсын Их Хурлын гишүүн С.Цэнгүүний гаргасан, Төслийн 23 дугаар зүйлд доор дурдсан агуулгатай 23.4 дэх хэсэг нэмэх:

“23.4.Ижил төрлийн үйл ажиллагаа, чиг үүрэг хэрэгжүүлдэг төрийн болон орон нутгийн өмчит компаниуд нэг төлөөлөн удирдах зөвлөлтэй байна.” гэсэн саналыг дэмжье гэсэн санал хураалт явуулъя.

Зөвшөөрсөн: 2
Татгалзсан: 19
Бүгд: 21
9.5 хувийн саналаар дэмжигдсэнгүй.

9.Улсын Их Хурлын гишүүн С.Цэнгүүний гаргасан, Төслийн 32 дугаар зүйлийн 32.1.4 дэх заалтыг доор дурдсанаар өөрчлөн найруулах:

“32.1.4.бусад аж ахуйн нэгж, төрийн байгууллагад давхар албан тушаал эрхэлдэггүй байх.” гэсэн саналыг дэмжье гэсэн санал хураалт явуулъя.

Зөвшөөрсөн: 6
Татгалзсан: 15
Бүгд: 21
28.6 хувийн саналаар дэмжигдсэнгүй.

10.Улсын Их Хурлын гишүүн Б.Пунсалмаагийн гаргасан, Төслийн 17 дугаар зүйлийн 17.2 дахь хэсэгт доор дурдсан агуулгатай 17.2.1 дэх заалт нэмэх:

“17.2.1.Энэ хуулийн 6.1.2-д заасан төрийн өмчийн оролцоотой компанийн эрхийг хэрэгжүүлэгч нь биет даасан хараат бус санхүүгийн институт бүхий хөрөнгийн менежментийн байгууллага байж болно” гэсэн саналыг дэмжье гэсэн санал хураалт явуулъя.

Дээрх саналтай холбогдуулан Улсын Их Хурлын гишүүн Б.Пунсалмаа үг хэлэв.

Зөвшөөрсөн: 12

Татгалзсан: 10

Бүгд: 21

57.1 хувийн саналаар дэмжигдлээ.

Төрийн болон орон нутгийн өмчит компанийн бүтээмж, ил тод байдал, засаглалыг сайжруулах тухай хуулийн төсөлтэй хамт өргөн мэдүүлсэн хуулийн төслүүдийн талаар зарчмын зөрүүтэй саналын томьёоллоор санал хураалтаар явуулав.

1.Аймаг, нийслэл, сум, дүүргийн иргэдийн Төлөөлөгчдийн Хурлын сонгуулийн тухай хуульд өөрчлөлт оруулах тухай хуулийн төслийн талаар:

Д.Үүрийнтуяа: 1.Ажлын хэсгийн гаргасан, Төслийн 1 дүгээр зүйлийг 2 дугаар зүйл болгож доор дурдсанаар өөрчлөн найруулах:

“2 дугаар зүйл.Аймаг, нийслэл, сум, дүүргийн иргэдийн Төлөөлөгчдийн Хурлын сонгуулийн тухай хуулийн 43 дугаар зүйлийн 43.3.3 дахь заалтыг хүчингүй болсонд тооцсугай.” гэсэн **саналыг дэмжье гэсэн санал хураалт явуулъя.**

Зөвшөөрсөн: 12

Татгалзсан: 9

Бүгд: 21

57.1 хувийн саналаар дэмжигдлээ.

2.Архив, албан хэрэг хөтлөлтийн тухай хуульд өөрчлөлт оруулах тухай хуулийн төслийн талаар:

Д.Үүрийнтуяа: 1.Ажлын хэсгийн гаргасан, Төслийн 2 дугаар зүйлийн “төрийн өмчит үйлдвэрийн газар” гэсний өмнө “Төрийн байгууллага,” гэж нэмж, “албан газар, төрийн өмчийн компани” гэснийг “Төрийн болон орон нутгийн өмчийн тухай хуулийн 13 дугаар зүйлийн 5-д заасан төрийн өмчит хуулийн этгээд” гэж өөрчлөх гэсэн саналыг дэмжье гэсэн санал хураалт явуулъя.

Зөвшөөрсөн: 11

Татгалзсан: 10

Бүгд: 21

52.4 хувийн саналаар дэмжигдлээ.

3.Монгол Улсын Их Хурлын сонгуулийн тухай хуульд өөрчлөлт

оруулах тухай хуулийн төслийн талаар:

Д.Үүрийнтуяа: 1.Ажлын хэсгийн гаргасан, Төслийн 1 дүгээр зүйлийг 2 дугаар зүйл болгож, доор дурдсанаар өөрчлөн найруулах:

“2 дугаар зүйл.Монгол Улсын Их Хурлын сонгуулийн тухай хуулийн 44 дүгээр зүйлийн 44.3.3 дахь заалтыг хүчингүй болсонд тооцсугай.” гэсэн **саналыг дэмжье гэсэн санал хураалт явуулъя.**

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

4.Төрийн болон орон нутгийн өмчийн тухай хуульд нэмэлт, өөрчлөлт оруулах тухай хуулийн төслийн талаар:

Д.Үүрийнтуяа: 1.Ажлын хэсгийн гаргасан, Төслийн 2 дугаар зүйлийн 1 дэх заалтын 9¹ дүгээр зүйлийн 6 дахь хэсгийн “улсын ахлах” гэсний дараа “байцаагч” гэж нэмж, 7 дахь хэсгийн 2 дахь өгүүлбэрийг хасах.

2.Мөн зүйлийн 2 дахь заалтын 13 дугаар зүйлийн 2 дахь заалтын “нийтийн үйлчилгээний” гэсний өмнө “төрийн өмчит” гэж нэмэх.

3.Мөн зүйлийн 3 дахь заалтын 15 дугаар зүйлийн гарчгийн, 6, 7 дахь хэсгийн “Нийтийн үйлчилгээний” гэсний өмнө “Төрийн болон орон нутгийн өмчит” гэж, мөн зүйлийн 5 дахь хэсгийн “холбоотой” гэсний дараа “асуудлыг” гэж, 7 дахь хэсгийн “нээлттэй” гэсний өмнө “олон нийтэд ил тод,” гэж, тус тус нэмж, мөн хэсгийн 1 дэх заалтын “удирдлагын” гэснийг “удирдлага, түүний цалин, хөлс, урамшууллын” гэж өөрчлөх.

4.Төслийн 3 дугаар зүйлийн 14 дүгээр зүйлийн өмнө “мөн зүйлийн 3 дахь заалтын “өмчийн оролцоотой аж ахуйн нэгжийн” гэснийг “өмчит компанийн” гэж,” гэж нэмэх гэсэн **саналыг дэмжье гэсэн санал хураалт явуулъя.**

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

2.Улсын Их Хурлын гишүүн П.Сайнзоригийн гаргасан, Төслийн 3 дугаар зүйлийн 21¹ зүйлийн дараах “12 дахь” гэснийг “13 дахь” гэж өөрчлөх гэсэн **саналыг дэмжье гэсэн санал хураалт явуулъя.**

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

5.“Хууль баталсантай холбогдуулан авах зарим арга хэмжээний тухай” Монгол Улсын Их Хурлын тогтоолын төслийн талаар:

Д.Үүрийнтуяа: 1.Ажлын хэсгийн гаргасан, Тогтоолын төслийн нэг дэх заалтад доор дурдсан агуулгатай 3, 4 дэх дэд заалт нэмэх:

“3/Төрийн болон орон нутгийн өмчит компанийн тухай хууль батлагдсантай холбогдуулан бусад хууль тогтоомж дахь төрийн өмчит үйлдвэрийн газар, төрийн болон орон нутгийн өмчит компанийн талаарх нэр томьёог хуульд нийцүүлж өөрчлөх талаарх саналаа Улсын Их Хурлын 2026 оны намрын ээлжит чуулганы хугацаанд өргөн мэдүүлэх;

4/Энэ хууль хүчин төгөлдөр болохоос өмнө үүсгэн байгуулагдсан уул уурхайн салбарт үйл ажиллагаа явуулж байгаа орон нутгийн өмчит компанид тус хуулийн 8.3-т заасан зөвшөөрөл хамаарахгүй.” гэсэн **саналыг дэмжье гэсэн санал хураалт явуулъя.**

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

Зарчмын зөрүүтэй саналын томьёоллоор санал хураалт явуулж дууслаа.

Байнгын хорооноос гарах санал, дүгнэлтийг Улсын Их Хурлын гишүүн Г.Уянгахишиг Улсын Их Хурлын чуулганы нэгдсэн хуралдаанд танилцуулахаар тогтов.

Уг асуудлыг 14 цаг 34 минутад хэлэлцэж дуусав.

Хоёр.Эдийн засгийн эрх чөлөөний тухай хуулийн төсөл болон хамт өргөн мэдүүлсэн хуулийн төслүүд /Улсын Их Хурлын гишүүн О.Цогтгэрэл нарын 3 гишүүн 2026.06.05-ны өдөр өргөн мэдүүлсэн, хэлэлцэх эсэх, үргэлжлэл/

Хуралдаанд Улсын Их Хурлын Тамгын газрын Байнгын хороодын асуудал эрхлэх газрын Эдийн засгийн байнгын хорооны ажлын албаны ахлах зөвлөх Д.Мягмарцэрэн, зөвлөх Л.Батмөнх, Б.Нарангэрэл, референт М.Мандхай нар байлцав.

Эдийн засгийн эрх чөлөөний тухай хуулийн төсөл болон хамт өргөн мэдүүлсэн хуулийн төслүүдийг хэлэлцэх эсэх хэлэлцүүлэг санал хураалтаар үргэлжлэв.

Д.Үүрийнтуяа: 1.Эдийн засгийн эрх чөлөөний тухай хуулийн төслийг үзэл баримтлалын хүрээнд хэлэлцэхийг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

2.Хууль тогтоомжийн тухай хуульд нэмэлт оруулах тухай хуулийн төслийг үзэл баримтлалын хүрээнд хэлэлцэхийг дэмжье гэсэн санал хураалт явуулъя.

Зөвшөөрсөн: 12

Татгалзсан: 9
Бүгд: 21
57.1 хувийн саналаар дэмжигдлээ.

3.Өрсөлдөөний тухай хуульд өөрчлөлт оруулах тухай хуулийн төслийг үзэл баримтлалын хүрээнд хэлэлцэхийг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

4.Зөвшөөрлийн тухай хуульд нэмэлт оруулах тухай хуулийн төслийг үзэл баримтлалын хүрээнд хэлэлцэхийг дэмжье гэсэн санал хураалт явуулъя.

Зөвшөөрсөн: 12
Татгалзсан: 9
Бүгд: 21
57.1 хувийн саналаар дэмжигдлээ.

Байнгын хорооноос гарах санал, дүгнэлтийг Улсын Их Хурлын гишүүн Б.Пунсалмаа Улсын Их Хурлын чуулганы нэгдсэн хуралдаанд танилцуулахаар тогтов.

Байнгын хорооны хуралдаанаар 2 асуудал хэлэлцэв.

Уг асуудлыг 14 цаг 39 минутад хэлэлцэж дуусав.

Хуралдаан 1 цаг 49 минут үргэлжилж, 32 гишүүнээс 21 гишүүн хүрэлцэн ирж, 65.6 хувийн ирцтэйгээр 14 цаг 39 минутад өндөрлөв.

Тэмдэглэлтэй танилцсан:
ЭДИЙН ЗАСГИЙН БАЙНГЫН
ХОРООНЫ ДАРГА

Б.ЗАЯАБАЛ

Тэмдэглэл хөтөлсөн:
ХУРАЛДААН ЗОХИОН БАЙГУУЛАХ
ГАЗРЫН ШИНЖЭЭЧ

Д.ОТГОНДЭЛГЭР

МОНГОЛ УЛСЫН ИХ ХУРАЛ

2026 оны 06 дугаар сарын 18-ны өдөр,
Пүрэв гараг
Төрийн ордон “Үндсэн хууль” танхим
12 цаг 50 минут.

**ЭДИЙН ЗАСГИЙН БАЙНГЫН ХОРООНЫ
ХУРАЛДААНЫ ДЭЛГЭРЭНГҮЙ ТЭМДЭГЛЭЛ**

Д.Үүрийнтуяа: Байнгын хорооны эрхэм гишүүдийн энэ өдрийн амгаланг айлтгая. Хуралдаанд оролцож байгаа гишүүдийг танилцуулъя.

Хуралдаанд ирсэн гишүүдийг танилцуулъя. Цэндийн Баатархүү, Ринчиндоржийн Батболд, Отгоншарын Батнайрамдал Хүрэлбаатарын Булгантуяа, Болдын Жавхлан, Батбаярын Жаргалан, Чулуунбилэгийн Лодойсамбуу, Баатаржавын Мөнхсоёл, Эрдэнэбилэгийн Одбаяр, Ганбатын Очирбат, Бадамдоржийн Пунсалмаа, Лхагвасүрэнгийн Соронзонболд, Ренчинбямбын Сэддорж, Болдын Уянга, Гончигдоржийн Уянгахишиг, Мөнхчулууны Энхцэцэг, Сүхбаатарын Эрдэнэбат, Доржсүрэнгийн Үүрийнтуяа гэсэн гишүүд ирцгээсэн байна. Хуралдааны ирц 56.3 хувьтай байна.

Байнгын хорооны гишүүдийн олонх хүрэлцэн ирж, Байнгын хорооны хуралдааны ирц 56.3 хувьтай бүрдсэн тул Эдийн засгийн байнгын хорооны 2026 оны 06 сарын 18-ны өдрийн хуралдаан нээснийг мэдэгдье.

Байнгын хорооны хуралдаанаар хэлэлцэх асуудлыг танилцуулъя.

1.Төрийн болон орон нутгийн өмчит компанийн бүтээмж, ил тод байдал, засаглалыг сайжруулах тухай хуулийн төсөл болон хамт өргөн мэдүүлсэн хуульд тогтоолын төслүүд, анхны хэлэлцүүлэг.

Хоёрт нь Эдийн засгийн эрх чөлөөний тухай хуулийн төсөл болон хамт өргөн мэдүүлсэн хуулийн төслүүдийн хэлэлцэх эсэхийг хэлэлцэнэ.

Хэлэлцэх асуудалтай холбоотой саналтай гишүүд байгаа юу?

Алга байна. Хэлэлцэх асуудалд. орьё.

Төрийн болон орон нутгийн өмчит компанийн бүтээмж, ил тод байдал, засаглалыг сайжруулах тухай хуулийн төсөл болон хамт өргөн мэдүүлсэн хууль, тогтоолын төслүүдийн анхны хэлэлцүүлгийг явуулж эхлүүлье.

06 сарын 16-ны өдрийн Байнгын хорооны хуралдаанаар хуулийн төслийн хэлэлцүүлгээс Улсын Их Хурал дахь Ардчилсан намын бүлэг 5 хоногийн завсарлага авсан. Ардчилсан намын бүлгийн дэд дарга Ардчилсан намын бүлгээс завсарлагын талаар үг хэлэх ёстой. Дэд дарга Лодойсамбуу дарга хэлэх үү, Жаргалан даргыг хүлээх үү?

Жаргалан гишүүний микрофоныг өгье.

Б.Жаргалан: Ардчилсан намын бүлгийн дэд дарга Жаргалан даргын микрофоныг өгье. Улсын Их Хурал дахь Ардчилсан намын бүлгээс энэ Төрийн болон орон нутгийн өмчит компанийн бүтээмж, ил тод байдал, засаглалыг засаглалыг сайжруулах тухай хуулийн төсөл дээр 5 хоногийн завсарлага авсан байгаа. Энэ завсарлагаа хугацаанаас нь өмнө дуусгаж байна.

Д.Үүрийнтуяа: Баярлалаа. Өмнөх хуралдаанаар хуулийн төслийг анхны хэлэлцүүлэгт бэлтгэсэн талаар ажлын хэсгийн танилцуулгыг уншиж дууссаны дараа завсарлага авсан. Тиймээс одоо үргэлжлүүлэн хэлэлцээд явна.

Монгол Улсын Их Хурлын чуулганы хуралдааны дэгийн тухай хуулийн 39 дүгээр зүйлийн 39.10 дахь хэсгийг баримтлан хуулийн төслүүдийг зүйл бүрээр нь хэлэлцэнэ.

Хэлэлцүүлгийн явцад 39 дүгээр зүйлийн 39.11 дэх хэсэгт заасны дагуу гишүүд тухайн зүйлтэй холбогдуулан хууль санаачлагчаас болон бусад оролцогчоос асуулт асууж болно.

Ажлын хэсгийн бэлтгэсэн зарчмын зөрүүтэй саналуудаар санал хураалт явуулж эхэлье. Гишүүд санал хураалтдаа бэлдэнэ үү.

Жаргалан гишүүн орчихсон уу? Болдоггүй юу?

Санал хураалтаа эхэлье.

1.Төслийн нэрийн “бүтээмж, ил тод байдал, засаглалыг сайжруулах” гэснийг хасаж, 1 дүгээр зүйлийн 1.1 дэх хэсгийн “хяналт, ил тод байдал, засаглалыг сайжруулах, бүтээмжийг нэмэгдүүлэхтэй” гэснийг “хяналтыг хэрэгжүүлэх, ил тод байдлыг хангахтай” гэж өөрчлөх. Санал гаргасан ажлын хэсэг. Үүрийнтуяа Сайнзориг, Номинчимэг, Алдаржавхлан, Алтангэрэл, Анар, Батболд, Бат-Эрдэнэ, Баярбаатар, Галбадрах, Ганбаатар, А.Ганбаатар, Г.Ганбаатар, Ж.Ганбаатар, Даваасүрэн, Жаргалан, Заяабал, Зулпхар, Мөнхбат, Мөнхсоёл, Мэндсайхан, Наранбаатар, Отгонбаяр, Пунсалмаа, Сандаг-Очир Уянгахишиг, Хэрлэн Энхнасан, Энхтүвшин, Эрдэнэболд цаашид ажлын хэсэг гэх. Санал хураалт. Дэмжье гэсэн томьёоллоор санал хураалт явуулъя.

68.4 хувь буюу 19 гишүүнээс 13 гишүүн дэмжиж, энэхүү санал дэмжигдлээ.

2.Төслийн 2 дугаар зүйлийн гарчгийн, мөн зүйлийн 2.1 дэх хэсгийн “бүтээмж, ил тод байдал, засаглалыг сайжруулах” гэснийг тус тус хасах. Санал гаргасан ажлын хэсэг. Санал хураалт.

19 гишүүнээс 14 гишүүн буюу 73.7 хувиар санал дэмжигдлээ.

3.Төслийн 3 дугаар зүйлийн 3.3 дахь хэсгийн “хуулийн дагуу байгуулагдсан” гэснийг “хуулиар зохицуулагдах” гэж өөрчлөх. Санал гаргасан ажлын хэсэг. Санал хураалт.

19 гишүүнээс 14 дэмжиж, 73.7 хувиар санал дэмжигдлээ.

4.Дээрх 1 дэх санал дэмжигдсэнтэй холбогдуулан төслийн 4 дүгээр зүйлийн 4.1.1, 4.1.2 дахь заалтын “хяналт” гэснийг “хяналтын эрхийг” гэж өөрчилж, доор дурдсан агуулгатай 4.1.6 дахь заалт нэмэх:

“4.1.6.“хяналтын эрхийг хэрэгжүүлэх” гэж төр, орон нутаг, эсхүл тэдгээрийн хувьцаа эзэмшигчийн эрхийг хэрэгжүүлэгч нь дангаараа, эсхүл нэгдмэл сонирхолтой этгээдээр дамжуулан тухайн компанийн төлөөлөн удирдах зөвлөлийн гишүүдийн олонхыг томилох, эсхүл компанийн стратеги, санхүүгийн бодлого, үндсэн үйл ажиллагаанд заавал биелэгдэх шийдвэр гаргах эрхийг хууль, гэрээ, дүрмийн үндсэн дээр хэрэгжүүлэхийг.”. Санал гаргасан ажлын хэсэг. Санал хураалт.

19 гишүүнээс 13 гишүүн дэмжиж, 68.4 хувиар санал дэмжигдлээ.

5.Төслийн 4 дүгээр зүйлийн 4.1.1, 4.1.2 дахь заалтын “энэ” гэснийг, 4.1.3, 4.1.4 дэх заалтыг тус тус хасаж, 4.1.5 дахь заалтыг доор дурдсанаар өөрчлөн найруулах:

“4.1.5.“нийтийн үйлчилгээ” гэж иргэдийн ая тухтай амьдрах таатай орчныг бүрдүүлэх зорилгоор дэд бүтэц, эрчим хүч, зам, тээвэр, эрүүл мэнд, боловсрол, соёл, спорт болон холбогдох бусад салбарт төрөөс иргэдэд тэгш, чанартай, үр ашигтай, хууль тогтоомж, стандартын дагуу үзүүлж байгаа олон нийтэд зориулсан үйлчилгээг;”. Санал гаргасан ажлын хэсэг. Санал хураалт.

Сайнзориг гишүүний микрофоныг өгье ажлын хэсгээс.

П.Сайнзориг: Дарга энэ дээр юу яагаад бас сүүлд бид бас ажлын дэд хэсгээсээ яриад ер нь компанийн энэнтэй холбоотой 3 ангиллыг ангилж байгааг болиод 2 ангиллаар төслөөр нь үлдээе гээд 4.1.3 дахь тодорхойлолт байгаа. Тэрийгээ үлдээчихье гэсэн юм. Тэгэхээр би энэ хажуугийн санал буюу гишүүний саналыг хураалгаад энэ ажлын хэсгийн саналаа татаад авчихъя гэсэн бодолтой байна.

Д.Үүрийнтуяа: Гишүүний саналаар санал хураая. Гишүүний санал.

П.Сайнзориг: 4 1.3 гэдэг л хасагдаж байгаа. Та яг уншихсан гэсэн үг. Төслийн 5-дахь заалтын энэ гэснийг.

Д.Үүрийнтуяа: 4.1.3 гэдгийг хасаад.

П.Сайнзориг: Тэгээд л бусад нь хэвээрээ.

Д.Үүрийнтуяа: Төслийн 4 дүгээр зүйлийн 4.1.1, 4.1.2 дахь заалтын “энэ” гэснийг, 4.1.4 дэх хэсгийг хасаж, 4.1.5 дахь хэсгийг доор дурдсанаар өөрчлөн найруулах гэсэн томъёоллоор. 4.1.5-ийг уншихсан. Энэ томъёоллоор санал хураалт явуулъя. Санал хураалт.

19 гишүүнээс 12 гишүүн буюу 62.3 хувиар санал дэмжигдлээ.

6.Төслийн 5 дугаар зүйлд доор дурдсан агуулгатай дараах Тайлбар хэсэг нэмэх:

“Тайлбар: -Энэ хуульд заасан “үр ашигтай байх” гэж арилжааны чиглэлийн төрийн болон орон нутгийн өмчит компанийн хувьд санхүүгийн капитал хөрөнгийн жигнэсэн дундаж өртгийн тодорхой хувиас доошгүй хэмжээний цэвэр ашигтай ажиллаж, эдийн засгийн өгөөж бий болгон компанийн үнэ цэнийг нэмэгдүүлэхийг ойлгоно. Харин нийтийн үйлчилгээний төрийн болон орон нутгийн өмчит компанийн хувьд нийтийн үйлчилгээг хүртээмжтэй, чанартай, хамгийн боломжит бага зардлаар үзүүлэхийг ойлгоно.”

“Тайлбар: -Энэ хуульд заасан “зах зээлд шударга өрсөлдөх, аливаа хэлбэрээр давуу эрх эдлэхгүй байх” гэж хуульд зааснаас бусад тохиолдолд татварын хөнгөлөлт, чөлөөлөлт эдлэх, төрийн баталгаа, хөнгөлөлттэй зээл, санхүүжилт авах, газар, үл хөдлөх эд хөрөнгө, дэд бүтцийг зах зээлийн үнээс доогуур нөхцөлөөр ашиглах, зөвшөөрөл, эрх олгох ажиллагаанд давуу нөхцөл эдлэх, төрийн болон орон нутгийн худалдан авах ажиллагаанд давуу эрх эдлэх, дампуурал, төлбөрийн чадваргүйдлийн нийтлэг журмаас үндэслэлгүйгээр чөлөөлөгдөхгүй байхыг ойлгоно.”. Санал гаргасан ажлын хэсэг. Санал хураалт.

19 гишүүнээс 13 гишүүн 68.4 хувиар дэмжлээ. Энэ санал дэмжигдлээ.

7.Төслийн 5 дугаар зүйлийн 5.2.4 дэх заалтын “мэргэжлийн” гэснийг “мэргэшсэн” гэж, 5.2.5 дахь заалтын “үр ашиггүй” гэснийг “үргүй” гэж өөрчилж, 5.2.8 дахь заалтын “тайлагнах” гэсний өмнө “бүрэн” гэж нэмж, 5.2.1, 5.2.2 дахь заалтыг доор дурдсанаар өөрчлөн найруулах:

“5.2.1.компанийн удирдлагын эрх төрийн болон орон нутгийн эрх хэмжээнээс тусгаарлагдсан байх;”

“5.2.2.хувьцааны төрөл, тоонд нийцүүлэн хувьцаа эзэмшигчдэд тэгш хандах;”. Санал гаргасан ажлын хэсэг. Санал хураалт.

19 гишүүнээс 13 гишүүн 68.4 хувиар дэмжиж, санал дэмжигдлээ.

Сайнзориг гишүүн 8 дахь саналтай холбоотой санал татах саналаа өөрөө та хэлэх юм байна микрофонд.

П.Сайнзориг: Сая нөгөө 5 дугаар санал дээр 4.1.3 дахь гэдэг нэр томьёоны тодорхой үлдээж байгаа компанийн ангиллыг үндсэн Засгийн газрын өргөн барьсан төслөөр нь буюу 2 ангиллаар нь үлдээх учраас энэ санал татаад авчихъя.

Тэгээд миний хажуугийн зүгээр 34 хувь гэснийг гуравны нэг гэсэн хажуугийн санал энэ дээр хураагдахаар байгаа юм. Энийг нь оруулаад явчихъя.

Ажлын хэсэг дээр энийг ярьсан шүү дээ. 34 хувь гэдэг чинь өөрөө яг нөгөө хяналтын багцаас бас дээшээ гарчхаад байгаа юм. Тэгэхээр бид хэд.

Д.Үүрийнтуяа: Та татвал бүтнээр нь татах юм байна. Засаж орж байж татаж болохгүй болчихоод байна. Тэгэхээр 34 хувиа яаж оруулах юм?

9.Төслийн 6 дугаар зүйлийн 6.3 дахь хэсгийг доор дурдсанаар өөрчлөн найруулах:

“6.3.Төрийн болон орон нутгийн өмчит компанийг үйл ажиллагааны зорилго, чиг үүргээс нь хамааруулан арилжааны, эсхүл нийтийн үйлчилгээний гэж ангилах бөгөөд энэ талаар тухайн компанийн дүрэмд тусгана.”. Санал гаргасан ажлын хэсэг. Санал хураалт.

19 гишүүнээс 13 гишүүн буюу 68.4 хувиар дэмжиж, энэ санал дэмжигдлээ.

10.Төслийн 7 дугаар зүйлийн гарчгийн “үндсэн чиглэл” гэснийг “өмчлөлийн бодлого” гэж, 7.1 дэх хэсгийн “үндсэн чиглэлийг” гэснийг “өмчлөлийн бодлогыг” гэж, 7.2 дахь хэсгийн “энэ хуулийн 7.1-д заасан үндсэн чиглэлийн төслийг” гэснийг “төрийн өмчит компанийн талаар баримтлах өмчлөлийн бодлогыг” гэж, 7.3, 7.4 дэх хэсгийн “Үндсэн чиглэлд” гэснийг “Төрийн өмчит компанийн талаар баримтлах өмчлөлийн бодлогод” гэж, 7.3.4 дэх заалтын “үндсэн чиглэлийн” гэснийг “төрийн өмчит компанийн талаар баримтлах өмчлөлийн бодлогын” гэж, 7.3.1 дэх заалтын “хувьцаа эзэмших, хянах зорилго,” гэснийг “хувьцаа эзэмших зорилго, хяналтын эрхийг хэрэгжүүлэх” гэж, 7.3.6 дахь заалтын “биржээр олон нийтэд нээлттэй худалдах” гэснийг “худалдах, түүнийг хэрэгжүүлэх арга,” гэж тус тус өөрчилж, 7.3.5 дахь заалтын “бүтцийн” гэснийг хасах. Санал гаргасан ажлын хэсэг. Санал хураалт.

20 гишүүнээс 13 гишүүн 65 хувиар дэмжиж, энэ санал дэмжигдлээ.

11.Төслийн 7.7 дахь хэсгийн “хуудсанд” гэсний дараа “06 дугаар сарын 30-ны өдрийн дотор” гэж нэмж, 7.5, 7.6 дахь хэсгийг доор дурдсанаар тус тус өөрчлөн найруулах:

“7.5.Төрийн өмчит компанийн талаар баримтлах өмчлөлийн бодлогын хэрэгжилтэд төрийн өмчийн асуудал эрхэлсэн төрийн захиргааны байгууллага жил бүр хяналт-шинжилгээ, үнэлгээ хийж, тайланг тухайн жилийн 06 дугаар сарын 01-ний өдрийн дотор Засгийн газарт, Засгийн газар тайланг тухайн жилийн намрын чуулганы хугацаанд холбогдох Байнгын хороонд танилцуулна.

7.6.Төрийн өмчит компанийн талаар баримтлах өмчлөлийн бодлогын хэрэгжилтийн тайланг Засгийн газар бүрэн эрхийнхээ хугацаа дуусахаас хоёроос доошгүй сарын өмнө Улсын Их Хуралд танилцуулна.”. Санал гаргасан ажлын хэсэг. Санал хураалт.

20 гишүүнээс 12 гишүүн буюу 60 хувиар энэ санал дэмжигдлээ.

12.Дээрх 10, 11 дэх санал дэмжигдсэнтэй холбогдуулан төслийн “үндсэн чиглэл” гэснийг “Төрийн өмчит компанийн талаар баримтлах өмчлөлийн бодлого” гэж агуулгад нь тохируулан тухай бүрд өөрчлөх. Санал гаргасан ажлын хэсэг. Санал хураалт.

20 гишүүнээс 13 гишүүн 65 хувиар энэхүү санал дэмжигдлээ.

13. 13 дээр үү? Уянгахишиг гишүүний. эхлээд би танилцуулчхаад та дар аа нь саналаа хэлэх юм байна.

13.Төслийн 8 дугаар зүйлийн 8.1.2 дээр ажлын хэсгээс гадна Цэнгүүн гишүүний санал гарсан байгаа. Улсын Их Хурлын чуулганы дэгийн хуралдааны дэгийн тухай хуулийн 39 дүгээр зүйлийн 39.20-д төслийн зүйл, хэсэг, заалт тус

бүрээр 2 ба түүнээс дээш зарчмын зөрүүтэй саналын томъёолол гарсан тохиолдолд хамгийн эхэнд ирүүлсэн саналаар санал хураалт явуулахдаа бусад саналыг танилцуулж санал хураалгах бөгөөд уг санал дэмжигдвэл бусад санал дэмжигдээгүйд тооцож тэдгээр саналаар санал хураалт явуулахгүй.

Энэ хуулийн 39.9-т заасны дагуу ажлын хэсэг байгуулсан бол ажлын хэсгийн саналаар эхэлж санал хураалт явуулна гэж заасныг үндэслэн ажлын хэсгийн боловсруулсан 13 дахь саналыг Цэнгүүн гишүүний саналын хамт танилцуулан санал хураалт явуулна. Санал саналыг танилцуулъя. Үүний дараа Уянгахишиг гишүүн бас санал хэлнэ.

13.Төслийн 8 дугаар зүйлийн 8.1 дэх хэсгийг доор дурдсанаар бүхэлд нь өөрчлөн найруулах:

“8.1.Төрийн өмчит компанийг дараах үндэслэлээр үүсгэн байгуулна:

8.1.1. Нийтийн үйлчилгээний үүргийг хэрэгжүүлэх;

8.1.2.Үндэсний эдийн засгийн ашиг сонирхлыг хангах зорилгоор төрийн нийтийн өмчид хамаарах байгалийн баялгийг ашиглах;

8.1.3.Зүй ёсны монополь үйл ажиллагаа эрхлэх;

8.1.4.Үндэсний аюулгүй байдлыг хангахтай холбоотой батлан хамгаалах, хил хамгаалах, хууль сахиулах, шүүхийн шийдвэр гүйцэтгэх үйл ажиллагааг дэмжих, холбогдох аж ахуйн үйл ажиллагаа эрхлэх;

8.1.5.Харилцаа холбоо, банк, санхүүгийн салбарт үйлчилгээний хүртээмжийг нэмэгдүүлэх зорилгоор үйл ажиллагаа явуулах.”. Санал гаргасан ажлын хэсэг.

Цэнгүүн гишүүний саналыг танилцуулъя.

Төслийн 8 дугаар зүйлийн 8.1.1, 8.1.2 дэх заалтыг доор дурдсанаар өөрчлөн найруулж, 8.1.3 дахь заалтыг хасах:

“8.1.1.хувийн хэвшил дангаараа гүйцэтгэхэд эдийн засаг, санхүүгийн хувьд үр өгөөжгүй нийтийн зориулалттай дэд бүтэц, нийтийн үйлчилгээний салбарт үйл ажиллагаа явуулах;

8.1.2.үндэсний эдийн засгийн ашиг сонирхлыг хангах зорилгоор стратегийн ач холбогдол бүхий ашигт малтмалын орд ашиглах;” Санал гаргасан Улсын Их Хурлын гишүүн Цэнгүүн.

Уянгахишиг гишүүн санал хэлнэ. Микрофоныг өгье.

Г.Уянгахишиг: Энэ дээр ажлын хэсгийн гаргасан саналыг дэмжих, тэгэхдээ дар. нь гүйцээн боловсруулах аваад тодорхой бас саналуудыг тусгаад явуулъя гэдэг саналтай байна. Тийм тэгэх үү? Тэгье. Тийм 8.1 дээр.

Д.Үүрийнтуяа: Байнгын хороо дээр бол саналаа хураагаад явна. Байнгын хороо дээр асуудлыг дэмжээд ажлын хэсгийн зүгээс чуулганы хуралдаан дээр гүйцээн боловсруулах чиглэлээ аваад явъя.

Ажлын хэсгийн саналаар ажлын хэсгийн саналыг дэмжье гэсэн саналын томьёоллоор санал хураалт.

20 гишүүнээс 14 гишүүн 70 хувиар дэмжиж энэ санал дэмжигдлээ.

14 дэх санал дээр мөн Цэнгүүн гишүүний санал давхар орж байгаа. Ажлын хэсгийн саналыг танилцуулъя.

Төслийн 8 дугаар зүйлийн 8.2 дахь хэсгийг хасаж, 8.3 дахь хэсэгт доор дурдсан агуулгатай 2 дахь өгүүлбэр нэмэх:

“Энэ хуулийн 8.1.2-т заасан үндэслэлээр орон нутгийн өмчит компанийг Улсын Их Хурлын зөвшөөрлөөр үүсгэн байгуулж болно.”. Санал гаргасан ажлын хэсэг.

Улсын Их Хурлын гишүүний санал. Төслийн 8 дугаар зүйлийн 8.2, 8.3 дахь хэсгийг доор дурдсан агуулгаар өөрчлөн найруулах:

“8.2.Энэ хуулийн 8.1.1-д заасан нийтийн зориулалттай дэд бүтэц, нийтийн үйлчилгээний салбарт компани үүсгэн байгуулахад хувийн хэвшил дангаараа гүйцэтгэхэд эдийн засаг, санхүүгийн хувьд үр өгөөжгүй байх нөхцөлийг хангасан байна.

8.3.Орон нутаг зөвхөн хуульд заасан чиг үүргээ хэрэгжүүлэх зорилгоор энэ хуулийн 8.1.1, 8.2-т заасан үндэслэлээр орон нутгийн өмчит компанийг үүсгэн байгуулна.”

Ажлын хэсгийн саналаар санал хураалт явуулъя. Санал хураалт

20 гишүүнээс 13 гишүүн 65 хувиар энэ санал дэмжигдлээ.

15.Төслийн 9 дүгээр зүйлийн 9.4 дэх хэсгийн “мэдээлэлд” гэсний өмнө “судалгаа,” гэж, 9.4.1 дэх заалтад “шаардлага” гэсний дараа “буюу хувийн хэвшилтэй өрсөлдөхгүй байх гэсэн бодлоготой нийцэж байгаа эсэх” гэж тус тус нэмж, 9.4.5 дахь заалтын “хугацаа” гэснийг “хугацаатай байх эсэх” гэж, 9.5, 9.6 дахь хэсгийн “хувьцаа эзэмшигч” гэснийг “этгээд” гэж, 9.7 дахь хэсгийн “байгуулах” гэснийг “байгуулж болох” гэж, “заасны дагуу” гэснийг “заасан этгээд” гэж өөрчилж, доор дурдсан агуулгатай 9.8 дахь хэсэг нэмэх:

“9.8.Төрийн болон орон нутгийн өмчит компанийн үйл ажиллагаа явуулах хугацааг сунгах эсэх асуудлыг тухайн хугацаа дуусах оны өмнөх санхүүгийн жилд багтаан шийдвэрлэх бөгөөд үйл ажиллагаа явуулах хугацааг сунгахгүй гэж шийдвэрлэсэн тохиолдолд төрийн болон орон нутгийн эзэмшлийн хувьцаатай холбоотой асуудлыг Компанийн тухай хуульд заасан журмын дагуу шийдвэрлэнэ.”. Санал гаргасан ажлын хэсэг. Санал хураалт.

20 гишүүнээс 14 гишүүн 70 хувиар дэмжиж, энэ санал дэмжигдлээ.

16.Төслийн 10 дугаар зүйлийн 10.3 дахь хэсгийг доор дурдсанаар өөрчлөн найруулж, 10.4 дэх хэсгийн “орон нутгийн” гэсний дараа “өмч давамгайлсан компани, төрийн болон орон нутгийн өмчийн” гэж нэмэх:

“10.3.Төрийн болон орон нутгийн өмчит компанийн дүрэмд Компанийн тухай хуулийн 16.3-т зааснаас гадна компанийн үйл ажиллагааны зорилго, хүрэх үр дүн, хувьцаа эзэмшигч, хувьцаа эзэмшигчийн эрхийг хэрэгжүүлэгчийн талаарх мэдээлэл, ногдол ашгийн бодлого, эсхүл нийтийн үйлчилгээний үүргийн бодлогыг тодорхой тусгана.”. Санал гаргасан ажлын хэсэг. Санал хураалт. 16.10.3 шүү 10.3. 16.2-т.

20 гишүүнээс 14 гишүүн 70 хувиар энэ санал дэмжигдлээ.

17.Төслийн 10 дугаар зүйлд доор дурдсан агуулгатай 10.6 дахь хэсэг нэмэх:

“10.6.Алтан хувьцаа гаргах тохиолдолд компанийн дүрэмд алтан хувьцаа эзэмших этгээд, эрхийн агуулга, хугацааг тусгана.”. Санал гаргасан ажлын хэсэг. Санал хураалт.

20 гишүүнээс 13 гишүүн 65 хувиар дэмжиж, санал дэмжигдлээ.

18.Төслийн 11 дүгээр зүйлд доор дурдсан агуулгатай 11.2, 11.3 дахь хэсэг нэмэх:

“11.2.Төрийн болон орон нутгийн өмчийн компани бусад этгээдтэй хамтран охин, хараат компани үүсгэн байгуулах асуудлыг энэ хуулийн 8.1-д заасан үндэслэлийн дагуу энэ хуулийн 9.4-т заасан судалгаа, шинжилгээ болон Засгийн газрын зөвшөөрлийн дагуу Компанийн тухай хуульд заасны дагуу шийдвэрлэнэ.

11.3.Энэ хуулийн 11.1, 11.2-т заасны дагуу үүсгэн байгуулсан охин, хараат компани дахь төрийн болон орон нутгийн эзэмшлийн хувьцааг толгой компани эзэмшинэ.”. Санал гаргасан ажлын хэсэг. Санал хураалт.

20 гишүүнээс 13 гишүүн 65 хувиар дэмжиж, энэ санал дэмжигдлээ.

19.Төслийн 13 дугаар зүйлийн 13.1 дэх хэсгийн “худалдах” гэснийг “шилжүүлэх” гэж, 13.2 дахь хэсэг, 13.4 дэх хэсгийн “гүйцэтгэх захирлын” гэснийг “гүйцэтгэх удирдлагын” гэж өөрчилж, мөн зүйлийн 13.2.2 дахь заалтыг доор дурдсанаар өөрчлөн найруулж, доор дурдсан агуулгатай 13.2.6, 13.2.7 дахь заалт тус тус нэмэх:

“13.2.2.алтан хувьцаа эзэмшигчийн эрхийг хязгаарласан, хугацааг багасгасан өөрчлөлтийг компанийн дүрэмд оруулах;”

“13.2.6.компанийн хувьцааны хяналтын багцтай хэмжээгээрээ дүйцэхүйц хувьцаа болон хувьцаанд хамаарах бусад үнэт цаасыг нэг болон хэд хэдэн удаагийн дараалсан шийдвэрээр нэмж гаргах;

13.2.7.талууд харилцан тохиролцож, компанийн дүрэмд заасан бусад.” гэж. Санал гаргасан ажлын хэсэг. Санал хураалт.

20 гишүүнээс 13 гишүүн 65 хувиар энэ санал дэмжигдлээ.

20.Дээрх 19 дэх санал дэмжигдсэнтэй холбогдуулан төслийн “гүйцэтгэх захирал” гэснийг “гүйцэтгэх удирдлага” гэж агуулгад нь тохируулан тухай бүрд өөрчлөх. Санал гаргасан ажлын хэсэг. Санал хураалт.

20 гишүүнээс 13 гишүүн 65 хувиар энэ санал дэмжигдлээ.

21.Төслийн 13 дугаар зүйлийн 13.5 дахь хэсгийн “үндэслэлээ” гэснийг “үндэслэл, хоригийн хамрах хүрээг” гэж, 13.8 дахь хэсгийн “заасан” гэснийг “заасны дагуу компанийн дүрэмд тусгасан” гэж өөрчилж, “дахин” гэснийг, 13.6 дахь хэсгийг тус тус хасаж, мөн зүйлд доор дурдсан агуулгатай 13.9 дэх хэсэг нэмэх:

“13.9.Засгийн газар хориг тавих шийдвэр гаргахдаа зорилгодоо нийцсэн байх, компанийн үйл ажиллагаанд хамгийн бага хязгаарлалт тогтоох зарчмыг баримтална.”. Санал гаргасан ажлын хэсэг. Санал хураалт.

20 гишүүнээс 12 гишүүн дэмжиж, 60 хувиар санал дэмжигдлээ.

22.Төслийн 14 дүгээр зүйлийн 14.4 дэх хэсгийн “заасан журмын дагуу” гэснийг “өөрөөр заагаагүй бол” гэж, 14.7 дахь хэсгийн “34-өөс доош” гэснийг “34 хүртэлх” гэж өөрчилж, 14.3 дахь хэсгийг доор дурдсанаар өөрчлөн найруулах:

“14.3.Энэ хуулийн 14.2-т заасны дагуу компанийн энгийн хувьцааны гуравны нэгээс доош хувийг олж авсан бол төр, эсхүл орон нутаг тухайн хувьцааны зах зээлийн үнэ болон бодит үнэ цэнийг тооцон, аль өндөр үнээр тухайн хувьцааг худалдана.”. Санал гаргасан ажлын хэсэг. Санал хураалт.

20 гишүүнээс 12 гишүүн дэмжиж, 60 хувиар санал дэмжигдлээ.

23.Төслийн 15 дугаар зүйлийн гарчгийн, мөн зүйлийн 15.1 дэх хэсгийн “үнэт цаас” гэснийг “өрийн хэрэгсэл” гэж, мөн зүйлийн 15.4 дэх хэсгийн “зөвлөлд” гэсний дараа “/байхгүй бол хувьцаа эзэмшигчийн эрхийг хэрэгжүүлэгчид/” гэж нэмж, мөн зүйлд доор дурдсан агуулгатай 15.5, 15.6, 15.7 дахь хэсэг нэмэх:

“15.5.Төрийн болон орон нутгийн өмчийн компани, төрийн болон орон нутгийн өмч давамгайлсан компани зээл авах, өрийн хэрэгсэл гаргах, баталгаа гаргуулах, санхүүгийн түрээс болон түүнтэй адилтгах үүрэг хүлээхдээ өрийн тогтвортой байдлын дүгнэлтийг хараат бус, мэргэжлийн этгээдээр гаргуулсан байна.

15.6.Энэ хуулийн 15.5-д заасан дүгнэлтэд өрийн нийт хэмжээ, өр ба өөрийн хөрөнгийн харьцаа, мөнгөн урсгал, валютын эрсдэл, хүүгийн эрсдэл, төсвийн болзошгүй өр төлбөр, төрийн баталгааны нөлөөллийг тусгана.

15.7.Төрийн болон орон нутгийн өмчийн компани, төрийн болон орон нутгийн өмч давамгайлсан компани бусад этгээдэд өрийн баталгаа гаргахыг хориглоно.”. Санал гаргасан ажлын хэсэг.

20 гишүүнээс 13 гишүүн дэмжиж, 65 хувиар санал дэмжигдлээ.

24.Төслийн 16 дугаар зүйлийг доор дурдсанаар бүхэлд нь өөрчлөн найруулах:

“16 дугаар зүйл. Ногдол ашгийн бодлого

16.1. Төрийн болон орон нутгийн өмчийн компани, төрийн болон орон нутгийн өмч давамгайлсан компани ногдол ашиг хуваарилахдаа Компанийн тухай хуулийн 46, 47 дугаар зүйлд зааснаас гадна дараах зарчим, шаардлагыг баримтална:

16.1.1. ногдол ашгийг өмнөх оны аудитлагдсан санхүүгийн тайланд туссан татвар төлсний дараах хуваарилж болох цэвэр ашгаас тооцох;

16.1.2. компанийн төлбөрийн чадвар, мөнгөн урсгал, батлагдсан бизнес болон хөрөнгө оруулалтын төлөвлөгөө, их засварын хэрэгцээ, нөөц сан бүрдүүлэх шаардлага, санхүүгийн тогтвортой байдлыг харгалзан үзэх;

16.1.3. нийтийн үйлчилгээний үүрэг хүлээсэн бол тухайн үүргийн санхүүжилт, нөхөн төлбөр, татаас, тарифын зохицуулалтыг ногдол ашиг тооцох сууринаас тусад нь авч үзэх;

16.1.4. компанийн урт хугацааны үнэ цэн, хэвийн үйл ажиллагаа, хөрөнгө оруулалтын чадавхыг дордуулахгүй байх.

16.2. Арилжааны зорилготой төрийн болон орон нутгийн өмчийн компани, төрийн болон орон нутгийн өмч давамгайлсан компани нь тухайн санхүүгийн жилд хуваарилж болох цэвэр ашигтай ажилласан бол ногдол ашиг хуваарилах үүрэгтэй.

16.3. Энэ хуулийн 16.2-т заасан компанийн тухайн жилд хуваарилах ногдол ашгийн зорилтот хувь хэмжээг Засгийн газар, орон нутгийн өмчит компанийн хувьд тухайн шатны иргэдийн Төлөөлөгчдийн Хурал.

16-тай холбоотой, ногдол ашигтай холбоотой санал гаргах юм уу ажлын хэсэг? Сайнзориг гишүүний микрофоныг өгье.

П.Сайнзориг: 16 дээр гаргасан ажлын хэсгийн саналыг татаад би бас хажуугийн санал гаргачхаж байгаа юм. Энэ дээр зүгээр ийм байгаа юм. Цэвэр ашгаас зөвхөн ноогдол ашгийн бодлогыг авчихаар бас зарим компаниудыг бол хувь нийлүүлсэн хөрөнгө болон өмнөх оны санхүүгийн баталгаажуулсан тэр ашгаас байдаг юм уу авах тэр бололцоонуудыг бас бүрдүүлж өгье л гэж байгаа юм. Өөрөөр хэлэх юм бол special dividend гэдэг ойлголт бас олон улсын бас түвшинд бас яригдаж байна. Ийм зүйлүүд байх юм бол бид нар нөгөө Оюу толгой болон бусад зарим компаниудаас цэвэр ашигтай ажиллахыг хүлээхгүйгээр бас шахалт үзүүлж ажиллах тэр бололцоог бүрдүүлье гэдэг байдлаар 16-г бас ажлын дэд хэсэгтэйгээ бас Эрдэнэс Монголынхонтой сайн сууж байгаад бас ингэж нягталж байгаад оруулж ирж байгаа юм.

Тэгээд шаардлагатай гэвэл хураалгачхаад гүйцээн боловсруулахыг чуулган дээрээс аваад бас эргээд нягталж болно гэдэг зүйлийг хэлье.

Д.Үүрийнтуяа: Хажуугийн саналыг гишүүдээс гаргасан саналыг хэлэлцэх үед санал хураалт явуулъя.

24 дэх санал татагдсан учраас 25 дахь саналыг хураая.

Төслийн 18 дугаар зүйлийн 18.1.5 дахь заалтын “компанийн” гэсний дараа “газар,” гэж нэмэхээр. Санал гаргасан ажлын хэсэг. Санал хураалт.

Саяын санал хураалтыг хүчингүй болгоё. Энэ саяын саналтай холбоотой гишүүний зэрэгцсэн санал байгаа юм байна. Тэгэхээр хамтад нь танилцуулж байж эхлээд санал хураалт явах юм байна.

Ажлын хэсгийн саналыг танилцуулсан. Зэрэгцүүлж гаргасан гишүүний санал. Сайнзориг гишүүний санал.

Төслийн 18 дугаар зүйлийн 18.1.5 дахь заалтын “компанийн” гэсний дараа “газар,” гэж. Энэ ажлын хэсгийн санал.

Гишүүний санал. Хуулийн 18 дугаар зүйлд доор дурдсан агуулгатай 18.1.4 дэх заалт, хэсэг нэмэх:

Энэ хуулийн 8.1.2-т заасан үндэслэлээр үүсгэн байгуулсан төрийн өмчит компанийн төрийн эзэмшлийн хувьцааг Улсын Их Хурлын зөвшөөрлийн үндсэн дээр бусдад шилжүүлэх, барьцаалуулах. Санал гаргасан Улсын Их Хурлын гишүүн Сайнзориг.

Тэгэхээр ажлын хэсгийн саналаар санал хураалт явуулъя.

18.1.5 дээр ажлын хэсгийн санал болон дээр нь 8.1.2. Чи наадах чинь 18.1.4 байна шүү дээ. Чи тэгээд яагаад зэрэгцүүлж орж ирээд байгаа юм. Энэ ажлын хэсэг энэ ард ажиллаж байгаа энэ Байнгын хорооныхон битгий ингээд будилуулаад бай. Зэрэгцэж орж ирэхгүй саналыг зэрэгцүүлнэ гээд ингээд санал хураалт будилуулаад байх ямар учиртай юм. Тусдаа саналууд байсан байна. Жаргалан гишүүн санал хэлье.

Б.Жаргалан: Энэ Төрийн болон орон нутгийн өмчит компанийн тухай хуулийн дэд ажлын хэсгийг бол Сайнзориг гишүүн өөрөө ахалсан байгаа. Тэгээд ажлын хэсэг болохлоор хэд хэдэн удаагийн бас хурлыг хийгээд энэ ажлын хэсгийн саналуудыг бол нэгдсэн байдлаар боловсруулсан байгаа. Би нэг зүйлийг гайхаад байгаа нь ажлын хэсгийн саналыгаа дэд ажлын хэсгийн дарга өөрөө татаад гишүүний хувиар өөр санал оруулж ирээд байгаа нь ер нь жоохон ойлгомжгүй байдал үүсгээд байна шүү. Тийм, тэгэхээр яг тодорхой энэ зөрүүтэй байгаа асуудлууд дээрээ гүйцээн боловсруулах авъя гэдгээ хэлээд тэгээд дараа нь дахиад ажлын хэсэг бас сууж хуралдмаар байна.

Эс бөгөөс ингэж яаран сандран хуралдаж байгаа нөхцөлд энэ саналуудыг бол бүтэн бас шийдвэр гаргах хүнд хүндрэлтэй байгаад байна. Тийм тэгэхээр Сайнзориг гишүүн хэдэн санал гаргачихсан байгаад байгаа юм. Тэд нар дээрээ бүгд дээр нь өөрөө шууд гүйцээн боловсруулах авъя энэ тэр гээд яриад явчих тэгэх үү?

Д.Үүрийнтуяа: Жаргалан гишүүний санал бол зөв. Тэгэхээр ажлын хэсгийн даргын хувьд, гишүүний хувьд гаргасан саналуудаа гүйцээн боловсруулах чуулган дээрээ авъя гээд санал нэгтгээд явахаар тэмдэглүүлээд явъя. Ажлын хэсгийн гишүүдийн, гишүүдийн санал руу бол ороогүй байгаа. Сая зэрэгцсэн саналыг бол хамтад нь хураалгах ёстой учраас бас уншсан. Гэхдээ Байнгын хорооны ажлын

алба бас алдаа гаргаад зэрэгцээгүй санал дээр давхар уншуулсан байна. Тийм учраас одоо 25 дахь саналаа дахин танилцуулаад санал хураалт явуулъя.

Төслийн 18 дугаар зүйлийн 18.1.5 дахь заалтын “компанийн” гэсний дараа “газар,” гэж нэмэх. Санал гаргасан ажлын хэсэг. Санал хураалт. Энэ чинь санал уначихлаа. Санал хураалтад оролцсон гишүүд байна уу? Энэ гишүүд гараад явчхав уу яав? Эрдэнэбат гишүүн горимын санал гаргая.

С.Эрдэнэбат: Төхөөрөмж түр гацсан учраас энэ саналыг дахин хурааж өгөөч гэсэн санал хураалгая.

Д.Үүрийнтуяа: Саналыг хүчингүй болгох. Эрдэнэбат гишүүний саналаар энэ саналыг хүчингүй болгох санал хураалт явуулъя.

20 гишүүнээс 11 гишүүн 55 хувиар дэмжиж, энэхүү санал хүчингүй боллоо.

Өмнөх саналаар санал хураалт явуулъя. Ажлын хэсгийн саналыг дэмжье гэсэн томъёоллоор санал хураалт.

Уянгахишиг гишүүн горимын санал гаргая. Гишүүд жоохон анхааралтай хандаарай.

Г.Уянгахишиг: Уучлаарай сая энэ төхөөрөмж ажилласангүй. Саяын санал хураалтыг хүчингүй болгож өгнө үү.

Д.Үүрийнтуяа: Уянгахишиг гишүүний горимын саналаар энэхүү саналыг хүчингүй болгох санал хураалт явуулъя. Санал хураалт.

20 гишүүнээс 11 гишүүн 55 хувиар дэмжиж, энэхүү санал хүчингүй боллоо.

Ажлын хэсгийн саналаар 25 дахь саналаар санал хураалт явуулъя. Санал хураалт. Анхаарлыг сарниулаад байна.

20 гишүүнээс 11 гишүүн 55 хувиар дэмжиж, энэхүү санал дэмжигдлээ.

26 дугаар санал мөн гишүүн Цэнгүүн гишүүний санал давхар орж ирсэн байгаа. Ажлын хэсгийн саналыг танилцуулъя.

Төслийн 20 дугаар зүйлийн 20.1.3 дахь заалтын “санал гаргах” гэснийг “саналын эрхийг хэрэгжүүлэх” гэж өөрчилж, 20.1.5 дахь заалтын “тохиолдолд” гэсний дараа “компанийн дүрэм болон гэрээнд заасан” гэж нэмж, 20.1.4 дэх заалтыг доор дурдсанаар өөрчлөн найруулах:

“20.1.4.төрийн болон орон нутгийн өмчийн компанийн төлөөлөн удирдах зөвлөлийн гишүүн, гүйцэтгэх удирдлага хууль болон компанийн дүрэмд заасан үүргээ зөрчсөн тохиолдолд дүрэм болон гэрээнд заасан хариуцлага хүлээлгэх, компанид хохирол учруулсан бол хохирлыг нөхөн төлөхийг шаардах, шүүхэд төлөөлөн нэхэмжлэл гаргах;”. Санал гаргасан ажлын хэсэг.

Улсын Их Хурлын гишүүн Цэнгүүний санал. Төслийн 20 дугаар зүйлийн 20.1 дэх хэсгийг доор дурдсанаар бүхэлд нь өөрчлөн найруулах:

“20.1.Төрийн өмчийн асуудал эрхэлсэн төрийн захиргааны байгууллага нь төрийн болон орон нутгийн өмчийн компани, төрийн болон орон нутгийн өмчийн оролцоотой компанийн хувьцаа эзэмшигчийн эрхийг хэрэгжүүлэгч байна. Хувьцаа эзэмшигчийн эрхийг хэрэгжүүлэгч дараах бүрэн эрхийг хэрэгжүүлнэ:

20.1.1.төрийн болон орон нутгийн өмчийн компани үүсгэн байгуулах, өөрчлөн байгуулах, татан буулгах, төрийн эзэмшлийн хувьцааг худалдах, шилжүүлэх, алтан хувьцаа гаргах, төрийн өмчийн хөрөнгөөр хөрөнгө оруулалт хийх асуудлаар үндэслэл бүхий санал боловсруулж Засгийн газар, эсхүл иргэдийн Төлөөлөгчдийн Хуралд санал хүргүүлж, холбогдох шийдвэрийн хэрэгжилтийг хангаж, үр дүнг Засгийн газарт тайлагнах;

20.1.2.төрийн болон орон нутгийн өмчийн компанийн төлөөлөн удирдах зөвлөлийн гишүүнийг хуульд заасан журмын дагуу нээлттэй, өрсөлдөөнт зарчмаар сонгон шалгаруулж томилох, чөлөөлөх ажлыг зохион байгуулах;

20.1.3.төрийн болон орон нутгийн өмчийн оролцоотой компанийн төрийн болон орон нутгийн эзэмшлийн хувьцааны хувь хэмжээтэй хувь тэнцүүлэн төлөөлөн удирдах зөвлөлийн гишүүнийг томилох, чөлөөлөх талаар санал гаргах;

20.1.4.төрийн өмчийн болон орон нутгийн өмчийн компанийн төлөөлөн удирдах зөвлөлийн гишүүн хууль зөрчсөн нь эрх бүхий байгууллагын шийдвэрээр тогтоогдсон, компанийн дүрэмд заасан үүргээ биелүүлээгүй тухай үндэслэл бүхий дүгнэлт гарсан бол хариуцлага хүлээлгэх, компанид хохирол учруулсан бол хохирлыг нөхөн төлөхийг шаардах, шүүхэд төлөөлөн нэхэмжлэл гаргах, төрийн болон орон нутгийн өмчийн оролцоотой компанийн хувьд уг асуудлаар хувьцаа эзэмшигчдийн хуралд санал хүргүүлэх;

20.1.5.төрийн болон орон нутгийн өмчит компанийн гүйцэтгэх захирал хууль болон дүрэмд заасан үүргээ зөрчсөн тохиолдолд хариуцлага хүлээлгэх саналаа төлөөлөн удирдах зөвлөлд хүргүүлэх;

20.1.6.төрийн болон орон нутгийн өмчийн компанийн бизнес төлөвлөгөө болон төлөөлөн удирдах зөвлөлийн ажлын төлөвлөгөөний гүйцэтгэлийг үнэлэх;

20.1.7.төрийн болон орон нутгийн өмчийн компанийн эзэмшиж, ашигладаг улсын тусгай хамгаалалттай газар, дэд бүтцийн томоохон барилга, байгууламж, стратегийн ач холбогдол бүхий ашигт малтмалын ордын тодорхой хувь болон тухайн компанийн үндсэн хөрөнгийн 20 хувиас дээш хэмжээний эд хөрөнгийг бусдад эзэмшүүлэх, худалдах, ашиглах эрхийг шилжүүлэх талаарх асуудлаар дүгнэлт гаргаж, Засгийн газарт хүргүүлэх;

20.1.8.төлөөлөн удирдах зөвлөлийн гишүүдийн тоо болон төлөөлөн удирдах зөвлөлийн гишүүд болон гүйцэтгэх захирлын бүрэн эрхийн хугацаа, цалин, урамшууллын хэмжээ хуульд заасан шаардлагад нийцэж байгаа эсэхэд хяналт тавих;

20.1.9.энэ хуулийн 7.1-д заасан төрийн өмчит компанийн талаар баримтлах үндсэн чиглэлийг баримтлан төрийн өмчит компанийн төлөөлөн удирдах зөвлөлтэй 3 жил тутамд зорилт, үр дүнгийн гэрээг шинэчлэн байгуулна.

20.1.10.төрийн өмчийн компанийн үл хөдлөх эд хөрөнгө, газар эзэмших, ашиглах эрхийг шилжүүлэх, зориулалтыг өөрчлөх, худалдах, солих, компанийн өдөр тутмын үйл ажиллагаанд үл хамаарах их хэмжээний хэлцэл хийх шийдвэрийг бүртгэж, хуульд нийцэж байгаа эсэхийг хянах;

20.1.11.төрийн болон орон нутгийн өмчийн оролцоотой компанийн төрийн болон орон нутгийн эзэмшлийн хувьцааны хувь хэмжээтэй хувь тэнцүүлэн төлөөлөн удирдах зөвлөлийн гишүүнийг нээлттэй, өрсөлдөөнт зарчмаар сонгон шалгаруулж томилох, чөлөөлөх талаар санал гаргах;

20.1.12.төрийн болон орон нутгийн өмчит компанийн гүйцэтгэх захирал хууль зөрчсөн нь шүүхийн шийдвэрээр тогтоогдсон болон энэ хуулийн 12.2-т заасан нөхцөл байдал үүссэн, тухайн компанийн зээл, үнэт цаасны хэмжээ нь тогтоосон өрийн дээд хязгаарыг давсан, компанийн үндсэн чиг үүргийг алдагдуулсан, дүрэмд заасан үүргээ биелүүлээгүй нь үндэслэл бүхий дүгнэлтээр тогтоогдсон бол хариуцлага хүлээлгэх саналаа төлөөлөн удирдах зөвлөлд хүргүүлэх;

20.1.13.төрийн болон орон нутгийн өмчийн компанийн бизнес төлөвлөгөө болон төлөөлөн удирдах зөвлөлийн ажлын төлөвлөгөөний гүйцэтгэлийг энэ хуулийн 12.2-т заасан шаардлага болон компаниас гаргасан зээл, үнэт цаасны хэмжээ нь өрийн дээд хязгаарт нийцсэн эсэх, компанийн үндсэн чиг үүргийн хэрэгжилт зэрэг үр дүнд суурилсан шалгуур үзүүлэлтүүдийн дагуу жил бүр тогтсон хугацаанд үнэлэх, төрийн өмчийн компанийн бизнес төлөвлөгөөний хэрэгжилтийг хангуулах талаар шаардлага, зөвлөмж өгч, хэрэгжилтийн тайланг хэлэлцэж дүгнэлт гаргах;

20.1.14.төрийн өмчийн компанийн төрийн өмчийн ашиглалт, хамгаалалт, зарцуулалтад хяналт тавих;

20.1.15.төрийн өмчит компаниас төсөвт төвлөрүүлэх ногдол ашгийг энэ хуульд заасан зарчмыг баримталж, тухайн жилийн төсвийн тухай хуульд заасны дагуу бүрэн төвлөрүүлж байгаа эсэхэд хяналт тавих;

20.1.16.хуульд заасан бусад.". Санал гаргасан Улсын Их Хурлын гишүүн Цэнгүүн.

Улсын Их Хурлын гишүүн Мөнхсоёл санал гаргана.

Б.Мөнхсоёл: Өдрийн мэнд. Тэгэхээр би бас түрүүн санал гаргасантай зарчмын горимын дөхүү санал гаргах гээд байна. Зөвхөн Сайнзориг гишүүн биш ер нь энэ ажлын хэсгээр ороогүй гадуур нь ийм санал гаргаж байгаа асуудлуудыг нэгтгэж байгаад одоо биш ажлын хэсэг дээр оруулж ирж хэлэлцэж байгаад энэ Байнгын хороогоор оруулахыг. Тийм.

Д.Үүрийнтуяа: Үгүй тийм юм байхгүй дүрмээрээ. Уучлаарай дэгээрээ явъя хэдүүлээ. Дэгээрээ явъя. Зэрэгцээд ажлын хэсгийн саналтай гишүүний санал зэрэгцэж гарч ирсэн бол хоёуланг нь уншаад ажлын хэсгийн саналаар түрүүлж санал хураах хуулийн заалттай. Тийм учраас түүгээрээ дэгээрээ явъя.

Ажлын хэсгийн саналыг дэмжье гэсэн саналын томъёоллоор санал хураая.

21 гишүүнээс 11 гишүүн дэмжиж, 52.4 хувийн саналаар санал дэмжигдлээ.

27.Төслийн 22 дугаар зүйлийн 22.2, 22.3 дахь хэсгийг доор дурдсанаар өөрчлөн найруулах:

“22.2.Хувьцаа эзэмшигчдийн хурлын бүрэн эрхийг энэ хуулийн 17.2, 17.5-д заасан этгээд төрийн болон орон нутгийн өмчийн компанийн хувьд дангаараа, төрийн болон орон нутгийн өмч давамгайлсан, эсхүл тэдгээрийн оролцоотой компанийн хувьд бусад этгээдтэй хамтран хэрэгжүүлнэ.

22.3.Компанийн дүрэмд өөрөөр заагаагүй бол төрийн болон орон нутгийн өмчит компанийн нэгдлийн хараат, охин компанийн хувьцаа эзэмшигчдийн хурлын бүрэн эрхийг толгой компанийн гүйцэтгэх удирдлага хэрэгжүүлнэ.”. Санал гаргасан ажлын хэсэг. Санал хураалт.

21 гишүүнээс 11 гишүүн 52.4 хувиар энэ санал дэмжигдлээ.

28.Төслийн 24 дүгээр зүйлийн 24.1.1 дэх заалтын “авлигын,” гэсний дараа “нийтийн албаны ашиг сонирхлын,” гэж нэмж, 24.1.2 дахь заалтын “тухайн салбарт таваас доошгүй жил удирдах албан тушаалд” гэснийг “төрийн өмчит компанийн хувьд удирдах албан тушаалд таваас доошгүй, орон нутгийн өмчит компанийн хувьд удирдах албан тушаалд хоёроос доошгүй жил” гэж, “хууль” гэснийг “эрх зүй” гэж өөрчилж, 24.1.6.а. заалтын “өөрөө” гэснийг “дангаараа” гэж өөрчилж, “дангаараа болон” гэснийг хасаж, 24.6 дахь хэсгийн “гуравны нэгээс доошгүй” гэснийг “олонх” гэж өөрчлөх. Санал гаргасан ажлын хэсэг. Санал хураалт.

21 гишүүнээс 11 гишүүн дэмжиж 52.4 хувиар энэ санал дэмжигдлээ.

29 дэх санал, ажлын хэсгийн санал. Төслийн 24 дүгээр зүйлийн 24.4, 24.5 дахь хэсгийг доор дурдсанаар өөрчлөн найруулах:

“24.4.Арилжааны зорилго бүхий төрийн болон орон нутгийн өмчит компанийн төлөөлөн удирдах зөвлөл нь сондгой тооны таваас ес хүртэлх гишүүнтэй байна.

24.5.Энэ хуулийн 24.4-т заасан төлөөлөн удирдах зөвлөлийн бүрэлдэхүүний нэг гишүүн нь хувьцаа эзэмшигчийн эрхийг хэрэгжүүлэгчээс томилсон этгээд байна.”. Санал гаргасан ажлын хэсэг.

Энэ санал дээр Улсын Их Хурлын гишүүн Цэнгүүн санал гаргасан байгаа. Цэнгүүн гишүүний саналыг танилцуулъя.

Төслийн 24 дүгээр зүйлийн 24.5 дахь хэсгийг доор дурдсанаар өөрчлөн найруулах:

“24.5.Төрийн албан хаагч нь энэ хуулийн 24.4-т заасан төлөөлөн удирдах зөвлөлийн гишүүнд нэр дэвшихийг хориглоно.” гэж. Санал гаргасан Улсын Их Хурлын Цэнгүүн. Уянгахишиг гишүүн саналтай юу, үгүй юу? Санал хураалт явуулах уу? Ер нь бол гүйцээн боловсруулах чиглэлийг эргээд нөгөө чуулган дээр авах учраас давхар санал гаргасныг дандаа гүйцээн боловсруулах аваад явчихъя. Ажлын хэсгийн саналаар санал хураалт явуулъя. Санал хураалт.

21 гишүүнээс 11 гишүүн дэмжиж 52.4 хувиар энэ санал дэмжигдлээ.

Улсын Их Хурлын гишүүд зэрэгцэж гаргаж байгаа санал, ажлын хэсгийн саналд тусгах шаардлагатай саналууд байгаа учраас зэрэгцэж гарсан саналууд дээр Улсын Их Хурлын чуулганы хуралдаан дээр гүйцээн боловсруулах аваад явъя.

30.Төслийн 24 дүгээр зүйлийн 24.7 дахь хэсгийн “нийтийн зориулалттай дэд бүтэц,” гэснийг хасаж, “таваас илүүгүй сондгой тооны” гэснийг “таван” гэж, “хоёр хүртэлх гишүүн нь төрийн захиргааны албан хаагч, хоёроос доошгүй нь мэргэжлийн хараат бус гишүүн байж болно” гэснийг “гуравны нэгээс доошгүй нь хараат бус гишүүн байна” гэж, 24.8 дахь хэсгийн “хувьцаа эзэмшигчийн эрхийг хэрэгжүүлэгчээс томилсон этгээд байна.” гэснийг “энэ хуулийн 28 дугаар зүйлд заасны дагуу сонгон шалгаруулалтын үндсэн дээр томилогдсон этгээд байна.” гэж тус тус өөрчлөх. Санал гаргасан ажлын хэсэг. Санал хураалт.

21 гишүүнээс 11 гишүүн дэмжиж 52.4 хувиар энэ санал дэмжигдлээ.

31.Төслийн 27 дугаар зүйлийн гарчгийн “гишүүнд нэр дэвшигчээс” гэснийг “сонгон шалгаруулалтад оролцогчоос” гэж, мөн зүйлийн 27.1 дэх хэсгийн “гишүүнд нэр дэвшигчийг” гэснийг “гишүүнийг” гэж, 27.2 дахь хэсгийн “нэр дэвших” гэснийг “сонгон шалгаруулалтад оролцох” гэж, 27.2.3 дахь заалтын “нэр дэвшигч” гэснийг “сонгон шалгаруулалтад оролцогч” гэж тус тус өөрчилж, 27.3 дахь хэсгийг хасах. Санал гаргасан ажлын хэсэг. Санал хураалт.

21 гишүүнээс 12 гишүүн 57.1 хувиар дэмжиж, санал дэмжигдлээ.

32.Төслийн 28 дугаар зүйлийн 28.2 дахь хэсгийн “хувьд” гэсний дараа “хувьцаа эзэмшигчийн эрхийг хэрэгжүүлэгч нь” гэж нэмж, 28.5 дахь хэсгийн “компани болон хувьцаа эзэмшигчид” гэснийг “компанид” гэж өөрчилж, 28.7 дахь хэсгийн “гурван” гэснийг “хоёр” гэж өөрчилж, “нэг удаа” гэсний дараа “хоёр жил хүртэл хугацаагаар” гэж нэмж, 28.8 дахь хэсгийн “тушаалаар” гэснийг “тушаалын байдлаар” гэж өөрчлөх. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

33.Төслийн 29 дүгээр зүйлийн 29.1.2 дахь заалтын “заавал оролцож” гэснийг “биечлэн, эсхүл зайнаас оролцох” гэж, 29.1.6 дахь заалтын “түүний хамаарал бүхий этгээд” гэснийг “нэгдмэл сонирхолтой этгээд нь” гэж өөрчилж, 29.1.8 дахь заалтыг хасах. Санал гаргасан ажлын хэсэг. Санал хураалт.

Пунсалмаа гишүүн горимын санал гаргая.

Б.Пунсалмаа: Төхөөрөмж ажилласангүй. Тийм учраас горимын санал гаргаад дахин санал хураалгая.

Д.Үүрийнтуяа: Пунсалмаа гишүүний саналаар энэ саналыг хүчингүй болгох санал хураалт явуулъя. Санал хураалт.

Батчимэг гишүүнд санал өгье.

П.Батчимэг: Техникийн алдаа гарлаа. Тэгээд энэ саналыг хүчингүй болгож дахин санал хураалгая.

Д.Үүрийнтуяа: Батчимэг гишүүний саналаар энэ саналыг хүчингүй болгох санал хураалт явуулъя. Санал хураалт.

21 гишүүнээс 12 гишүүн 57.1 хувиар дэмжиж, санал дэмжигдэж энэ санал хүчингүй боллоо.

Ажлын хэсгийн саналаар санал хураалт явуулъя. Санал хураалт. 21 гишүүнээс 12 гишүүн санал 12 гишүүн дэмжиж, 57.1 хувиар санал дэмжигдлээ.

34.Төслийн 29 дүгээр зүйлийн 29.2 дахь хэсгийг доор дурдсанаар өөрчлөн найруулах:

“29.2.Төрийн болон орон нутгийн өмчийн компанийн төлөөлөн удирдах зөвлөлийн хурлын ирц гишүүдийн дийлэнх олонх оролцсоноор хүчинтэй болно. Төлөөлөн удирдах зөвлөлийн шийдвэр нийт гишүүдийн олонхын саналаар хүчин төгөлдөр болно.”. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

35.Төслийн 29 дүгээр зүйлийн 29.3 дахь хэсгийн “жагсаалт,” гэсний дараа “холбогдох материалыг” гэж нэмж, “доошгүй” гэснийг “дээшгүй” гэж өөрчилж, 29.4 дэх хэсгийн “дарга,” гэсний дараа “эсхүл гишүүн” гэж нэмэх. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар энэ санал дэмжигдлээ.

36.Төслийн 29 дүгээр зүйлийн 29.6 дахь хэсгийг доор дурдсанаар өөрчлөн найруулах:

“29.6.Хувьцаа эзэмшигчийн эрхийг хэрэгжүүлэгч нь төлөөлөн удирдах зөвлөлийн гишүүний санал өгөх, бүрэн эрхээ хэрэгжүүлэхэд удирдамж, чиглэл өгөхийг хориглоно.”. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар энэ санал дэмжигдлээ.

37.Дээрх 36 дахь санал дэмжигдсэнтэй холбогдуулан төслийн 29 дүгээр зүйлд доор дурдсан агуулгатай 29.7 дахь хэсэг нэмэх:

“29.7.Төлөөлөн удирдах зөвлөлийн гишүүн нь аливаа чиглэл, санал, зөвлөмжийг биелүүлсэн нь энэ хууль болон Компанийн тухай хуульд заасан хариуцлагаас чөлөөлөх үндэслэл болохгүй.”. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

38.Төслийн 30 дугаар зүйлийн 30.1 дэх хэсгийн “урамшуулал авч болно” гэснийг “урамшуулалтай байна” гэж, 30.2 дахь хэсгийн “эзэмшигчдийн хурлаас” гэснийг “эзэмшигчийн эрхийг хэрэгжүүлэгч” гэж, 30.8 дахь хэсгийн “өмчит” гэснийг “өмчийн” гэж, “гишүүний ажлын гүйцэтгэлийн үр дүнг үнэлж,” гэснийг “гишүүнд” гэж

тус тус өөрчилж, 30.2.2 дахь заалтын “төрийн өмчийн асуудал эрхэлсэн төрийн захиргааны байгууллагын санал болон” гэснийг хасаж, “харгалзан” гэснийг “баримтлан” гэж өөрчилж, 30.2.1 дэх заалтыг доор дурдсанаар өөрчлөн найруулах:

“30.2.1.нийтийн үйлчилгээний төрийн болон орон нутгийн өмчийн компанийн хувьд төлөөлөн удирдах зөвлөлийн гишүүний цалин, урамшууллын хэмжээг тухайн компанийн гүйцэтгэх удирдлагын албан тушаалтны цалингийн жишгийг харгалзан төрийн өмчийн асуудал эрхэлсэн төрийн захиргааны байгууллагын саналаар,” гэж өөрчлөх. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

39.Төслийн 32 дугаар зүйлийн 32.1.2 дахь заалтын “хууль” гэснийг “эрх зүй” гэж өөрчилж, мөн зүйлийн 32.4 дэх хэсгийг хасах. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

40.Төслийн 33 дугаар зүйлийн 33.1 дэх хэсгийн “нэг” гэснийг “гурав хүртэлх” гэж өөрчилж, “хугацаатай” гэсний дараа “даалгаврын” гэж нэмж, 33.3 дахь хэсгийн “Хөдөлмөрийн тухай хуулийн 72.1-д заасны дагуу” гэснийг хасаж, “үүрэг” гэсний өмнө “нууц хадгалах” гэж нэмэх. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

41.Төслийн 34 дүгээр зүйлийн 34.1.1 дэх заалтын “хувьцаа, өөрийн хөрөнгийг урт хугацаанд” гэснийг “ашигт ажиллагааг” гэж, 34.1.8 дахь заалтын “заасан үйл ажиллагаанд үл хамаарах зардлыг” гэснийг “зааснаас бусад үйл ажиллагааг” гэж тус тус өөрчлөх. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

42.Төслийн 36 дугаар зүйлийн 36.1.1, 36.1.2, 36.1.13 дахь заалтын “3” гэснийг “хоёр” гэж, 36.1.3 дахь заалтын “өргөдөл” гэснийг “хүсэлт” гэж тус тус өөрчилж, 36.1.4 дэх заалтын “ноцтой” гэсний өмнө “эсхүл” гэж нэмж, 36.5 дахь хэсгийн “нийтийн зориулалттай дэд бүтэц, нийтийн үйлчилгээг хангах зайлшгүй шаардлагатай, эсхүл зүй ёсны монопол үйл ажиллагаа эрхэлдэг” гэснийг “нийтийн үйлчилгээний” гэж өөрчлөх. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

43. 44.Төслийн 37 дугаар зүйлийн 37.9 дэх хэсгийн бүтцэд хамаарах тодорхой тооны гэснийг дотоод гэж өөрчилж, 37.10 дахь хэсгийн. 43 тийм байна уучлаарай. 43-ыг унших ёстой юм байна шүү.

43.Төслийн 37 дугаар зүйлийн 37.4, 37.5 дахь хэсгийг хасаж, 37.6 дахь хэсгийн “өмчит” гэснийг “өмчийн” гэж, “жагсаалт болон аудит хийх хуулийн этгээдийг сонгон шалгаруулах этгээдийг Засгийн газар тогтооно” гэснийг “жагсаалтыг Засгийн газар батална” гэж өөрчилж, мөн хэсгийн “этгээдээр” гэсний дараа “санхүүгийн” гэж нэмэх. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

44.Төслийн 37 дугаар зүйлийн 37.9 дэх хэсгийн “бүтцэд хамаарах тодорхой тооны” гэснийг “дотоод” гэж өөрчилж, 37.10 дахь хэсгийн “ээлжит бус” гэсний дараа “дотоод” гэж нэмж, 37.12 дахь хэсгийн “нэгжгүй байж болох бөгөөд” гэснийг “нэгж байгуулахгүйгээр” гэж, “ажиллана” гэснийг “ажиллуулна” гэж тус тус өөрчлөх. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

45.Төслийн 37 дугаар зүйлийн 37.7 дахь хэсгийн “гурван үзүүлэлтийн хоёроос доошгүйг” гэснийг “нөхцөлийг” гэж өөрчилж, 37.8 дахь хэсгийн “хувьцаа эзэмшигчийн эрхийг хэрэгжүүлэгчийн зөвшөөрлөөр” гэснийг, 37.7.3 дахь заалтыг тус тус хасах. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

46.Төслийн 38 дугаар зүйлийн 38.1.5 дахь заалтын “зөв,” гэсний дараа “, бүрэн” гэж нэмж, 38.1.7 дахь заалтын “гүйцэтгэлийн” гэснийг хасах. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

47.Төслийн 39 дүгээр зүйлийн 39.1 дэх хэсгийн “хянуулахаар” гэснийг “батлуулахаар” гэж өөрчлөх. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

48.Төслийн 40 дүгээр зүйлийн 40.4 дэх хэсгийн “үнэлгээний” гэсний өмнө “арилжааны зорилго бүхий төрийн болон орон нутгийн өмчийн компанийн гүйцэтгэлийн” гэж, 40.4.2 дахь заалтын “байгуулалт,” гэсний дараа “засаглал, эрсдэлийн удирдлага” гэж нэмэх. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

49.Төслийн 40 дүгээр зүйлд доор дурдсан агуулгатай 40.5 дахь хэсэг нэмэх:

“40.5.Энэ хуулийн 40.3-т заасан нийтийн үйлчилгээний компанийн гүйцэтгэлийн үнэлгээний шалгуурт дараах асуудлыг хамааруулна:

40.5.1.компанийн бизнес төлөвлөгөөний хэрэгжилтийн түвшин болон нийтийн үйлчилгээний үүргийн биелэлт;

40.5.2.компанийн бүтэц, зохион байгуулалт, засаглал, эрсдэлийн удирдлага, хүний нөөцийн зохистой менежмент;

40.5.3.санхүүгийн менежмент, төсвийн хэмнэлт, хэтрэлт, төсөв, татаасын ашиглалт, нэгж үйлчилгээний өртөг, зардлын үр ашиг;

40.5.4.үйлчилгээний чанар, хүртээмж;

40.5.5.ашиглаж байгаа үндсэн хөрөнгө, дэд бүтцийн найдвартай ажиллагаа;

40.5.6.мэдээллийн ил тод байдал.” Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

50.Төслийн 40 дүгээр зүйлийн 40.9 дэх хэсгийн “3 жил” гэснийг “2 жил” гэж өөрчилж, мөн зүйлд доор дурдсан агуулгатай 40.10, 40.11 дэх хэсэг, Тайлбар хэсэг нэмэх:

“40.10.Эрх бүхий байгууллагын шийдвэрээр нийтийн ашиг сонирхлын зорилгоор үнэ, тарифыг өртгөөс доогуур тогтоосон, эсхүл нийтийн үйлчилгээний үүргийн хүрээнд компанид нэмэлт санхүүгийн үүрэг хүлээлгэснээс үүссэн орлогын зөрүү, алдагдлыг компанийн үйл ажиллагааны үр ашиггүй байдалд тооцохгүй бөгөөд гүйцэтгэлийн үнэлгээнд нотлох баримтад үндэслэн залруулж тусгана.

40.11.Төлөөлөн удирдах зөвлөл нь энэ хуулийн 40.3-т заасан журамд нийцүүлэн компанийн тэнцвэржүүлсэн гүйцэтгэлийн үнэлгээний аргачлалыг баталж, хэрэгжилтэд хяналт тавина. Уг аргачлалд энэ хуулийн 40.4, 40.5-д заасан болон тухайн компанийн үйл ажиллагааны онцлогт нийцсэн бусад үзүүлэлтийг уялдуулан үнэлэх, тайлагнах, бизнес төлөвлөгөө боловсруулах, гүйцэтгэлийн зорилт, арга хэмжээг тодорхойлох зохицуулалтыг тусгана.

Тайлбар: -Энэ хуулийн “Тэнцвэржүүлсэн гүйцэтгэлийн үнэлгээний аргачлал” гэж төрийн болон орон нутгийн өмчит компанийн стратеги, бизнес төлөвлөгөөний хэрэгжилтийг санхүүгийн үр дүн, нийгэм, эдийн засагт үзүүлэх үр нөлөө, хэрэглэгчийн сэтгэл ханамж, үйлчилгээний чанар, үйл ажиллагааны үр ашиг, байгууллагын чадавх, хүний нөөцийн хөгжлийн үзүүлэлтээр тэнцвэртэй хэмжиж, үнэлэх, тайлагнах арга зүйн зохицуулалтыг ойлгоно.”. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

51.Төслийн 41 дүгээр зүйлийн 41.3 дахь хэсгийн “ажлыг” гэснийг “ажил үүргийг” гэж, 41.4 дэх хэсгийн “03 дугаар сарын 01-ний” гэснийг “05 дугаар сарын 15-ны” гэж тус тус өөрчлөх. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

52.Төслийн Наймдугаар бүлгийн гарчгийг “Нэмэлт хувьцаа гаргах, төрийн эзэмшлийн хувьцааг шилжүүлэх, компанийг өөрчлөн байгуулах, татан буулгах” гэж өөрчлөх. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

53.Төслийн 44 дүгээр зүйлийн дугаарыг 43 болгож, доор дурдсанаар өөрчлөн найруулах:

43 дугаар зүйл.Нэмэлт хувьцаа гаргах, төрийн эзэмшлийн хувьцааг шилжүүлэх, худалдах, үнэт цаасны зах зээлд санал болгох

“43.1.Төрийн болон орон нутгийн өмчит компани энэ хууль, Компанийн тухай хууль, Үнэт цаасны зах зээлийн тухай хууль болон холбогдох бусад хуульд

нийцүүлэн дараах хэлбэрээр хувьцаа, үнэт цаасыг үнэт цаасны зах зээлд санал болгож болно:

43.1.1.нэмэлт хувьцаа гаргаж, анхдагч зах зээлд нийтэд санал болгох;

43.1.2.төр, орон нутгийн эзэмшлийн хувьцааг хоёрдогч зах зээлд санал болгох, эсхүл хуульд заасан бусад хэлбэрээр худалдах;

43.1.3.нэмэлт хувьцаа гаргах болон төр, орон нутгийн эзэмшлийн хувьцааг худалдах ажиллагааг хослуулан хэрэгжүүлэх;

43.1.4.дотоодын болон олон улсын үнэт цаасны зах зээлд давхар бүртгэл хийх, хадгаламжийн бичиг болон хувьцаанд хамаарах үнэт цаас гаргах.

43.2.Энэ хуулийн 43.1-д заасан шийдвэрийг төрийн өмчийн компанийн хувьд Засгийн газар, орон нутгийн өмчийн компанийн хувьд тухайн шатны иргэдийн Төлөөлөгчдийн Хурал гаргана. Стратегийн ач холбогдол бүхий салбарт үйл ажиллагаа явуулж байгаа төрийн өмчит компанийн хувьцааг нийтэд нээлттэй, эсхүл хаалттай хүрээнд санал болгох, төрийн эзэмшлийн хувьцааг худалдах асуудлыг Засгийн газар Улсын Их Хуралд танилцуулж, хуульд заасан бол Улсын Их Хурлын зөвшөөрлийг авна.

43.3.Төрийн болон орон нутгийн өмчит компанийн хувьцаа, түүнд хамаарах үнэт цаасыг санал болгох ажиллагааг дараах зорилгоор хэрэгжүүлнэ:

43.3.1.компанийн үйлдвэрлэл, үйл ажиллагааг өргөжүүлэх, техник, технологийг шинэчлэл хийх, өрсөлдөх чадвар, санхүүгийн тогтвортой байдлыг дээшлүүлэх;

43.3.2.компанийн засаглал, ил тод байдал, олон нийтийн хяналтыг нэмэгдүүлэх;

43.3.3.төрийн өмчийн оролцоог зохистой хэмжээнд бууруулах, хөрөнгийн зах зээлийг хөгжүүлэх;

43.3.4.Монгол Улсын иргэн, Үндэсний баялгийн сан, тэтгэврийн сан болон дотоодын мэргэжлийн хөрөнгө оруулагчийн оролцоог нэмэгдүүлэх;

43.3.5.газрын хэвлийн баялгийн өгөөжийг нийт иргэнд хүртээмжтэй, ил тод, зах зээлийн зарчмаар хүргэх;

43.3.6.төрийн өмчит компанийн талаар баримтлах бодлого, компанийн дүрэмд заасан бусад.

43.4.Төрийн болон орон нутгийн өмчит компанийн хувьцаа, түүнд хамаарах үнэт цаасыг санал болгох ажиллагааг дараах үе шатлалаар, эсхүл аль нэгийг сонгож, эсхүл хослуулан хэрэгжүүлж болно:

43.4.1.Монгол Улсын иргэн, Үндэсний баялгийн сан, тэтгэврийн сан, даатгалын сан, хөрөнгө оруулалтын сан болон дотоодын мэргэжлийн хөрөнгө оруулагчдад хаалттай захиалгын аргаар санал болгох;

43.4.2.дотоодын үнэт цаасны зах зээлд нийтэд нээлттэй хэлбэрээр санал болгох;

43.4.3.олон улсын үнэт цаасны зах зээлд давхар бүртгэл хийх замаар санал болгох.

43.5.Энэ хуулийн 43.4.1-д заасан хаалттай захиалгын аргаар санал болгох ажиллагаанд оролцох эрх бүхий этгээд, захиалгын доод болон дээд хэмжээ, нэг этгээдийн эзэмших дээд хязгаар, давуу эрх, төлбөр тооцоо, хуваарилалтын асуудлыг тухай бүр Засгийн газар хууль тогтоомжийн хүрээнд шийдвэрлэнэ.

43.6.Энэ хуулийн 43.2-т заасан салбарын төрийн өмчит компанийн хувьцаа, түүнд хамаарах үнэт цаасыг хаалттай захиалгын аргаар санал болгоход дараах зарчмыг баримтална:

43.6.1.тэгш, шударга, ил тод оролцох боломж олгох;

43.6.2.нэг этгээдэд хэт төвлөрөл үүсэхээс сэргийлэх;

43.6.3.хувьцааны үнэ, үнэлгээ, эрсдэл, ногдол ашиг, саналын эрх, хязгаарлалт, захиалгын нөхцөлийг нийтэд хүртээмжтэй мэдээлэх;

43.6.4.захиалга давсан тохиолдолд хувьцааг хувь тэнцүүлэн хуваарилах;

43.6.5.иргэдийн хувьцааг богино хугацаанд төвлөрүүлэн худалдан авах, дамжуулан худалдах, зах зээлийг урвуулан ашиглах эрсдэлээс сэргийлэх зохицуулалт тогтоох.

43.7.Энэ хуулийн 43.2-т заасан салбарын төрийн өмчит компанийн хувьцааг санал болгоход төрийн эзэмшлийн доод хэмжээ, саналын эрх, алтан хувьцаа, мэргэжлийн хөрөнгө оруулагчийн оролцоо, гадаадын хөрөнгө оруулагчийн эзэмшлийн хязгаарыг тухайн компанийн онцлогт нийцүүлэн шийдвэрлэнэ.

43.8.Төрийн болон орон нутгийн өмчийн компанийн бүтээмжийг нэмэгдүүлэх, ур чадвартай ажилтныг тогтвортой ажиллуулах, дотоод хяналтыг сайжруулах зорилгоор ажилтнуудад эзэмшүүлэх давуу эрхийн хувьцаа, опционыг Компанийн тухай хуульд заасны дагуу гаргаж болно.

43.9.Энэ хуулийн 43.8-д заасан давуу эрхийн хувьцаа, опцион гаргахтай холбоотой журмыг төрийн өмчийн асуудал эрхэлсэн төрийн захиргааны байгууллага батална.

Тайлбар: -Энэ зүйлд заасан “хаалттай захиалга” гэж төрийн болон орон нутгийн өмчит компанийн хувьцаа, түүнд хамаарах үнэт цаасыг хууль, Засгийн газрын шийдвэр, эсхүл эрх бүхий байгууллагын баталсан журмаар урьдчилан тодорхойлсон хөрөнгө оруулагчийн хүрээнд Үнэт цаасны зах зээлийн тухай хуулийн 11.2-т заасны дагуу санал болгох ажиллагааг.

Тайлбар: -Энэ зүйлд заасан “нээлттэй захиалга” гэж төрийн болон орон нутгийн өмчит компанийн хувьцаа, түүнд хамаарах үнэт цаасыг Үнэт цаасны зах зээлийн тухай хуулийн 11.1-д заасан журмын дагуу нийтэд санал болгох ажиллагааг”. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

54.Төслийн 45 дугаар зүйлд доор дурдсан агуулгатай 45.3, 45.4 дэх хэсэг нэмэх:

“45.3.Төрийн өмчийн компанийн эд хөрөнгийн тооллого хийж, дуусгалтын тайлан, тэнцэл үйлдэн, эд хөрөнгийг хэсэгчлэн шилжүүлэх, эсхүл дуудлагаар худалдах ажлыг Засгийн газрын шийдвэрийг үндэслэн төрийн өмчийн асуудал эрхэлсэн төрийн захиргааны байгууллага эрхлэн гүйцэтгэнэ.

45.4.Орон нутгийн өмчийн компанийн эд хөрөнгийн тооллого хийж, дуусгалтын тайлан, тэнцэл үйлдэн, эд хөрөнгийг хэсэгчлэн шилжүүлэх, эсхүл дуудлагаар худалдах ажлыг иргэдийн Төлөөлөгчдийн Хурлын шийдвэрийг үндэслэн орон нутгийн өмчийн газар эрхлэн гүйцэтгэнэ.”. Санал гаргасан ажлын хэсэг. Санал хураалт.

21 гишүүнээс 12 гишүүн 57.1 хувийн саналаар дэмжиж, санал дэмжигдлээ.

55.Дээрх 54 дэх санал дэмжигдсэнтэй холбогдуулан төслийн 46 дугаар зүйлийг хасах. Санал гаргасан ажлын хэсэг.

21 гишүүнээс 12 гишүүн 57.1 хувиар санал дэмжигдлээ.

56.Төслийн 47 дугаар зүйлийн 47.5 дахь хэсгийг хасах. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

57.Төслийн 48 дугаар зүйлийн 48.2 дахь хэсгийн “байгуулахыг” гэснийг “байгуулах, сангийн хөрөнгийг зарцуулах шийдвэрийг” гэж, “шийдвэрлэнэ” гэснийг “гаргана” гэж өөрчилж, 48.3 дахь хэсгийг доор дурдсанаар өөрчлөн найруулах:

“48.3.Энэ хуулийн 48.1-д заасан нөөц сангийн хөрөнгийг дараах арга хэмжээг санхүүжүүлэхэд зарцуулна:

48.3.1.компанийн үйлдвэрлэл, үйл ажиллагааг өргөжүүлэх, технологийг шинэчлэх;

48.3.2.давагдашгүй хүчин зүйл, зах зээлийн гэнэтийн өөрчлөлт болон бусад урьдчилан таамаглах боломжгүй эрсдэлийн сөрөг нөлөөллийг бууруулах.”. Санал гаргасан ажлын хэсэг. Санал хураалт.

21 гишүүнээс 11 гишүүн дэмжиж, 52.4 хувиар санал дэмжигдлээ.

58.Төслийн 49 дүгээр зүйлийн 49.1.1 дэх заалтыг доор дурдсанаар өөрчлөн найруулж, 49.1.7 дахь заалтын “компанийн эсрэг, эсхүл” гэснийг хасаж, 49.1.14 дэх заалтын “дэмжлэг,” гэсний дараа “татаас,” гэж нэмэх:

“49.1.1.компанийн төсөв, бизнес төлөвлөгөө;”. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

59.Ажлын хэсгээс, ажлын хэсгийн дэд дарга Сайнзориг гишүүнд микрофон өгье.

П.Сайнзориг: Баярлалаа Үүрийнтуяа дарга. Энэ шилжилтийн үеийн зохицуулалт руу орж ирж байгаа. Энэ дээр байгаа ажлын хэсгийн санал бол татчихъя. Ажлын хэсгийн гишүүд бүгдэд нь танилцуулаад одоо энэ хууль хүчин төгөлдөр болохоос өмнөх тэр орон нутгийн өмчит уул уурхайн чиглэлийн компаниудыг энэ хуулийн зөвшөөрөл авах үйл ажиллагаанд хамаарахгүй байдлаар шилжилтийн үнэ зохицуулалтыг бол ингээд шийдчихье гэдэг дээр тохирсон. Би зүгээр техникийн хувьд бол ингээд нэрээрээ 2 хоногийн өмнө санал ингээд бичээд өгчихсөн байгаа.

Тэгээд энэ дээрээ бас яах вэ ер нь яах вэ оруулчихъя. Тэгээд бас болно биз дээ. Шаардлагатай гэвэл гүйцээн боловсруулсан нэмж хасах юмнууд байвал хийгээрэй.

Д.Үүрийнтуяа: Байнгын хороо санал хураагаад чуулган дээр гүйцээн боловсруулах аваад явах нь зөв байх. Тэгэхгүй бол таны саналыг бас оруулж болохгүй. Сэддорж даргатай тэрийг тайлбарлаад ойлгуулаад явчихъя. Сэддорж даргын саналыг тусгах үүднээс гүйцээн боловсруулах чиглэл авъя гэдгийг ажлын хэсгийн даргын хувьд би санал гаргаад явъя.

59 дүгээр саналыг уншаад уншиж танилцуулъя тээ. Уншчихсан дээр байх. Энийг уншъя.

Төслийн 51 дүгээр зүйлд доор дурдсан агуулгатай 51.3, 51.4 дэх хэсэг нэмэх:

“51.3.Энэ хуулийн 24.6-д заасан зохицуулалтыг 2028 оны 07 дугаар сарын 01-ний өдөр хүртэл хугацаанд үе шаттайгаар хэрэгжүүлнэ.

51.4.Тухайн шатны иргэдийн Төлөөлөгчдийн Хурал орон нутгийн өмчит компанийг энэ хуулийн 8.3-т нийцүүлэх арга хэмжээг 2028 оны 01 дүгээр сарын 01-ний өдрийн дотор зохион байгуулна.”. Санал гаргасан ажлын хэсэг. Энэ саналаа Байнгын хороогоороо дэмжчихээд чуулган дээр гүйцээн боловсруулах авах саналтай байна. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

60.Дагаж мөрдөх хугацааг “2027 оны 01 дүгээр сарын 01-ний өдрөөс дагаж мөрдөнө” гэж өөрчлөх. Санал гаргасан ажлын хэсэг. Санал хураалт.

21 гишүүнээс 13 гишүүн 61.9 хувиар санал дэмжигдлээ.

61.Төрийн болон орон нутгийн өмчит компанийн төлөөлөн удирдах зөвлөлийн дарга, гишүүний бүрэн эрхийн хугацаа хоёр жилээс хэтрэхгүй байх бөгөөд нэг удаа хоёр жил хүртэл хугацаагаар улируулан томилох тухай зохицуулалт дэмжигдсэнтэй холбогдуулан Төрийн хэмнэлтийн тухай хуулийн 15 дугаар зүйлийн 15.4 дэх хэсгийг хүчингүй болгох тухай хуулийн төслийг боловсруулах.”. Санал гаргасан ажлын хэсэг. Санал хураалт.

21 гишүүнээс 13 гишүүн дэмжиж, 61.9 хувиар санал дэмжигдлээ.

62.Төрийн өмчийн компанийн үйл ажиллагаанд олон улсад хүлээн зөвшөөрөгдсөн аудитын хуулийн этгээдээр санхүүгийн аудит хийлгэх тохиолдолд тухайн санхүүгийн жилд аудит хийлгэх компанийн жагсаалтыг Засгийн газар батлах зохицуулалт дэмжигдсэнтэй холбогдуулан Төрийн аудитын тухай хуульд нэмэлт, өөрчлөлт оруулах тухай хуулийн төсөл боловсруулах. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

Найруулгын санал.

1.Төслийн 7 дугаар зүйлийн 7.4 дэх хэсэг, 9 дүгээр зүйлийн 9.3.2 дахь заалт, 11 дүгээр зүйлийн 11.1 дэх хэсгийн “байгуулах” гэсний өмнө, 8 дугаар зүйлийн 8.4 дэх хэсгийн “байгуулна” гэсний өмнө, “үүсгэн” гэж, 20 дугаар зүйлийн 20.1.5 дахь заалтын “дүрэмд” гэсний өмнө “компанийн” гэж, 12 дугаар зүйлийн 12.2 дахь хэсгийн “зөвлөл” гэсний дараа “/байхгүй бол гүйцэтгэх удирдлага/”, 45 дугаар зүйлийн 45.2 дахь хэсгийн “комисс” гэсний өмнө “татан буулгах” гэж тус тус нэмэх.

2.Төслийн 12 дугаар зүйлийн 12.3 дахь хэсгийн “шийдвэрлүүлэх үүрэгтэй” гэснийг “шийдвэрлүүлнэ” гэж, 24 дүгээр зүйлийн гарчгийн “тавигдах” гэснийг “тавих” гэж, 47 дугаар зүйлийн 47.4 дэх хэсгийн “хавсарган ирүүлнэ” гэснийг “хавсаргана” гэж өөрчлөх.

3.Төслийн 8 дугаар зүйлийн 8.3, 8.4 дэх хэсгийн “зөвхөн” гэснийг, 8.5 дахь хэсгийн “Энэ” гэснийг, 29 дүгээр зүйлийн 29.3 дахь хэсгийн “хурлаас” гэснийг, 40 дүгээр зүйлийн 40.7 дахь хэсгийн “төрийн өмчийн асуудал эрхэлсэн” гэснийг тус тус хасах.

4.Төслийн талаарх зарчмын зөрүүтэй саналын томъёолол дэмжигдсэнтэй холбогдуулан төслийн агуулга, зарчмыг алдагдуулахгүйгээр бүтэц, нэр томъёо, хэл найруулга, дэс дараалал, зүйл, заалтын дугаар, эшлэлийг нийцүүлж өөрчлөх. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

Одоо гишүүдийн гаргасан зарчмын зөрүүтэй саналуудыг хэлэлцэнэ. Сайнзориг гишүүний саналыг бол ажлын хэсгийн даргын санал учраас гүйцээн боловсруулахаар аваад явъя гэсэн. Тэгэхээр энэ дээр санал хураагдахгүй гэж ойлгоно зөв үү? 16 дээр ажлын хэсгийн санал татчихсан учраас 1 л санал хураах юм байна. Та юу яачих уу?

Улсын Их Хурал дахь Монгол Ардын намын бүлгийн дэд дарга Ариунзаяа даргад микрофон өгье.

А.Ариунзаяа: Монгол Ардын намын намын зүгээс Эдийн засгийн эрх чөлөөний хуулийн төсөл болон хамт өргөн мэдүүлсэн хуулийн төслүүдээс завсарлага авсан хугацаа дууссаныг мэдэгдье. Хэлэлцэж өгнө үү.

Д.Үүрийнтуяа: Баярлалаа. Үргэлжлүүлэн хэлэлцье. Алив зарчмын зөрүүтэй саналууд өгөөрэй гишүүдийн саналыг.

16 дугаар зүйл дээр Сайнзориг гишүүний саналаар бас санал хураачихъя. Тэгэхгүй бол энэ санал хураагдаагүй явчихсан. Үндсэн ажлын хэсгийн санал хураагдаагүй явчихсан.

“16 дугаар зүйл. Ногдол ашгийн бодлого

16.1. Төрийн болон орон нутгийн өмчийн компани, төрийн болон орон нутгийн өмч оролцоотой компанийн Хувьцаа эзэмшигчдийн хурал Компанийн тухай хуулийн 46, 47 дугаар зүйлд зааснаас гадна дараах зарчим, шаардлагыг баримтлан ногдол ашгийн бодлогыг батална:

16.1.1. компанийн төлбөрийн чадвар, мөнгөн урсгал, батлагдсан бизнес болон хөрөнгө оруулалтын төлөвлөгөө, их засварын хэрэгцээ, нөөц сан бүрдүүлэх шаардлага, санхүүгийн тогтвортой байдлыг харгалзан үзэх;

16.1.2. нийтийн үйлчилгээний үүрэг хүлээсэн бол тухайн үүргийн санхүүжилт, нөхөн төлбөр, татаас, тарифын зохицуулалтыг ногдол ашиг тооцох сууринаас тусад нь авч үзэх;

16.1.3. компанийн урт хугацааны үнэ цэн, хэвийн үйл ажиллагаа, хөрөнгө оруулалтын чадавхыг дордуулахгүй байх.

16.2. Төрийн болон орон нутгийн өмчийн компани, төрийн болон орон нутгийн өмч давамгайлсан компани ногдол ашгийн бодлогыг тухайн компанийн санхүүжилт, хөрөнгө оруулалтын бүтцээс хамаарч дараах хэлбэрээр ногдол ашгийн бодлогод тодорхойлж болно:

16.2.1. өмнөх оны аудитлагдсан санхүүгийн тайланд туссан татвар төлсний дараах хуваарилж болох цэвэр ашгаас тухай бүр, эсхүл урьдчилан тогтоосон хувиар;

16.2.2. цэвэр ашгийн хэмжээ үл хамаарч жил бүр тогтмол хэмжээ болон түүнээс тооцох өсөлтийн хувиар;

16.2.3. хүү, татвар, элэгдэл, хорогдол зэрэг санхүүгийн үзүүлэлтийн хамтад нь, эсхүл хэсэгчлэн тооцохоос өмнөх ашгаас урьдчилан тогтоосон тодорхой хувиар тооцож;

16.3. Арилжааны зорилготой төрийн болон орон нутгийн өмчийн компани, төрийн болон орон нутгийн өмч давамгайлсан компани нь тухайн санхүүгийн жилд хуваарилж болох цэвэр ашигтай ажилласан бол ногдол ашиг хуваарилах үүрэгтэй.

16.4. Энэ хуулийн 16.3-т заасан компанийн тухайн жилд хуваарилах ногдол ашгийн зорилтот хувь хэмжээ, ногдол ашиг тооцох хэлбэрийг Засгийн газар, орон нутгийн өмчит компанийн хувьд тухайн шатны иргэдийн Төлөөлөгчдийн Хурал жил бүрийн төсвийн төсөл боловсруулах үе шатанд компанийн ангилал, салбарын онцлог, хөрөнгө оруулалтын хэрэгцээ, өр төлбөрийн түвшин, мөнгөн урсгал, өөрийн хөрөнгийн өгөөж, нөөц сангийн шаардлагыг харгалзан тогтооно.

16.5. Энэ хуулийн 16.4-т заасан зорилтот хувь хэмжээ нь арилжааны зорилготой компанийн хувьд хуваарилж болох цэвэр ашгийн 30 хувиас доошгүй

байх зарчмыг баримтална. Харин компанийн санхүүгийн байдал, хөрөнгө оруулалтын хэрэгцээ, эсхүл энэ хуулийн 16.7-д заасан үндэслэл байгаа бол уг хувь хэмжээг бууруулж болно.

16.6.Нийтийн үйлчилгээний төрийн болон орон нутгийн өмчит компанид энэ хуулийн 16.5-т заасан доод хувь хэмжээ хамаарахгүй. Компани нь цэвэр ашигтай ажилласан тохиолдолд төлбөрийн чадвар, мөнгөн урсгал, нийтийн үйлчилгээний үүргийн санхүүжилт, үйлчилгээний хүртээмж, чанар, тасралтгүй байдлыг харгалзан ногдол ашиг хуваарилж болно.

16.6.Дараах үндэслэл байгаа бол энэ хуулийн 16.4, 16.5-т заасан зорилтот буюу доод хувь хэмжээнээс бага хэмжээгээр ногдол ашиг хуваарилж болно.

16.7.Компанийн тухай хуульд заасан төлбөрийн чадварын шаардлага хангагдахгүй, эсхүл нийтийн үйлчилгээний буюу арилжааны бус тусгай үүргийг хэрэгжүүлэхэд шаардлагатай санхүүжилт, эх үүсвэрийг хадгалах шаардлагатай болсон тохиолдолд энэ хуулийн 16.4, 16.5-д заасан зорилтот буюу доод хэмжээнээс багаар хуваарилж болно.

16.8.Энэ хуулийн 16.7-д заасан үндэслэлээр ногдол ашгийг зорилтот хувь хэмжээнээс бага тогтоох саналыг төлөөлөн удирдах зөвлөл гаргана. Саналд дараах баримт бичгийг хавсаргана:

16.7.1.аудитлагдсан санхүүгийн тайлан;

16.7.2.төлбөрийн чадварын болон мөнгөн урсгалын дүгнэлт;

16.7.3.дараагийн гурваас доошгүй жилийн стратеги төлөвлөгөө;

16.7.4.хөрөнгө оруулалт, их засварын тооцоолол;

16.7.5.нийтийн үйлчилгээний үүрэг хүлээсэн бол уг үүргийн өртөг, санхүүжилт, нөхөн төлбөрийн тооцоо;

16.7.6.ногдол ашиг бууруулах үндэслэл, эрсдэлийн үнэлгээ.

16.9.Энэ хуулийн 16.8-д заасан саналыг хувьцаа эзэмшигчийн эрхийг хэрэгжүүлэгч хянаж, зөвшөөрөх, өөрчлөх, эсхүл татгалзах тухай үндэслэл бүхий шийдвэр гаргана.

16.10.Төрийн болон орон нутгийн өмчийн оролцоотой компанийн хувьд төр, орон нутгийн эзэмшлийн хувьцаа эзэмшигчийн эрхийг хэрэгжүүлэгч нь энэ зүйлд заасан ногдол ашгийн бодлого, зорилтот хувь хэмжээ, санхүүгийн тогтвортой байдлын шалгуурыг баримтлан хувьцаа эзэмшигчдийн хурал, төлөөлөн удирдах зөвлөлд санал өгөх чиглэл баримтална.

16.11.Төрийн өмчийн асуудал эрхэлсэн төрийн захиргааны байгууллага нь төрийн өмчит компанийн ногдол ашгийн бодлогын хэрэгжилт, хуваарилсан болон хуваарилаагүй ашгийн хэмжээ, бууруулсан үндэслэл, дахин хөрөнгө оруулалтад ашигласан хөрөнгийн үр дүнгийн талаарх нэгдсэн тайланг жил бүр Засгийн газарт танилцуулж, олон нийтэд мэдээлнэ.

Тайлбар: Энэ зүйлд заасан “хүү, татвар, элэгдэл, хорогдол зэрэг санхүүгийн үзүүлэлтийн хамтад нь эсхүл хэсэгчлэн тооцохоос өмнөх ашиг” гэж олон улсын санхүүгийн харилцаанд түгээмэл ашигладаг “EBITDA буюу earnings before interests, tax, depreciation and amortization, EBI буюу earnings before interests, эсхүл EBIT буюу earnings before interests and tax” зэргийг ойлгоно.”.

Ийм хуулийн заалтад гадаад үг хэллэг оруулах юм уу? Санал гаргасан Улсын Их Хурлын гишүүн Сайнзориг. Санал хураалт. Ажлын хэсгийг түрүүн санал татчихсан шүү дээ. Ажлын хэсгийнхээ саналыг татчихсан. Уянгахишиг гишүүнээ 16.3-ыг Байнгын хороон дээрээ хөндөөд санал хураалт хийчих юм бол гүйцээн боловсруулах чиглэл авах боломжтой.

16.3. Ажлын хэсгийн саналыг нааш нь. Дахиад бүгдийг нь уншъя одоохон. Ажлын хэсэг түрүүн санал татсан. Уянгахишиг гишүүн бол ажлын хэсгийн саналаар хураах ёстой гэж байна.

Ажлын хэсгийн саналыг уншъя хуулийнхаа дагуу. Ажлын хэсгийн санал. Ноогдол ашгийн.

“16 дугаар зүйл.Ногдол ашгийн бодлого

16.1.Төрийн болон орон нутгийн өмчийн компани, төрийн болон орон нутгийн өмч давамгайлсан компани ногдол ашиг хуваарилахдаа Компанийн тухай хуулийн 46, 47 дугаар зүйлд зааснаас гадна дараах зарчим, шаардлагыг баримтална:

16.1.1.ногдол ашгийг өмнөх оны аудитлагдсан санхүүгийн тайланд туссан татвар төлсний дараах хуваарилж болох цэвэр ашгаас тооцох;

16.1.2.компанийн төлбөрийн чадвар, мөнгөн урсгал, батлагдсан бизнес болон хөрөнгө оруулалтын төлөвлөгөө, их засварын хэрэгцээ, нөөц сан бүрдүүлэх шаардлага, санхүүгийн тогтвортой байдлыг харгалзан үзэх;

16.1.3.нийтийн үйлчилгээний үүрэг хүлээсэн бол тухайн үүргийн санхүүжилт, нөхөн төлбөр, татаас, тарифын зохицуулалтыг ногдол ашиг тооцох сууринаас тусад нь авч үзэх;

16.1.4.компанийн урт хугацааны үнэ цэн, хэвийн үйл ажиллагаа, хөрөнгө оруулалтын чадавхыг дордуулахгүй байх.

16.2.Арилжааны зорилготой төрийн болон орон нутгийн өмчийн компани, төрийн болон орон нутгийн өмч давамгайлсан компани нь тухайн санхүүгийн жилд хуваарилж болох цэвэр ашигтай ажилласан бол ногдол ашиг хуваарилах үүрэгтэй.

16.3.Энэ хуулийн 16.2-т заасан компанийн тухайн жилд хуваарилах ногдол ашгийн зорилтот хувь хэмжээг Засгийн газар, орон нутгийн өмчит компанийн хувьд тухайн шатны иргэдийн Төлөөлөгчдийн Хурал жил бүрийн төсвийн төсөл боловсруулах үе шатанд компанийн ангилал, салбарын онцлог, хөрөнгө оруулалтын хэрэгцээ, өр төлбөрийн түвшин, мөнгөн урсгал, өөрийн хөрөнгийн өгөөж, нөөц сангийн шаардлагыг харгалзан тогтооно.

16.4.Энэ хуулийн 16.3-т заасан зорилтот хувь хэмжээ нь арилжааны зорилготой компанийн хувьд хуваарилж болох цэвэр ашгийн 30 хувиас доошгүй байх зарчмыг баримтална. Харин компанийн санхүүгийн байдал, хөрөнгө оруулалтын хэрэгцээ, эсхүл энэ хуулийн 16.6-д заасан үндэслэл байгаа бол уг хувь хэмжээг бууруулж болно.

16.5.Нийтийн үйлчилгээний төрийн болон орон нутгийн өмчит компанид энэ хуулийн 16.4-т заасан доод хувь хэмжээ хамаарахгүй. Компани нь цэвэр ашигтай ажилласан тохиолдолд төлбөрийн чадвар, мөнгөн урсгал, нийтийн үйлчилгээний үүргийн санхүүжилт, үйлчилгээний хүртээмж, чанар, тасралтгүй байдлыг харгалзан ногдол ашиг хуваарилж болно.

16.6. Дараах үндэслэл байгаа бол энэ хуулийн 16.3, 16.4-т заасан зорилтот буюу доод хэмжээнээс бага хэмжээгээр ногдол ашиг хуваарилж болно:

16.6.1.ногдол ашиг хуваарилснаар Компанийн тухай хуульд заасан төлбөрийн чадварын шаардлага хангагдахгүй болох;

16.6.2.компанийн мөнгөн урсгал, өр төлбөрийн үйлчилгээ, зээлийн гэрээний үүрэг, өрийн тогтвортой байдлын шалгуурт шууд эрсдэл үүсэх;

16.6.3.батлагдсан бизнес, хөрөнгө оруулалт, их засвар, техник технологийн шинэчлэлийн төлөвлөгөөг хэрэгжүүлэхэд цэвэр ашгийг дахин хөрөнгө оруулалтад ашиглах зайлшгүй шаардлага үүссэн;

16.6.4.энэ хуульд заасан нөөц сан, эсхүл тусгай зориулалтын нөөц бүрдүүлэх шаардлагатай;

16.6.5.нийтийн үйлчилгээний буюу арилжааны бус тусгай үүргийг хэрэгжүүлэхэд шаардлагатай санхүүжилт, эх үүсвэрийг хадгалах шаардлагатай;

16.6.6.тухайн компанид хуримтлагдсан алдагдал байгаа бөгөөд уг алдагдлыг нөхөх шаардлагатай;

16.6.7.онцгой нөхцөл байдал, давагдашгүй хүчин зүйл, зах зээлийн огцом өөрчлөлт, салбарын системийн эрсдэлийн улмаас компанийн санхүүгийн тогтвортой байдалд сөрөг нөлөө үүсэхээр байгаа.

16.7.Энэ хуулийн 16.6-д заасан үндэслэлээр ногдол ашгийг зорилтот хувь хэмжээнээс бага тогтоох саналыг төлөөлөн удирдах зөвлөл гаргана. Саналд дараах баримт бичгийг хавсаргана:

16.7.1.аудитлагдсан санхүүгийн тайлан;

16.7.2.төлбөрийн чадварын болон мөнгөн урсгалын дүгнэлт;

16.7.3.дараагийн гурваас доошгүй жилийн стратеги төлөвлөгөө;

16.7.4.хөрөнгө оруулалт, их засварын тооцоолол;

16.7.5.нийтийн үйлчилгээний үүрэг хүлээсэн бол уг үүргийн өртөг, санхүүжилт, нөхөн төлбөрийн тооцоо;

16.7.6.ногдол ашиг бууруулах үндэслэл, эрсдэлийн үнэлгээ.

16.8.Энэ хуулийн 16.7-д заасан саналыг хувьцаа эзэмшигчийн эрхийг хэрэгжүүлэгч хянаж, зөвшөөрөх, өөрчлөх, эсхүл татгалзах тухай үндэслэл бүхий шийдвэр гаргана.

16.9.Төрийн болон орон нутгийн өмчийн оролцоотой компанийн хувьд төр, орон нутгийн эзэмшлийн хувьцаа эзэмшигчийн эрхийг хэрэгжүүлэгч нь энэ зүйлд заасан ногдол ашгийн бодлого, зорилтот хувь хэмжээ, санхүүгийн тогтвортой байдлын шалгуурыг баримтлан хувьцаа эзэмшигчдийн хурал, төлөөлөн удирдах зөвлөлд санал өгөх чиглэл баримтална.

16.10.Төрийн өмчийн асуудал эрхэлсэн төрийн захиргааны байгууллага нь төрийн өмчит компанийн ногдол ашгийн бодлогын хэрэгжилт, хуваарилсан болон хуваарилаагүй ашгийн хэмжээ, бууруулсан үндэслэл, дахин хөрөнгө оруулалтад ашигласан хөрөнгийн үр дүнгийн талаарх нэгдсэн тайланг жил бүр Засгийн газарт танилцуулж, олон нийтэд мэдээлнэ.” . Санал гаргасан ажлын хэсэг. Ажлын хэсгийн саналаар санал хураалт.

Батнайрамдал гишүүн горимын санал гаргая.

О.Батнайрамдал: Сая төхөөрөмж ажилласангүй. Сая санал хураалтыг хүчингүй болгоод дахин санал хураалт явуулж өгнө үү гэж горимын санал гаргая.

Д.Үүрийнтуяа: Батнайрамдал гишүүний саналаар санал хураалт явуулъя. Санал хураалт.

21 гишүүнээс 11 гишүүн дэмжиж, 52.4 хувийн саналаар энэ санал хүчингүй боллоо.

Ажлын хэсгийн саналыг дэмжье гэсэн саналын томьёоллоор санал хураалт.

21 гишүүнээс 11 гишүүн дэмжиж, 52.4 хувиар энэ санал дэмжигдлээ.

Давхцаагүй байгаа хэдэн санал байгаа юм? Сайнзориг гишүүний ажлын хэсэгтэй давхцаагүй 3 санал дээр санал хурааа. 3-хан санал дээр санал хураалт явуулчихъя.

Хуулийн төслийн 23 дугаар зүйлийн 23.4 дэх хэсэг нэмэх:

“23.4.Төлөөлөн удирдах зөвлөлгүй төрийн болон орон нутгийн өмчит компанийн хувьд түүний бүрэн эрхийг хувьцаа эзэмшигчийн эрхийг хэрэгжүүлэгч хэрэгжүүлнэ.”.

6.Хуулийн төслийн 36 дугаар зүйлийн 36.5 дахь хэсгийн “компанид” гэснийг “компани болон толгой компанийн санхүүжилтээр үйл ажиллагаа явуулж байгаа төсөл хэрэгжүүлэгч компанид” гэж өөрчлөх.

7.Хуулийн төслийн 39.3 дахь хэсгийн “03 дугаар сарын 01-ний” гэснийг “05 дугаар сарын 01-ний” гэж өөрчлөх. Санал гаргасан Улсын Их Хурлын гишүүн Сайнзориг. 1 санал. Энэ чинь нэг санал биз дээ энэ чинь 23.4-ийг нэмэх гээд?

Сайнзориг гишүүний санал 21-ээс 10-аар 47.6 хувиар дэмжигдсэнгүй.

Одоо энийг хар аа Мягмаржаргал аа, Мягмаржав аа, ажлын хэсгийнхэн, Байнгын хорооныхон ажлын хэсгийн гишүүдийн гаргасан зарчмын зөрүүтэй саналыг Байнгын хорооны гишүүдэд тарааж өгөхгүйгээр санал хураана гэж ямар юм байдаг юм бэ? Энэ хүмүүс чинь юу уншиж танилцах юм. Тийм учраас сая одоо Сайнзориг гишүүний гаргасан саяын зарчмын зөрүүтэй саналууд дээр горим дээрээ та оруулаад явчих. Горим оруулахаар оруулчих. Энэ санал чинь ажлын хэсгээр ороогүй явчхаад байна шүү дээ. Гишүүний хувьд Байнгын хороонд гаргасан санал. Үгүй тэгээд гишүүдэд тарааж өгдөггүй юм уу? Үгүй ээ.

Сайнзориг гишүүний эхний санал унасан.

2 дахь санал сая уншсан 6 гээд. Төслийн 36 дугаар зүйлийн 36.5 дахь хэсгийн “компанид” гэснийг “компани болон толгой компанийн санхүүжилтээр үйл ажиллагаа явуулж байгаа төсөл хэрэгжүүлэгч компанид” гэж өөрчлөх санал гаргажээ. Сайнзориг гишүүн саналаа тайлбарлая.

П.Сайнзориг: Харин тийм. Алив миний саналыг өгчих. Би саналаа харчихъя. 36.5 ийм байгаа юм. Энэ хуулийн 36.1-д заасан тохиолдолд хувийн хэвшил гүйцэтгэх боломжгүй нийтийн үйлчилгээний төрийн болон орон нутгийн өмчит компанид зарим энэ компанийн нөгөө гүйцэтгэлийн шалгуур үзүүлэлт хамаарахгүй гэдэг заалттай юм. Гэтэл Уянгаа би яг чамд тааруулж би чамайг ажлын хэсэгт ор гэхээр. Үгүй би тайлбарлахаар чи байж бай гээд байх юм. Би одоо.

Д.Үүрийнтуяа: Би уншаад өгье. Би уншаад өгье хар аа. Би уншаад өгье Сайнзориг гишүүн наашаа би дахиад уншаад өгье. Хаана байна саналаа өгөөч. Дундаа ганцхан саналтай юу? Эдийн засгийн байнгын хорооны ажлын алба энэ Байнгын хороо хуралдах бэлтгэл ажлыг сайн ханга. Гишүүдэд зарчмын зөрүүтэй саналын томьёолол тараагдахгүйгээр яаж санал хураалт явагдах юм бэ? Гишүүдийн хэлж байгаа буруу биш шүү дээ.

Уянгахишиг гишүүн та сонсож байгаарай. Хуулийн төслийн 36 дугаар зүйлийн 36.5 дахь хэсгийн “компанид” гэснийг “компани болон толгой компанийн санхүүжилтээр үйл ажиллагаа явуулж байгаа төсөл хэрэгжүүлэгч компанид” гэж тодотгож нэмж оруулж байгаа юм байна. Үгүй компанид гэснийг. 36.5-ын компанид гэснийг. Тэгэхээр одоо яг энэ компанид гэдэг нь аль компанид гэдэг хэсгийн оронд энийг оруулж байгаа юм бэ гэдгийг Сайнзориг гишүүн яг шигтгэж оруулаад нэг уншаад өг дөө.

П.Сайнзориг: Уянгахишиг гишүүнээ энэ одоо 36.1.1 чинь компанийн удирдлагуудтай хариуцлага тооцох заалт байхгүй юу. Өөрөөр хэлэх юм бол үйлдвэрлэлийг өргөжүүлэх, технологийг шинэчлэх, хөрөнгө оруулснаас бусад тохиолдолд компанийг 2 жил дараалан алдагдал хүлээлгэсэн, эсвэл гэрээнд заасан санхүүгийн зориулалт үйлчилгээг 2 жил дараалан хангаж чадаагүй гэдэг үүргийг нийтийн үйлчилгээний компанид хамаагүй гэсэн.

Миний саналаар юу асуудал оруулж ирж байна гэхээр бодит байдал дээр толгой компани нь санхүүг нь даагаад төсөл хэрэгжүүлж байгаа компаниуд чинь 2 жил энэ тэр дээрээ ашиггүй ажиллаж байгаа компаниуд байгаа байхгүй юу. Мон-

Атом өшөө ийм төслийн компаниуд. Энэ зүйлүүдийг энэтэй шууд яачих юм бол энэ дээр чинь гүйцэтгэх удирдлагуудтай нь 2 жил ч болохгүй хариуцлага тооцоод төслийн энэ чинь нөгөө төслийн тусгай зориулалтын компани буюу яг энэ үйлдвэрлэл, бүтээн байгуулалт явах хүртэл хугацаанд энэ заалт хамаарахгүй шүү л гэдэг л зүйл дээр орж байгаа байхгүй юу. Толгой компани л санхүү. Зөв.

Д.Үүрийнтуяа: Уянгахишиг гишүүн микрофон дээр та асуултаа асуучих. Уянгахишиг гишүүнд.

Г.Уянгахишиг: Сайнзориг гишүүнээ энэ 36.5 дээр байна шүү дээ 36.1.1-д заасан тохиолдолд ингээд эсвэл ингээд дан үйл ажиллагаа эрхэлдэг төрийн болон орон нутгийн өмчийн компанид хамаарахгүй байж болно гэсэн байхгүй юу. Тэгэхээр энэ дээр заавал тэр төрийн болон орон нутгийн өмчит компани гэдгийн дараа толгой компани энэ тэр гэж оруулах гээд. Үгүй ээ харин наадах чинь компанид гэдгийг гээд байх юм байна шүү дээ.

Д.Үүрийнтуяа: Асуулт асуусан. Тэгэхээр одоо Улсын Их Хурлын гишүүн Байнгын хороонд санал гаргах эрхтэй. Байнгын хороонд ирсэн саналаар зарчмын зөрүүтэй саналаар санал хураах нь Байнгын хорооны үүрэг. Тийм учраас зайлшгүй энэ саналаар санал хураалт хийнэ. Тэгэхээр энэ саналтай холбоотой Уянгахишиг гишүүн асуулт асуусан, хариулсан. Одоо Мөнхсоёл гишүүн асуултаа асууя.

Б.Мөнхсоёл: Энэ ингэж ойлгосон хүүе санал гаргаж байгаа Сайнзориг гишүүнээ.

Д.Үүрийнтуяа: Сайнзориг гишүүн хариулаарай асуултад.

Б.Мөнхсоёл: Энэ 36.5-ыг бүтнээрээ уншихвал ойлгогдож магадгүй юм байна. Энэ хуулийн 36.1.1-д заасан тохиолдол хувийн хэвшил гүйцэтгэх боломжгүй нийтийн үйлчилгээний төрийн болон орон нутгийн өмчийн компанид хамаарахгүй гэсэн байхгүй юу. Тэгэнгүүт “компанид” гэдгийн ард нэмээд компани болон толгой компанийн санхүүжилтээр үйл ажиллагаа явуулж байгаа төсөл хэрэгжүүлэгч компанид гээд нарийвчлаад оруулаад ирчихсэн гэж ойлгож байна Сайнзориг гишүүнээ зөв үү?

Д.Үүрийнтуяа: Сайнзориг гишүүн.

Б.Мөнхсоёл: Хөөе Сайнзориг гишүүнээ энэ хамрах асуудал компани ч биш нэмээд энд энэний санхүүжилтээр юу яаж байгааг төсөл гэж нэмж өгчхөж байгаа зөв үү?

Д.Үүрийнтуяа: Дэгээрээ явъя. Ажлын хэсэгт гишүүд саналаа өгөөд ажлын хэсэгт орж ирсэн саналаар ажлын хэсэг зарим гишүүдийн саналыг авахгүй байж болно. Байнгын хороонд ирсэн саналаар зайлшгүй зарчмын зөрүүтэй саналаар санал хураах ёстой. Тийм учраас одоо саналаа хураая. Санал хураалт. Саяны саналаар санал хураалт.

Гишүүд ээ санал хураалт. Дэмжье гэсэн саналын томьёоллоор санал хураалт.

21 гишүүнээс 8 гишүүн дэмжиж, 38.1 хувиар энэ санал дэмжигдсэнгүй.

Сайнзориг гишүүний 3 дахь саналаар санал хурааа. Гишүүд ээ дараагийн асуудалд оръё. Дараагийнхаа санал хураалт. Дэгээрээ дэгээрээ явъя эрхэм гишүүд ээ. Дэгээрээ явъя. Дараагийн.

Хуулийн төслийн 39 дүгээр зүйлийн 39.3 дахь хэсгийн “03 дугаар сарын 01-ний” гэснийг “05 дугаар сарын 01-ний” гэж өөрчлөх. Санал гаргасан Улсын Их Хурлын гишүүн Сайнзориг. Дэмжье гэсэн саналын томъёоллоор санал хураалт.

21 гишүүнээс 11 гишүүн дэмжиж, 52.4 хувиар санал дэмжигдлээ.

Уянгахишиг гишүүн наадхаа дараа нь больё.

18.1.4 Зарчмын зөрүүтэй санал. энэ хуулийн 8.1.2-т заасан үндэслэлээр үүсгэн байгуулсан төрийн өмчит компанийн төрийн эзэмшлийн хувьцааг Улсын Их Хурлын зөвшөөрлийн үндсэн дээр бусдад шилжүүлэх, барьцаалуулах;”. Санал гаргасан Улсын Их Хурлын гишүүн Сайнзориг. Санал хураалт.

21 гишүүнээс 10 гишүүн дэмжиж, 47.6 хувийн саналаар санал дэмжигдсэнгүй.

Уянга гишүүн горимын санал гаргая.

Б.Уянга: Анх удаа төхөөрөмж маань гацаж байна. Тийм учраас дахин санал хурааж өгнө үү хүчингүй болгоод.

Д.Үүрийнтуяа: Уянга гишүүний горимын саналаар энэ саналыг хүчингүй болгох санал хураалт явуулъя. Санал хураалт.

21 гишүүнээс 11 гишүүн дэмжиж, 52.4 хувиар Уянга гишүүний санал дэмжигдлээ.

Сайнзориг гишүүний саналаар санал хураалт явуулъя. Санал хураалт.

21 гишүүнээс 11 гишүүн дэмжиж, 52.4 хувиар санал дэмжигдлээ.

Төслийн 21 дүгээр зүйлийн 21.2.8 дахь заалтын “хувьцааны удирдлагын талаарх илтгэлийг” гэснийг, мөн төслийн 47 дугаар зүйлийн 47.6 дахь хэсгийн “төр болон орон нутгийн хувьцааны удирдлагын талаарх илтгэлийг” гэснийг “энэ хуулийн 7 дугаар зүйлд заасан өмчлөлийн бодлогын хэрэгжилтийн тайланг” гэж тус тус өөрчлөх. Санал гаргасан Улсын Их Хурлын гишүүн Сайнзориг. Санал хураалт.

21 гишүүнээс 11 гишүүн дэмжиж, 52.4 хувиар санал дэмжигдлээ.

Цэнгүүн гишүүний гаргасан 4 санал байна.

Төслийн 17 дугаар зүйлийн 17.2 дахь хэсгийг доор дурдсанаар өөрчлөн найруулах:

“17.2.Төрийн өмчит компанийн төрийн эзэмшлийн хувьцаа эзэмшигчийн эрхийг хэрэгжүүлэгч нь төрийн өмчийн асуудал эрхэлсэн төрийн захиргааны

байгууллага байна.”. Санал гаргасан Улсын Их Хурлын гишүүн Цэнгүүн. Санал хураалт.

21 гишүүнээс 6 гишүүн дэмжиж, 28.6 хувиар энэ санал дэмжигдсэнгүй.

8.Төслийн 21 дүгээр зүйлийг хасах. Улсын Их Хурлын гишүүн Цэнгүүн. Төслийн 21 дүгээр зүйлийг хасах. Цэнгүүн гишүүний түрүүн саналаар нөгөө өөрийнх нь саналаар 21-ийг нэгтгэчихсэн учраас 21-ийг хасах санал оруулсан юм байна. Тэгэхээр тэр санал нь дэмжигдээгүй учраас энэ хасах юм бол бас болохгүй болчих гээд байна л даа. Санал хураалт явуулъя.

21-ээс 1 гишүүн 4.8 хувиар энэ санал дэмжигдсэнгүй.

Төслийн 23 дугаар зүйлд доор дурдсан агуулгатай 23.4 дэх хэсэг нэмэх:

“23.4.Ижил төрлийн үйл ажиллагаа, чиг үүрэг хэрэгжүүлдэг төрийн болон орон нутгийн өмчит компаниуд нэг төлөөлөн удирдах зөвлөлтэй байна.”. Санал гаргасан Улсын Их Хурлын гишүүн Цэнгүүн. Санал хураалт.

21-ээс 2 гишүүн дэмжиж, 9.5 хувиар уг санал дэмжигдсэнгүй.

11.Төслийн 32 дугаар зүйлийн 32.1.4 дэх заалтыг доор дурдсанаар өөрчлөн найруулах:

“32.1.4.бусад аж ахуйн нэгж, төрийн байгууллагад давхар албан тушаал эрхэлдэггүй байх.”. Санал гаргасан Улсын Их Хурлын гишүүн Цэнгүүн. Санал хураалт.

21-ээс 6 гишүүн дэмжиж, 28.6 хувийн саналаар энэ санал дэмжигдсэнгүй.

12.Төслийн 17 дугаар зүйлийн 17.2 дахь хэсэгт доор дурдсан агуулгатай 17.2.1 дэх заалт нэмэх:

“17.2.1.Энэ хуулийн 6.1.2-д заасан төрийн өмчийн оролцоотой компанийн эрхийг хэрэгжүүлэгч нь биет даасан хараат бус санхүүгийн институт бүхий хөрөнгийн менежментийн байгууллага байж болно”. Санал гаргасан Улсын Их Хурлын гишүүн Пунсалмаа. Та саналаа тайлбарлах уу? Пунсалмаа гишүүний микрофоныг өгье.

Б.Пунсалмаа: Энэ өмчлөлийн 2, 3 янзын хэлбэр орж ирж байгаатай холбогдоод төрийн өмчийн компанийг болохлоор төр нь дээрээсээ энэ удирдлагыг нь томилж болно. Төрийн өмчийн оролцоотой компанийг болохлоор энэ Компанийн тухай хуулиараа зохицуулалт хэрэгжүүлье гэсэн ийм санал байгаа.

Д.Үүрийнтуяа: Санал хураалт энэхүү саналыг дэмжье гэсэн томьёоллоор санал хураалт.

21 гишүүнээс 12 гишүүн 57.1 хувиар санал дэмжигдлээ.

Хуулийн төсөлтэй хамт өргөн мэдүүлсэн хуулийн төслүүдийн талаарх зарчмын зөрүүтэй саналын томьёоллуудаар санал хурааа.

1.Аймаг, нийслэл, сум, дүүргийн иргэдийн Төлөөлөгчдийн Хурлын сонгуулийн тухай хуульд өөрчлөлт оруулах тухай хуулийн төслийн талаарх зарчмын зөрүүтэй саналын томьёолол.

1.Төслийн 1 дүгээр зүйлийг 2 дугаар зүйл болгож доор дурдсанаар өөрчлөн найруулах:

“2 дугаар зүйл.Аймаг, нийслэл, сум, дүүргийн иргэдийн Төлөөлөгчдийн Хурлын сонгуулийн тухай хуулийн 43 дугаар зүйлийн 43.3.3 дахь заалтыг хүчингүй болсонд тооцсугай.”. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувийн саналаар уг санал дэмжигдлээ.

2.Архив, албан хэрэг хөтлөлтийн тухай хуульд өөрчлөлт оруулах тухай хуулийн төслийн талаарх зарчмын зөрүүтэй саналын томьёолол.

1.Төслийн 2 дугаар зүйлийн “төрийн өмчит үйлдвэрийн газар” гэсний өмнө “Төрийн байгууллага,” гэж нэмж, “албан газар, төрийн өмчийн компани” гэснийг “Төрийн болон орон нутгийн өмчийн тухай хуулийн 13 дугаар зүйлийн 5-д заасан төрийн өмчит хуулийн этгээд” гэж өөрчлөх. Санал гаргасан ажлын хэсэг. Санал хураалт.

21 гишүүнээс 11 гишүүн дэмжиж, 52.4 хувиар энэ санал дэмжигдлээ.

3.Монгол Улсын Их Хурлын сонгуулийн тухай хуульд өөрчлөлт оруулах тухай хуулийн төслийн талаарх зарчмын зөрүүтэй саналын томьёолол.

Төслийн 1 дүгээр зүйлийг 2 дугаар зүйл болгож, доор дурдсанаар өөрчлөн найруулах:

“2 дугаар зүйл.Монгол Улсын Их Хурлын сонгуулийн тухай хуулийн 44 дүгээр зүйлийн 44.3.3 дахь заалтыг хүчингүй болсонд тооцсугай.”. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

4.Төрийн болон орон нутгийн өмчийн тухай хуульд нэмэлт, өөрчлөлт оруулах тухай хуулийн төслийн талаарх зарчмын зөрүүтэй саналын томьёолол.

1.Төслийн 2 дугаар зүйлийн 1 дэх заалтын 9¹ дүгээр зүйлийн 6 дахь хэсгийн “улсын ахлах” гэсний дараа “байцаагч” гэж нэмж, 7 дахь хэсгийн 2 дахь өгүүлбэрийг хасах.

2.Мөн зүйлийн 2 дахь заалтын 13 дугаар зүйлийн 2 дахь заалтын “нийтийн үйлчилгээний” гэсний өмнө “төрийн өмчит” гэж нэмэх.

3.Мөн зүйлийн 3 дахь заалтын 15 дугаар зүйлийн гарчгийн, 6, 7 дахь хэсгийн “Нийтийн үйлчилгээний” гэсний өмнө “Төрийн болон орон нутгийн өмчит” гэж, мөн зүйлийн 5 дахь хэсгийн “холбоотой” гэсний дараа “асуудлыг” гэж, 7 дахь хэсгийн “нээлттэй” гэсний өмнө “олон нийтэд ил тод,” гэж, тус тус нэмж, мөн хэсгийн 1 дэх

заалтын “удирдлагын” гэснийг “удирдлага, түүний цалин, хөлс, урамшууллын” гэж өөрчлөх.

4.Төслийн 3 дугаар зүйлийн 14 дүгээр зүйлийн өмнө “мөн зүйлийн 3 дахь заалтын “өмчийн оролцоотой аж ахуйн нэгжийн” гэснийг “өмчит компанийн” гэж,” гэж нэмэх. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

Төслийн 3 дугаар зүйлийн 21¹ зүйлийн дараах “12 дахь” гэснийг “13 дахь” гэж өөрчлөх. Санал гаргасан Улсын Их Хурлын гишүүн Сайнзориг. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

“Хууль батлагдсантай холбогдуулан авах арга хэмжээний тухай” Монгол Улсын Их Хурлын тогтоолын талаарх төслийн талаарх зарчмын зөрүүтэй саналын томьёолол.

Тогтоолын төслийн нэг дэх заалтад доор дурдсан агуулгатай 3, 4 дэх дэд заалт нэмэх:

“3/Төрийн болон орон нутгийн өмчит компанийн тухай хууль батлагдсантай холбогдуулан бусад хууль тогтоомж дахь төрийн өмчит үйлдвэрийн газар, төрийн болон орон нутгийн өмчит компанийн талаарх нэр томьёог хуульд нийцүүлж өөрчлөх талаарх саналаа Улсын Их Хурлын 2026 оны намрын ээлжит чуулганы хугацаанд өргөн мэдүүлэх;

4/Энэ хууль хүчин төгөлдөр болохоос өмнө үүсгэн байгуулагдсан уул уурхайн салбарт үйл ажиллагаа явуулж байгаа орон нутгийн өмчит компанид тус хуулийн 8.3-т заасан зөвшөөрөл хамаарахгүй.”. Санал гаргасан ажлын хэсэг. Санал хураалт.

21 гишүүнээс 12 гишүүн дэмжиж, 57.1 хувиар уг санал дэмжигдлээ.

Хууль, тогтоолын төслүүдийн талаарх зарчмын зөрүүтэй саналуудаар санал хураалт явуулж дууслаа.

Хууль, тогтоолын төслийн анхны хэлэлцүүлгийг явуулж дууслаа.

Хууль, тогтоолын төслийн анхны хэлэлцүүлгийг явуулсан талаарх Байнгын хорооны санал, дүгнэлтийг Улсын Их Хурлын чуулганы нэгдсэн хуралдаанд Улсын Их Хурлын гишүүн Уянга гишүүн танилцуулах уу? Уянга гишүүн танилцуулъя. Дараагийн асуудалд. орьё.

14.34 цаг.

Эдийн засгийн эрх чөлөөний тухай хуулийн төсөл болон хамт өргөн мэдүүлсэн хуулийн төслүүдийн хэлэлцэх эсэх хэлэлцүүлгийг явуулъя.

06 сарын 16-ны өдрийн Байнгын хорооны хуралдаанаар хуулийн төслийн хэлэлцүүлгээс Улсын Их Хурал дахь Монгол Ардын намын бүлэг 5 хоногийн завсарлага авсан.

Ардын намын бүлгийн дарга, Улсын Их Хурлын гишүүн Аюушийн Ариунзаяа уг завсарлагыг дуусгавар болгож байгаа талаараа түрүүн байнгын хороонд мэдэгдсэн.

Ийм учраас чуулганы завсарлага дууссан тул өмнөх хуралдаанаар хуулийн төслийн үзэл баримтлалын талаар хууль санаачлагч танилцуулгаа уншиж дууссаны дараа завсарлага авсан учраас одоо үргэлжлүүлэн хэлэлцээд явна.

Хуулийн төслийн талаар хууль санаачлагчаас асуулт асуух гишүүд нэрсээ өгнө үү.

Асуулт асуулт асуух гишүүд алга байна.

Хуулийн төслийн үзэл баримтлалтай холбогдуулан дэмжсэн, дэмжээгүй байр суурь илэрхийлж үг хэлэх гишүүд нэрсээ өгнө үү.

Үг хэлэх гишүүд алга байна.

Гишүүд асуулт асууж, үг хэлж дууслаа.

Монгол Улсын Их Хурлын чуулганы хуралдааны дэгийн тухай хуулийн 35 дугаар зүйлийн 35.11 дэх хэсэгт заасныг үндэслэн хуулийн төсөл бүрийг үзэл баримтлалын хүрээнд дэмжих эсэх асуудлаар санал хураалт явуулж дууссан. Одоо санал хураалт явуулъя. Гишүүд санал хураалтад бэлдэнэ үү. Батчимэг гишүүн юундаа орох уу?

Эдийн засгийн эрх чөлөөний тухай хуулийн төслийг үзэл баримтлалын хүрээнд хэлэлцэхийг дэмжье гэсэн саналын томьёоллоор санал хураалт явуулъя. Санал хураалт.

21 гишүүнээс 12 гишүүн дэмжиж, 57.1 хувиар хэлэлцэх нь дэмжигдлээ.

Хамт өргөн мэдүүлсэн Хууль тогтоомжийн тухай хуульд нэмэлт оруулах тухай хуулийн төслийг үзэл баримтлалын хүрээнд хэлэлцэхийг дэмжье гэсэн саналын томьёоллоор санал хураалт явуулъя. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

3.Хамт өргөн мэдүүлсэн Өрсөлдөөний тухай хуульд өөрчлөлт оруулах тухай хуулийн төслийг үзэл баримтлалын хүрээнд хэлэлцэхийг дэмжье гэсэн саналын томьёоллоор санал хураалт явуулъя. Санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

4.Хамт өргөн мэдүүлсэн Зөвшөөрлийн тухай хуульд нэмэлт оруулах тухай хуулийн төслийг үзэл баримтлалын хүрээнд дэмжье гэсэн саналын томьёоллоор санал хураалт.

21 гишүүнээс 12 гишүүн дэмжиж, 57.1 хувиар санал дэмжигдлээ.

Санал хураалт явуулж дууслаа.

Эдийн засгийн эрх чөлөөний тухай хуулийн төсөл болон хамт өргөн мэдүүлсэн хуулийн төслүүдийг хэлэлцэх эсэх хэлэлцүүлэг явуулсан талаарх Эдийн засгийн байнгын хорооны санал, дүгнэлтийг чуулганы нэгдсэн хуралдаанд Улсын Их Хурлын гишүүн Очирбат танилцуулна.

Хуулийн төслүүдийг. Санаачлагч болохгүй юм байна шүү. Тэгэхээр Пунсалмаа гишүүн танилцуулна.

Хуулийн төслүүдийг хэлэлцэж дууслаа.

Эдийн засгийн байнгын хорооны хэлэлцэх асуудал дуусаж, хуралдаан үүгээр өндөрлөж байна. Байнгын хорооны гишүүд, ажлын хэсгийнхэнд баярлалаа.

14.39 цаг.

*ДУУНЫ БИЧЛЭГЭЭС ХУРАЛДААНЫ ДЭЛГЭРЭНГҮЙ
ТЭМДЭГЛЭЛ БУУЛГАЖ ХЯНАСАН: ШИНЖЭЭЧ*

Д.ОТГОНДЭЛГЭР